

Дагъусттаннал агабият

16+

ISSN 0235-0165

ЦӀубарз

ЛИТЕРАТУРАЛУЛ ВА ПОЛИТИКАЛУЛ ЖУРНАЛ

1/2018

январь - февраль

Мариям ЦӀбрагъимова

Ххургал шяравалу



ЦІубарз

КІива зуруй цал буккайсса
литературийну-художествийсса
ва жяматийну-политикийсса
журнал

1/2018

Двухмесячный
литературно-художественный
и общественно-политический
журнал

Учредитель:

Министерство печати
и информации РД

КАЯЛУВЧИ - ХЪУНАМА РЕДАКТОР
Мурад АхІмадов

Итабакълакъиссар
1952 шиная шинмай

РЕДКОЛЛЕГИЯ:

*Журнал основан в 1952 году
Расулом Гамзатовым*

С. АхІмадов
Э. Аьбдуллаев
Р. Башаев
М. Давыдов
Х. Илиясов (*редактор*)
Аь. Исмяилов (*хъиригчу*)
К. Мазаев
Сс. Увайсов
С. ХІажиева
И. МахІаммадов

1/2018

январь - февраль

Государственное
бюджетное учреждение
Республики Дагестан
“Редакция республиканских лите-
ратурных журналов “Соколенок”
и “Литературный Дагестан”

Электронный адрес редакции:
litdag@mail.ru

ЖУЛВА ЮБИЛЯР

М. Ибрагьимова.....	3
С. Исмяилов. Мариямлуясса махь.....	3
Ш. Оьмаров. Мариям Ибрагьимова ва ганил лу.....	4
М. Къарачаев. ХIакъмурди личIантIисса.....	4
Аь.МахIрамов. Мариям хьхьичIунсса чмчу-тарихчи бур.....	5
М.Маммаев. Мариям буслай буртIайласса тарих.....	6
Э.ХIажимухIаммадов. Дақъаврийнсса ххуллу.....	6
ХI.ХIадисов. Мариям чивчумунийну бувчIайва.....	7
Оьмар Хайямлун.....	8
Юсуп Хаппалаевлун.....	8

ПОЭЗИЯ

М.Давыдов. Лакрал аьрашарал дазуй.....	10
К.Мазаев. ХхячарачIелму.....	23
Б.Гъазиева. Агь, дуниял.....	26

УССУРВАЛССА ЛИТЕРАТУРАЛУВА

М.АхIмадов. Ихтилат.....	27
--------------------------	----

ПРОЗА

Гь.Гъзаев. Нитти-буттаясса къисса.....	32
С.ХIажиева. Башир Увайсов дакIнин утлай.....	49
Х.Илиясов. АьбдурахIим Дибировлушалсса ихтилат.....	51
Мамма Мамаевлушалсса ихтилат.....	53
Ссапар Аьлиевичлушалсса ихтилат.....	57
Къурбанабли МахIаммадовичлушалсса ихтилат.....	59
Мутаев МахIаммад Шамиловичлушалсса.....	62
Къурбан ДинмахIаммадовичлушалсса ихтилат.....	64
Жабраил Ххачилаевлушалсса ихтилат.....	72
С.Аьлимов. Ттун Гьумучиял Саэд ккавкссар.....	78

БУККУЛТРАЛ НАЗМУРДАВА

Аь.НякIучиев. Лакрал халкъуннаха.....	94
Н.ХIасанов. М. Буттаевлун; С. Аьбдуразаковлун.....	95

Регистрационный номер ПИ ТУ № 05 - 00360 от 12.12. 2016 г.
Выданный управлением Роскомнадзора по Республике Дагестан.

Новолуние №1

январь - февраль

На лакском языке

Выход в свет 12.03.2018 г.

Тираж 376 экз

Печать офсетная. Бумага офсетная

Формат 70x108 1/16

Усл.печ. л. 8,4. Усл. изд. л. 8,7

Заказ № 0209

Цена свободная.

Типография: Издательский дом "Дагестан"

Адрес типографии: 367018, РД, г. Махачкала, пр-т Насрутдинова, 61

Редакция и издатель: Государственное бюджетное учреждение Республики Дагестан

"Редакция республиканских литературных журналов

"Соколенок" и "Литературный Дагестан".

Адрес редакции и издателя: 367000, РД, г. Махачкала, ул. Даниялова, д. 55.

Поэзия

Жулва юбиляр

Мариям ИБРАГЪИМОВА
100 шин



МАРИЯМЛУЯССА МАХЪ

Мариям Ибрагъимова чумарт бивкун бур. ХIатта чиваркI кьабагъну бивкIсса заманнай, ганил имам Шамиллухлу чу гъз бувну бур. ХIайп гукунсса халкъ ялу-ялун чан хъанахъисса.



Сагид Абдулкъадирович Исмяилов,
Маденмрал академик

МАРИЯМ ИБРАГЪИМОВА ВА ГАНИЛ ЛУ

Мариям Ибрагъимовал «Имам Шамиль» тIисса лу чичаврийну цила укунмагу лахъсса кьимат хъиннува гъз бувссар. Ганил роман лащан бан бучIир Л.Н.Толстойлул «Дяъви ва дакъаврищал», цуппагу так Дагъусттаннал бакъача, Аьрасатналгу, щала Дунияллугу адабиятравун багъсса.

Имамнахлу бувккун, Сталиннуйн къарщи бавцIусса хъамитайпалун МахIачкъалалив гъайкаллагу дакъар, цавагу шагърулул кIичIираваллин ганил цIа дирзун дакъар. Ттул пикрилий ва иширал ялув бацIан аьркинни Дагъусттаннал хъуними.



ШахІбан Щайхович Оьмаров,
Дагъустаннал Жьаматийсса Даккаврил экс-депутат

ХІАКЪМУРДИ ЛИЧІАНТИССА

ДиркІссар Дагъустаннал тарихраву имам Шамил оькки уллалисса чІунгу. Щукру Аллагънайн, Перестройка хьувкун, ганая сивсуну гьалгъавагу тІун ихтияр дуллауна.

Амма имамнал цІа дурагу зумух ласун ихтияр дакъанийгу, ганал Кавказнал тархъаншиврухлусса талатаврия гяр-гяр тІий буслай бивкІссар Мариям Ибрагъимова.

Цавай бивкІссар къабагъну, гайми бивкІссар имамнал цІа мурдал дуллай, Багъировлул, Бериял, Сталиннул лажинтру лякъин.

Му жапасса чІумал Шамиллухлу бувккун тІийри жунма Мариям хьиннува бусравсса. Ганил хІарачат бувссар имамнал марцісса цІа дуруччин.



Муртазали-хІажи Къарачаев,
имам Шяпинал цІанийсса Исламрал Университетрал ректор



Абдулмажид МАХРАМОВ,
Аьрасатнал Госдумалул депутат

МАРИЯМ ХЪХЪИЧІУНССА ЧІЧУ-ТАРИХЧИ БУР

Мариям Ибрагьимова бувссар 28 ноябрьданий 1918 шинал Дагьусттаннай. Ганил бутта Ибрагьим Ххутиясса Ибрагьим ивкІссар. НитгийхчІин тІурча Мариям Василия Иванович Пущиннул, декабристнал ва А.С.Пушкиннул лицейравасса дуснал арснал арснал душ бивкІссар.

ЛичІи-личІийсса шиннардий МахІачкьалалив ва Маскавлив бувкссар ганил луттирду: «Ттул ххуллу», «Накьич», «Шеърирду ва поэмарду», «Авчи Кереселидзе», «Ттурлу зунттая лирккунни» ва мукунма цаймигу.

1991 шинал ганища буюхьуссар «Советский писатель» тІисса издательстволий цилва «Имам Шамиль» тІисса роман итабакьин. Му роман чичин ганил хьунмасса захІмат бивхьуссар. Итакьабакьлайгу зувира шин хьуну диркІссар.

Имам Шамильлул цІа пуч-палачат дуллалисса заманнай чивчусса лури ва цуппагу. Му чивчуну тІий, ганийн цийнмагу репрессиярдал шавщи биявай ливчІссар.

НКВД -лийн цумарив ца «дуснал» баян бувну бивкІссар, гьай, Мариям Кавказнал дяввилиясса материал датІлацІ бур тІий.Ххишалдаран, ганичІа ялапар хьанай бивкІссар нину-ппу бири-бат бувну бивкІсса душ.

НКВД-лун га, халкьуннал душмантурал душ цичІава бивтсса, ХІукума-трайн кьарци бувкминнавасса цану чІалай бивкІссар. Га бивкІссар цачІу дуклакисса душ. МариямлучІа шаппа цІухла бивхьуссар. Имам Шамильлул чІумуйн багьлайсса тамансса документру лывхьссар.

Миккури гьанан диркІсса бакІрай гьарахьалтту. Га цукун-бунугу ххассал хьуссар. Ганин кумаг бувссар цамур ахІал дуклаки душнил, цил ппу НКВД-лул зузалану ивкІсса. Амма муния махь га НКВД-лул итталунгу, мукьулунгу багьссар.

Ганил виричув имам Шамиль, Сталин куна, цума угьан, акьин хьинав тІисса параноик (бакІрал аххана хьума) кьаивкІссарча, аслийсса Кавказнал миллатирттал тархьаншиврухсса талатавил бакІчи, яхІ, намус бусса, май-жаннугусса халкьуннал хьунама ивкІссар.



Маммаев МАММА

МАРИЯМ БУСЛАЙ БУР ТІАЙЛАССА ТАРИХ

Ххуйну кьини дутарча, нахлусса шану бияйсса кунма, халкъуннан мюнпатну бувтсса оьрмулун ахирданийгу паракьатсса бивклу нясив байссар. Гьарма ур дунияллий яла ляличима цува ххай, муниятну цува цайминнаяр ялтгусса ххай. Мияжаннугу, цайминнаяр хьинманал щияргу хьинну тарихрая бусайссар. Тгун тамансса итххяххсса инсантал оьрмулуну хуна бавкьссар. Амма Мариям миннаву ляличиссава бия. Ганил пагьму-гьунар личисса бия. Ганил творчество бучири Аьрасатнал Миллатирттал дянивсса политикалуну гьануну ласунгума. Жула аварасса, цалий кьадарцлусса члумал тгун ччива ттула оьрчлру ва оьрчлал оьрчлру Мариямлул аькьилсса луттирдал тарбия буну.

ХІакин, шаэр ва философ Мариям буслай бур Кавказнал ва Дагьусттаннал тІайласса тарих, цичІав кьютІ кьабуну, ялунгума кьютІмур аьч буну, щинчІав кьащи кьахьунну ва щийчІай аьйбюкьу кьабуну.

Бюхьай Мариям ва га кунмасса инсантурайн буну, чІявучиву инсаншиву чансса духьурчагу ххи хьун...

Энгельс ХІАЖИМУХІАММАДОВ



ДАКЪАВРИЙНССА ХХУЛЛУ

Чичу ва шаэр Мариям Ибрагьимовал щала творчество хас дурну дур цил-ва миллатрал тарихран ва га тарих чивчусса халкъуннан. Кавказ ва Аьрасат ганин цакуцну ххирану бивкІссар, гай тачІав личи кьабайсса бивкІссар. ХІакингу бухьукун, ганил цІими хьунну чивчуну бур Аьрасатнал ва Кавказнал талатавурттая, чІа тІий бивкІлун бур душманшиву ва энад бакьача, дакьаву ва маслихІат.

ЧІявусса луттирду чивчун бунугу, яла агьаммур ганил лу хьанай бур трилогия «Имам Шамиль». Ганил зана буну бур жунма «лабивтун» бивкІсса тІайласса тарих.

Хлакьину ччи-ччимур чин ихтиярду дуний, демократия дуний, ци бакъар тлайламур учин, «хантурал» лажин къалархъна. Улу, хлакьинугу ца-ца уккайча къуллугъчитурал хъхъичи лергъ тлун хладуресса.

Амма диркиссар цамур члунгу. Цаппара чичулт, тарихчитал ва политиктал, репрессиярдая ниъга бувсун, цалва тарих нач дакъа ухчин лавай клура баен буллай бивкиссар.

Репрессиярдал члумалсса зунттал хъамитайпалул ццах бакъашиву ккалли дан бучири виричувшиврун, цилва оърмулия ка ларсун, Кавказнал дяъвилул хлакьмунихлу жан харж дан хладуршиврин.

Шамиль ур ганил ккаккан увну тархъаншиврухлу талатисса зунттал халкъуннал аслийсса каялувчину. Имам Шамиль миллатру личи къабайсса ивкиссар, цанчирча, му шариаьтран къакъамулссар ишри.

Ганая наслулий лирчлмур – багъа бакъасса хазна жула Ватан цлакь хъуну ччиминнан.

Расул Хамзатовлул «Ттул Дагъусттан» тлисса луттирай бувцун буссар Абутгалиб Гапуровлул махъру: «Лавгмунин ина пистолет битарча, ганил вин ттуп битантиссар.»

Агана Шамиллул тлимур бувчлуну бивкиссания, ганал хъирив багъну къабивкиссания, дурмур политиктурал ххалуйх ларххун, гъанагъи дуллай къабивкиссания, къюкьин бувсса тарих хлакьину зана къабиклантиссия Чачаннавусса дяъвилйну, Буденновскалийсса ва Буйнакскалийсса трагедиярттайну. Аькылсса Шамиллул аманат бувссар: «Паракъатшиву ва талих так дакъавривури,»- куну.

Хладис ХАЖИЕВ,
Аьрасатнал Конституционный
судьрал судья



МАРИЯМ ЧИВЧУМУНИЙНУ БУВЧИАЙВА

Ибрагъимова Мариям жул кулпатрал дус бия. Кисловодскалий буний, ттул нину-ппу лап рязийну биклайва ганил, зунттал улклухсса ччаву ядурну, цуксса хъунмасса бухху-букку бухъурчагу, хъамал ххирашиврия, гай, нентабак тливтлуну, къамул баврия.

Мариям ттун ганил чивчумунийну бувчлайва. Цинявннан къулай бивзсса ганил роман «Имам Шамильгу» на бувккуссия. Хъуссара ганил шеърирдал ва поэмардал презентациялийгу. Муния махъ ттун Мариям Ибрагъимовна цлуницла клул хуна.

Ганичла шава хъутари, даин ганил дирхъусса суратирттайгу тамаша байссия. На ххари хъанан иклайссияв, гай ххал дуркун, ттула буттал аьрщарай укун гъунар бусса, дак тлайласса ва дак хъинсса инсантал буну тлий. Га ттуярва хъунмасса буну тлий, ттуща ганихъхъун тамансса булун ччисса суаллу къабуллуна ливчлунни. Хлайп, оърму зана битан къашайшиву, лавгсса замана кунма...

ОБМАР ХАЙЯМЛУН

Буллай бур цаннаву чанна марххала.
Ухху, Хайям, шавай, кьатIув циссара?
Жува жап тIитIинну, хIан кьааьркини,
На хIан кьахIачIара, вил иш личIийри.

Эшкьилия бакъар тяхъа щурищурду,
Ччаврияту бакъар щюлли хаварду.
Бюхъанссарив вища кIиен дуван цIу,
Вилах лерщун ларгесса ттул асардацIух?

Ттурищукурдал дунни чIунгу даххана,
ЧантI увку халкъуннал ди тIар чарххала.
Бюхттулсса хияллал хъун бунни мяълум,
Аьламравури тIар оьрмулуд мяъна!

Щялушиву чуннай гъанссар ялату,
Гъарца асрулувух хIала духъукун,
Буссара на ганил яни-канилу,
Цукун ххассал хъува иш буна мукун.

Буруккинттал бура на бакI кьус диртун,
ХIакъмунил чIугу бур утти бяличIлай.
Заманалул бургъил гъели тIинтталу
Иттал чани лавсун, цичIав кьачIалай.

ТIайлану бутанна оьрмулуд ххулли,
Мурдалтураятау архну бацIанна.
На бура зунттал души, чIава Мариям,
Ина ттун лахъхъин ба, аькьилсса Хайям!

* * *

Юсуп Хаппалаевлун

ХхюцIалла хIакъину там хъуну дур вин
Шаэрнан ттурищрагу, улу, ци ххайра,
ДакIнийн бювххюмурди абад личIайсса
Ца лахIза бунугу...цири ттурищра шин?

Бигъасса бакъая, уссай, вил ххулли
Лахъазан диртунни ххаллилну-ххуйну,

*НахIакъдан бакъая бувсса хIарачат,
Бивхъуна вил даврий Заннал барачат.*

*Бюхъай ларгсса чIумуй дакIмяшину икIан
Му дакIмяшишивугу ладитлай икIан,
Жагъилишиверуву бур къуцу ва къици
Агъилишиверув тIурча - оърмулуд кици.*

*ЧIу бюхттулну гъазба, халкъуннал илчий,
Вил чIу тикрал бача лагма барзунттал,
БювчIусса мукъурттил лах экъи бичи
Хансса хъяхъавуртту мадувара ккал!*

*Дитикъай сил ритан иттацIанттайхгу,
Къуру кIинтнил бивгъу бявкъусса ссихIлил,
Ритакъай, дус, ларай дургангу дурну,
Щялушин дакъасса чIатIаракI ччаврил!*

*ЖигдатIрурду ккалан маикIаванна,
Гъич вила дакIниву дяркъу дакъана,
БакI кIяла хъумагу жагъилнассарча,
Агана кIиллуд хъун бюхълай ухъурча!*

*ХхюцIала хIакъину там хъуну дур вин
Шаэрнан цирикъай ттурушрагума шин,
Иш чIумувур бусса, дус, кIулиша ина
Вил дакIний ливчIмурди оърмулуд мяъна!*

Оърус мазрая.

Таржума бувссар Хизри ИЛИЯСОВЛУЛ



Мирза ДАВЫДОВ,
Дагъусттаннал халкъуннал шаэр



ЛАКРАЛ АБЪЩАРАЛ ДАЗУЙ

Хас бувсар Гъарун Саздовлун

*Щахъардал къуманиву,
Лакрал аьрщарал дазуь
Ина ура авцуну,
Лакку чарийнгу увккун.
Чарах эьби нанисса
Хъун-неххал ххурххулува
Баллайнма бур вийн бивтсса
Чутул ккуллалул чукла.*

*Дарардавух, зунттавух
Лехлайнма бур та ххурхху,
Духъунссар вил леххаву
Чявхълул ттуруллал гургу.
Лакрал зунттуя дурцсса
Хяллул лахлунни кунна,
Ина щяв левкъсса чумал
Агьи увкуна лухчал.*

*Гъумучири душничан –
Вин буцай душ Аьччичан
Га угьлил чу леххайхту,
Бивтссия хъапул хлаллу.
Бивкулул сакаратрал
Клири ницл бивчу чумал,
Зумув щинал клунтл бутан
Чарав хъурдай къаучав?*

*Щархъая щархъайн агьи,
Щархъал бакIрах мяурду,
Цими зунттал щарацив
Къавкъунавав га хъхъуну?
Чутул ккулла вийн бивтсса
Цала дакIницлун шуну,
Цими ниттил дакIницла
Багъунававли бярчу?*

*Уттигу жагьилнува,
Кла лакрал къапулчла
Ина авцуну ура,
Миллатрал яхI буручлай.
Цукссава анаварсса
Аьрххилий най унугу,
Лаккучу чарах къагъай,
Вичла аглан къавхъуну.*

*Къурагъсса гъинттулгума
Чарийн увксса вил лагма,
ДакIнил хияллу кунма,
Уртту-тлутIал кавс бакъай.
Вил оьттул клунтIаяту
Хъунававли гай тлутIив?
Лаккуй инт хъяучайхту,
Хъяучайхха ятлуну.*

8.03.2006 ш.

РЯХЦАЛВА КІЯЛАСА КЪУРУКЪ

Расул Хамзатовлун

*Экъи най дур ратІру –
Шеърирдал ххару,
Къаламрал бурвав щаращи хъуну?
Хханссар гай къурукъру
Левххун нанисса,
КІия ссавнияту жуйнма оьвтІисса,
Хханссар ссурулккутри ттуришра ранг дусса
Щалла дунияллул лагма кавусса.*

*КІайннул чІурдавату бур личІи хъанай,
Гъалаксса даКІнива нанисса балай,
КІа балайлуву дур ниттил хІасратгу,
Гъарца цІусса кІюрххил дурсса дуаьгу.*

*Шяир ур дуручлай оьшивурттаца,
Ниттил оьрчІ укунна, щалла тІабиаьт,
Чансса бакъар мурчІулт, чани бунагу,
МурчІину аьрщарайх заназиссагу.*

*Шяир, ина ура къувтІину лавхъун,
ЦІаннай байча цуну ттун хатІа къахъун,
МурчІисса къарил ка ура дургъуну,
Чани бунал лаг чин къадуван цуну.*

*Агъ, цукун шай вища щалла дуниял
КъюкІлил хІужралуву дирхъуну занан?
Цал архІал аьтІисса азарунначІа
Ца лахІзалий вища цукун шай ацІан?*

*Муниятурив вил бакІ кІяла хъусса,
Шиннардил мугъалттул къюч къабивгъунма?
КІяла хъурчан хъувча марцІисса марххала
Бюхттулмур зунттуйри пар тІун бикІайсса.*

*Экъи най дур ратІру –
Шеърирдал ххару,
Жюржу тІутІи дурну
Къума дарарду.
Лахъ хъанай, арх буцлай някІсса хъхъиривах
РяхцІалва кІяласса къурукъ иминну,
Гъузуй бур шанмурицу къюкъя дархІуну,
КІайннул дянив бакъар бачІвасса кІану.*

*Арх буцлациссаксса кІайннул чІурдугу
Аьрщарайминнан бур баллай бюхттулну.*

ТТУРУЛЛУЛ ПАРЧА

АбутІалиб Гъануровлун

Бюхттулсса барзунттащал, панмалул ттуруллащал
Чумартсса миллатирттал даиман гъалгъа байний,
Хъячайсса кунна тІутІи кІюрххил зунзул чаннащал,
Ина ниттил увунна някІ ссавнийн ка дияйний.

Арснал оьнгъа баяврин буттал хъат утта ххаржан
ТтирирхІуну лялуха, вин цІакуну дуркънавав?
Ина увсса кынилул дайди хъу ххарисса дан,
Зюрнав-дачІулуд чІурдал къатта буцІин бувнавав?

Пурицирах щяивкІнийгу, дайнигу назму ляхъан,
Бухъурчан зюрнав чІарав чІакъачайва ина хъус.
Къусуя айивхъуну, саргъасру бувай хъувкун,
Шяравух цІа ларгуна хъинсса къалайчишиверий.

ЛирчІун дур мюрай лархъна буттал аьпалул ххаржан,
Ххаржанналухлу ина яла бувгъукун къалам,
Мунил бунни щавари ина къаччинал хъазам,
Мунил дурунни ххари инава ххиранал жан.

Зунттал чув цІив авцІуний, къяпа ттуруллайн щайссар,
Зунттал чув зунттайн лавхъний, ка цІурттачІан дияйссар,
Дирунни вил назмурдал хъару лахъмий цІурттачІан,
КІяла хъусса чІиригу – мугу ттуруллал парчар.

АЪЛАМРАВУНССА ССАПАР

Муса Маннаровлун

ЛухІи-цІансса бурангу
Тий-шийнмай бищун бувну,
ЛухІи-цІан аьламравун
Гъаз хъунни ца лаккучу.

Царава биза бувну,
Царал буракъ ссур хъунни,
Цакъну къама бувгъуну,
Къучагъ левххун авчунни.

Лухччинува къявхъ кусса
Зунттал щарацци кунма,
Садаправа лирчусса
Пперх тІи ттеркъукъи кунна,

Чивисса миллатрава
Ливчунни ца пагъламан,
ЛухІи-цІансса аьламрай
ЦІурттину чанна лахъан.

Уруглай урав, Мусай,
Мия ссавдакъулува,
МахІаммад-Идавс куна
Ссавруннал дагъанттува?

ТтирихІлай урав къурхъру
Аьламрал лухІи-цІаннал?
Мийгу буригъай мулкру
Къараллу лагмавацца?

Аьламрал аьри-курушлвух
Ина бавхусса ссапар,
Вил аьзизсса ниттингу
Таллагь, бигьану бакъар.

Вас-ццахлий ура нагу
Ацлан клану кьаляхълай,
Аьламрал лухи-цлангу
ДакИнийх дур кай-кай хъанай.

Муртазааьлил турлийн
Къажарнал Шагьнал кунна,

Икрам буллали дунни
Ссав вила кьучагъшиверийн.

КIа цIурттал аьламравун
Гьаз бунни вила миллат,
Аьрицарайгу пперхя тIун
Ми чаннами цIурттину.

Шадлугърай бур Дагъусттан
Гьан дуллаи вин савлугъру,
Занахъу ина жучIан
Жипру цIурттал дуриIуну.

МахIачкъала, 1989 шин.

ССАВНИЛ ПАГЪЛАМАН

АхIмад-Хан Султаннун

Ссавнил кьуппалувун ина гьаз хьувкун,
Зурзу тIун бикIайва Берлиннал аьрал,
Вил чаннаннил барзул биза бувукун,
Къупар дайва кIия лухи душманнал.

Шярлултравун ххяххсса бакIхъахъу кунма,
Юнкерсру гьарзанийн ина ххяххайвав,
Аццул кьулкри кунна навтливун щусса,
ЦIарал кьувтIив хьуну дагъну лагайва.

Ва чулуха увххун, тиха личавай,
Та чулуха увххун, шиха уккавай,
Лажу-лажиндарайн данди ацIавай,
Мистер Шмитирттал хъару кьатI дайва.

Акъассия ЦIувкIрав кIюласса хьхьуттай
КъавтIий, кьутри дичлан кьакIулсса инсан,
Ссавруннал пагъламан, вил мусил цIурттай
Чалай дур хIикматсса чувшиверул лишан.

Аьрицарай оьру чай Муртаза-Аьли,
Ссавнил лачиндалий АхIмад-Хан Султан,
Агь, зун хIалал шивуй зунттал уртту-цин,
Ссавруннайн гьаз бувсса аьзиз Дагъусттан.

Дунугу хьхьу-кьини гьарал пурхха тIий,
ТутIив кьаххяххайссар цюлли щамарай,
Баргъ ва барз бусаксса ссавний пперхя тIий
Зун бивкIу бакъассар буттал аьрицарай.

МахIачкъала, март, 1995 ш.

БАРТ ЛАВГССА УМУД

АхІмад Къадировлун

*Миллатирттал дянивух
АхІмадлул бивхъу ламу,
Чаннаннил ттарџІру ришлай
Мюхчан бувунни арснал.*

*Шагърурдаву Грозный
Тти бур шагъ шагъру хъуну,
Халкъуннал оьттувату
Гъаз хъуну бур ва шагъру.*

*Бюхттулсса къатрал магъайх
Ххяхха баргъ экъи лагай,
Мусивун щусса кунма
Щалва шагъру бур чІалай.*

*КІяласса зурул чаннал
Щалва чанна лахъан бай,*

*Дагъантту кІичІирттавух
Нигъ дакъа бур халкъ занай.*

*АхІмадлул рухІ духъунссар
Алжаннуву рахІатну,
Буну тІий дузрайн буклай
Ча тІий ивкІсса мурадру.*

*Цала миллат буручлай,
Язисса жан харж дурнал
ЦІа абад дувайхъурча
Чичлай мусил буквардай.
Мукъавату, оьттува
Ххяххсса Грозна шагъруй,
Дизавияв на вин цІа
АхІмад-къала увкуну!*

ВИРИЧУНАЛ ЦІА

*Совет Союзрал виричу –
разведчик Якъуб Сулаймановлун*

*Зунзул чаннал пардав цІан лаган дурну
Душмантал ххяхххукун буттал аьрицарайн,
Язид ник рищун ан тавбагу дурну,
Чаважагъил, ина лавгунав аьрайн.*

*Ккуллардал чявхълувух цІарал ххуллурдайх
Най ияв бивкІулул иттав уруглай,
Оьттул гъулувтусса щалва аьрасат
Зунттал лачин ина бивтуна ххярклий.*

*Ссюрхъру оьттул наннин къукъу каруннай
Дякъил замгъардавух хъхъунил цІаннаву,
Ачайвав душманнал хъхъуцантту ппир дан
Ясустурал ялун ххяхлай асланну.*

*Та виричувшиврл сагъсса бардултну
ЛирчІун дур вил чурххай щавурдал аьширу,
Занахъунав ина буттал шяравун
Виричувнал цІуку хъазамрай лавчІун.*

*Пухъруннал кИирисса оьттуй чивчусса
Лакку билаятрал тарихравугу,
Виричувсса вил ца чанна цIукуну
ЛичIантIиссар абад пперхя тIий яргну.*

ЖУЛА ЖАГЬИЛШИВУ

Мудунхьал Шагьимарданнун

*Ттул дус, асар кьархьурив
Вин жула ларгсса шинну?
Вил дакIнивун кьадурттив
Аьжаивсса кIушиву.*

*Та жагьилишиврул гьантри
Архсса чанна цIупттину,
Пирузилул ранг ссавний
Пар-пар тIинма бур ттигу.*

*Кьадиртун жуцIарагу
Хьуннаршиврул лишанну,
Ларгунни анаварну
Ларсун жагьилишивугу.*

*КIай цIуртти дакIурдиву,
Ттул дус, кьалевицуссаксса,
Шаттирду кIу хьурчангу,
КьюкI тарга тIий дуссаксса.*

*Ларгнугу жагьилишиву
Цал бавсса балай кунма,
Хьисвагу хIайп кьачинну,
Мискин кьавхьунну жува.*

*Ва оьрмулухсса ччаву
Гьурттуссар вингу, ттунгу,
Циннасса узданишиву
Дуссархха ссутнивугу.*

ЧАННА ЛАРХЪССА ДАКИ

Хас бувссар Кьубиял Гьазин

*ЛархIусса магьулу ттарцIну бацIансса
ЧиваркI чIявунугу ва оьрмулуву,
Оьсса кьини дуркний чIарав ацIансса
Хьурдай чару чув ан чариятугу.*

*Ца чувнал чувшиврул щар бюхттул дувай,
Ца чIирисса щарнил лахъ бай миллатгу,
Лакку махIалданий кьалякьай луглай
Лак кьюкьин бувансса ца мащирагу.*

*Оьрму лахъи бивуй, Кьубиял Гьазий,
Лаккуйсса кIюрхнил кьанкь ришлай дур вицIа,
Ва оьсса оьрмулук хьиншиврул гьази,
Ина бусрав дунни вила щарнил цIа.*

*Чанна лархъсса дакIнил чаннасса асар,
Кьуманайх бачIара хьис мяш кьавхьуну.*

*Гъаривминнал чIарав гъалбарцIну ацIан
Анавар уккара, малаик хъуну.*

*Буруккин багънийгу, пашман къашара,
ПашманначIан увкIун, га ххари ара,
Хъинбалдараягу пахру къабара,
Чин хъинбала буван нанижат дара.*

*Ина щаращира зунттул чIанула
Мякънал мякъ лиххан бан ялун ливчусса,
Вил жюржулуву дур хъхъемал марцIшиву
Гъарца кIунтIливугу бур бургъил тIуркIу.*

МахIачкъала, март, 1995 ш.

ДАКIНИЛ ЧАНИ

Аьлиев Сапарбаглун

1

*ДакIний дурич, Сапарбаг,
Ссутнил лахъисса хъхъурду,
ХIакин Расуллул къатта
Чанна лахъан бай чIунну?*

*Та бия, уссу, жула
ЯтIул мусил замана,
Архмигу гъан бувайсса,
Багъу-бизу уздансса.*

*Роялданул пардарттай
КъавтIисса кIиссурттала
Экъи дачайва макъан –
Зунттал щаращал такъва.*

*Тти чIун дур цамур хъуну,
Жувагу цайми хъунну,
Тай алжаннул хъхъурдугу
Чуннив дур дакъа хъуну.*

*Учайссия балайрду,
Байссия хъярч-махсартту,
Хъхъудядирзун дунугу,
КъакIулишайва ларгсса чIун.*

*КъакIула цIу замана
БивкIсса ваксса лавмартсса,
Уссурвалгу цаннан ца
Хъама битан бувайсса.*

2

*Чувнан чувшиву дуван
Канихъ тур аьркинссарив?
Турлил тия гъагъайсса
ДакIнил тишилл бакъарив?*

*Ккашилсса оьрчIал каний
ЧчатIул гурга диширчан,
Ттуришва барачатращал
Зана байссархха Заннал.*

*КутIасса ххуллу кунма
ДакIнил манзил кутIама,
ЧIатIисса мурадрачIан
Уцайссарив Аллагънал?*

*Вирдай лахIлай нанисса
Мискинчунал магъулу,
КIяла магъилул ттарцIну
Ина урахха хъуну.*

Вил иттавсса пишиву
ПперхятIи дакIнил чани:
Пикрилул узданишивур,
Тпабиаьтрал хIикматри.

Кьурттари карунниву
Барачат бур бивхьуну,
Закканаксса кьюкIливу
Дуният дур тIиртIуну.

Дард думи хьяхъи бован,
Хьяхъими кьавтIутIи бан,
Заэвнал чIарах ацIан
Аьркинссархха чувшиву.

Вил оьтту-ттурчIавугу
Хьуннар кьашай чувшиву,

Нитти-буттал дирхьуну
Иявав ляхъан увну?

ЛухIисса мугьалттувун
Бювкъун най бур замана,
ЩатIив жиндрал хьунугу
Бюкьлай бакъар хьинбала.

Буллай ияв хIарачат
ВитIянхъру кьянкъа хьуннин,
Утти мунил барачат
Азаруннан бивунни.

ЧIунгу вирхху гьаралли
Аьрцарайх лирхъун гьайсса,
Абадмагу инсанни
ЧIумуй аргь дизан дайсса.

Июль, 2007 ш.

ДАКIНИВАССА ЧIУ

Шалласуев Шалласун

1

Цайминнал балаллуйн
ТтиликI дутарча,
Ниттил ккуккулул накI
Ттун хIаран хьуннав.

АьтIиманал чIарах
Хьай увккун гьарчан,
Буттал буллусса ччатI
Загьруну хьуннав.

Ккашилминнайх кьисмат
КIи кьабачIларчан,

Улккул буллу неьмат
КьютIи чин кьахьуннав.

Ххирасса жьаматрайн,
Ттула миллатрайн,
Лявхъусса аьрцарайн –
Дагьусттан улклуйн
Хаиншиву дарча
ХатIалийрагу,
Гьав нясив кьахьуннав
Буттал аьрцарай.

25.12.2016 ш.

2

Вава авторнал «Язими» тIисса
луттирайсса автограф

Зунттал чувнал чувшиву
Машан ласун кьашайссар,
Му нитти-буттал рухIри
Арнаву загьир хьусса.

Ттул дус, вил инсанишиврул
Кьимат бищун кьахьунссар,

Миллат ххирасса чувнан
ТачIав бивкIу бакъассар.

Вил яхIгу, кьириятгу
Дуссар вил авладраву,
Зунттал уртту-тIутIаву
ЛирчIессар вил иминшиву!

ХЪИИШИВРУЛ ИЛЧИ

Даххаева Аминатлун

*АрулцАаллий ххюра шин хьунни куну,
Пашман махъанарда, лавгссар тИий оърму.
Вил хъхьичI ттигу буссар битансса ххуллу,
Дахъва дянивтура бусса баџууну.*

*Цикссагу, цикссагу интгу дучIанссар,
Мусил ссутнил гьухъри ина тIатIанссар.
Ххираминнал дянив лавсун буссаксса,
Лерххун нани шинну ахттар къашайссар.*

*ЩихъчIав маучара, хьунмав хьуссара,
Шиннардил бакъари оърму буцайсса.
АрулцАаллий ххюра – мигу шиннуриџ?
Дахъвархха ках кусса вил чIантIайх ссутнил.*

*Хирульэн хханссара, ссавния ливксса,
Аьрицарайх хъиншиву дачIлай нанисса.
Вил тIиртIусса дакIнил майдансса ардай
Къурнил тIутIал къупру ссуттилгу хъячай.*

*Ина щаращира, зунттула бувксса,
Жюржу тИий урттувух эъи нанисса.
ШанбачIулий Заннал бувгъусса мурхъра,
Увхсса ххуллуссаннан ххют дуллалисса.*

*Ина мюри гъаралла, ссавнил гъан дурсса,
Хъахъи лавг бизанттал оърму цIу байсса.
ЦIуртти лагма лавгсса цIубарз укунма,
Пперха тIутIу вила оърчIал дяниву.*

Апрель, 2012 ш.

ЧУИ УВХХУИ УРА

Илчи Рамазаннул аьпалун

*Ттул дус, акъассарав?
Чун увххун ура?
Ляхълай акъарахха
ЧIувагу бува,
Вил щарсса ккарккукун
ЛухIи гьухъуву,*

*Бувцуннихха оьттун
КъюкIлил туннурду.
Лажинни лавгссарав
Ахиратравун,
ТтикъатIинну лакъав*

Хъяйнмасса яру?
Махъва-махъсса шеъри
МикГлавчРив мурччай,
ДакИнил гъелишиву
Дуркссарив мурчайн?

Оърмулуксса ччаву
ЛирчИнугу сагъну,
Вил мусил хияллу
ЛивчИунни кьютИну,
Ссавнияту бувцсса
Чанна цIукуну
Левцуну лавгуна
Цал пперхгу куну.

Махъра-махъ дургъусса
Вил ка цIунилгу

Ттула канивура
ЧIалай дур ттигу.
Та гъелишивугу
Дассан дурари,
Вил мурччайсса пишгу
Лецан бувари.

Вил цIа дакИнин дагъний
ДакI аьтIун дикIай,
Жагъилнийсса гъантри
ХъхъичI бацIлан бикIай.
Ва къагъсса аьрцарайх
На ура занай,
Вих луглай, къаляхълай,
«Илчи» Рамазан!

Октябрь, 2016 ш.

ДУСНАХЪ

Хъунайнал Аьлин

Баллай буриу, дус, вингу
Ссутнил хIукъулул цурцу?
Къаччивавла цал ттигу
Лахъан ВацIилу зунтту?

Ца-ца тIий, жуятува
Лаглай бур мусил гъантри,
Зизлан бикIайсса кунма
Хъахъи лавг-лавгми чIапIив.

Та-бунугу багъанссар
Махъва-махъмур чIапIигу,
Так сагънура личIанссар
СагъминначIа дусшиву.

Дус дуснайн хаин хъурча
ДакI гъюжу дурккун лагай,
Парандарал ппив бувсса
ВацIлул хъунма мурхъ кунма.

Гъарца кьинисса хъатIи
Бакъари ва оърмугу,
Дусшиврийн кьини дуркний
ТтиликIгу къадутарду.

Лецаннин, махъва-махъсса
Тарг-гу куну, ва ттул дакI,
Ина личIан маара
На урчIамур ка дакъа.

Ссут дайдихълай дур куну,
Паимангу махъанарда,
ХъатIал зюннаврал гюргу
Ссуттиллича къур шайсса.

Бизанну кьиссулигу
Жагъилишив дакИнин дуртун,
Лахъанну цал уттигу
Ххира ВацIилу зунтту.

Ттул дус, къаларгссар лерицун
Та жула жагъилишиву,
Пперх-шерх тIий, цIаран лархъун
Дуссар жула оьрчIаву.

МахIачкъала, больница,
апрель 1985 ш.

АЧУ, ЧІАЯЩУН ГЪАННУЧА

*Ттула оърчІнийвасса дуснан
ЧІаяцатусса Аьлихъал Абакардун*

*ЗахІматсса шиннардий ниттил бувминнал,
Бивтсса ххуллул манзил дакІниву битай,
ОърчІний къянатишуву, ккаши ккавкминнан,
Заэвма, ккашилма хъама къаитай.*

*Аллагънал цІимилул каши дуллуну,
Яла мий давраннал вив ласурчангу,
Ххуллийн багъсса лачІал чІивисса ккукку
Бусраврай гъаз бувай къарт хъуну махъгу.*

*Жувагу бияв та дяъвилул арсру,
Циксса къадурхІуссар ккашил къювурду?
Ниттихъал кІирисса мукъал вай кару
Цимил къашюриуссар хъувун лявкІуну?*

*Ялунссаннун бияв дардагъил бувну,
Пухъруннал кюрттая эяллу дурну.
Миллатрал дакІницІун тІайлагу бувну,
Щил бивтунававли аскисса ккулла?!*

*АьтІий дия тани аьрици-чарува,
Мукъал ратІру дия цархъавух дурккун,
Уттигу та дяъви къуртал хъун бувар,
Ниттихъал дакІругу ччучлай дур мукъал...*

*ДакІурдийх карусса дардирдал ссинжир
Чуллай дур. ЛичІанссар халкъ ссихІ бухлавгун,
ДухІан шайссарив ва дуржагърал сиччин,
Ца гъантлийссавагу ччай бурхха яхъун.*

*Ачу, дус, ЧІаящун ссапар бахІинну,
Цинярда дардругу экъи дирчуну.
Къашайми хъин байсса Къаширалу-Зунттуу
Дуаь данну хъинмур бучІаннав, куну.*

*ЛачІун буккултъявхха жагъилний жува,
Хъун-Бярнил зуманив лачІун букканну,
ЛакІзалий зана дан оърчІишуву жула,
Ихухъал-Хъув бувххун, хъюру дуканну.*

*КІялахІилул ххютуй бигъагу лавгун,
Хъаса-мамарттуя хъамалу хъунну,
Зунттал кицилия нахІала банну,
ИтІул-Щарацул хъхъичІ никру рирщуну...*

*КІяла хъунни ццунсса кІизул хъюрухъру,
Жагылна дунугу вай жула дакІру,
Так чІумуца дакъар лиххан дан хъуну
Та жула оърчІииврул шаттирдал аьшу...*

*Тани бархІ щун жува гъич къабавцІуру,
Канай къабивкІнугу чулу уттулу,
Амма ва оърмул кІибахІин бувну,
Бивхъунну бархІ лувну, ччан бахчин бувну.*

Декабрь, 1997 ш.

БУЛБУЛ

Мариян Дандамаевал аьпалун

*Балай тІий бунува булбул багъраву,
Бивтунни, бувтунни ца иман дакъул.
БяливчІссар ца оърму интнил чагъраву –
Къабувунни рахІму чІутІул ссачмалул.*

*Ганил балай кувкун, урттул ва тІутІал,
Парх битайва чІапІив, гъаз дайва бакІру,
Ганил чІу бавукун, зунттал аьтарттал,
Лагъ бувайва ххурхху, куртІний пахъ багъну.*

*Га чІуних вичІилий ПпабакІул хъачІрай
БацІайва бахълаган нанисса баргъгу,
Га чІуних вичІилий Къимизул бакІрай
Аглан шайва ххивну нанисса авгу.*

*Бюхттулсса, ттюнгъасса балайлул щатІай
АьтІисса чІивитІу шанул ласайва.
Арсру аьрай ливчІсса ниттил хъазамрай
Къурнил тІутІал кацІну балай ликкайва.*

*Бивтунни балайлийн някІ чІутІул ккулла,
Къабагъунни абад шадсса чагъана.
БакІру къус диртунни урттул ва тІутІал,
Зума тІисса хханссар зунттал аьтара.*

Дягъуй буривавли ссавнийсса цѳуртти,
Хъювхъу тѳий лачѳлай дур дяркъусса гъарал,
Урттул чѳапѳай цѳай тѳий, ккиз лавгсса ккузри
Хханссар бивчѳайнисса булбулданул макъ.

Душманнайн бакъаяв ккулла битайсса,
Щингъя булбулданул оъшиву дурсса?
Халкъ, циванни зуца ядан къашайсса
Хикмат, тѳабиаѳтрал зунна дуллусса?!

Чув диявав ттурлу: къув-аѳс ва гъарал
Ишан ласласийни яру мурчѳи бан.
Чув биявав баргъгу: жан дуллалини,
Ттурлугу лагъ дурну, щинал кѳунтѳ бутан.

Бивтунни, дагъунни булбуллул хъару,
Хъару дакъа булбул ххяллайх бур бишлай,
Ххяллу ва зунттурду зурзутѳи буллай,
Ардайх ва майданнайх балай бур лехлай.

30.1.1975 ш. Махѳачкъала

ЩАРАЦИ

Мариям Ибрагъимован

Кѳинттул микѳ къалачѳара,
Гъинттулгу къакъакъара,
Къабагъсса къунттулату
На ттула жан тѳитѳара.

Халкъуннал дакѳурдива
Бишлашисса щараѳи,
Вин имандалий буру
Хъунасса имам Шамиль!

Щюллисса уртту-тѳутѳан
На дюхлу пишкаш дара,
Кѳюрххил риртесса хъхъемаяр
Навагу дакѳмарѳѳссара.

Барчаллагъ хъуннавча вин,
Ххуѳири душ Мариям,
Вил лу Имамнаясса
Бур Кавсар булакърал щин!





Мазяйхъал КАЗБЕК

ХХЯЧАРАЧЕЛМУ

Ришлай ччергъилугу,
ХхячарачЕлму;
Бия ххябуккавай,
ЧЯруну дардру!

Цуппалу щябивкІун
ХхячарачЕлму;
Агъ, балай тІий бия,
Ришлай ччергъилу:

«Челму бакъа буна
ЧІалай чЕлмуну;
Вай лакрал ттуйн учай
ХхячарачЕлму!»

Гай оъруснал халкърив
Хъунни баиттанма!
Ца леххайсса кІуллун
На ккалли бара!

Челмуриив, кІулуриив
КІул бан къабюхълай;
Ур инсан аькълсса
Аьйкъуну занай!

Ци чирчагу ттуйнма
Ас бусса бура!
Къадарну ачайма
Къамул къаара!»

2013

КЪУНДУЗ ВА ДУНГЪУЗ

БувкІуна вацІлува
Шяравун Къундуз!
Ххал къирагърай хъуна
Ганин ца Дунгъуз!

Ца тяту къяркъарал,
Агъ, бизлай тІааьн.
Бухлай бия Дунгъуз,
Агъ, гай ччюрклевун!

ДуриІуну къяркъарал
Га щалла сичча;
Бия къагъанмуних
Га Дунгъуз гичча!

Агъ, чІалай чапалну
Дунгъузрал даву;
Га Къундуз уздансса –
Сситтуй оьккину!

Къундузлул вев куна
Дунгъузрайн микку:
«Дара ина, Дунгъуз,
Даву чапурну!»

ТачІав къяркъарава
КъакІулну буклан;
Ца хъинну вин кІулли
Ми ччюрклил буцІлан!

Къундуз Дунгъузраха
Чалай лавхъхъуну;
Дунгъуз бикІайссияв
Ххай марцІсса хъинну!

Бур бивкІун циявхъур
Дунгъуз ца ччюркку;
Къяркъи лап ххирасса,
Валлагъий, хъинну!

Дунгъуз, нара Къундуз
Ччисса марцІшиву!
На чурх шюшаймурда
Мудан щинаву!

Агъ, лащин Къундузрал
Дакъа дурагу;
Ина бура Дунгъуз
Мурдалсса хъинну!»

Бихълай хъяхъаврихун
Къундузрал махъру;
Къаданнав Дунгъузрал
Микку хъяхъаву:

Вил чапурсса бур жинс
Аскисса Къундуз!
Махъру къурумсагънал
Бур, валлагъ, зумув!

2017

ДАКІ ХЪИНССА ЛУХІИ ХЪАТІУ

Агъ, хъатІугу бикІай,
ЛухІихъатІугу.
Бай ккалли балардал
Гай илчиталну.

Щаллусса аькълудул
Бур гай лелуххант.
Зумух махъру ласлай,
Гай шай саламат!

«На бити!» – учайссар
ХъатІул тІааьнну.
Тарбия шай хъатІри
Хъинну аькъилну.

Бия цавайнначІа,
Агъ, лухІихъатІу;
Ккаччищал, ччитущал,
Агъ, ца къатлуву!

Бур дакІ хъинну хъинсса,
Валлагъ, гай оьрус;
Къатраву ккаччивгу
Ябай буну ас!

Дия чІанкъатлуву
Нисирал вяртІа.
Нисирая гайннул
Байва мадара.

Га ккаччи ва ччиту, –
Агъ, къаканай нис.

Дукан лухІихъатІул
Къабайва ламус.

Жу га лухІихъатІул
Бувнав махІаттал!
Къаласуннав ганил
Касак нисирал!

КкаччиІан лавгуна,
Валлагъ, нис ларсун!
Гъан къеппигу бувна –
Ганил нис ласун!

Ларсуна нис ккаччил
ЛухІихъатІуца!
Микку лухІихъатІу
Ца ххари хъуна!

Лавгуна ччитучІан
КІилчин нис ларсун!
Ччитулгу куна хъап
Хъинну нисирайн!

Буччин, валлагъ, бувну
Ккаччи ва ччиту;
Дурна лухІихъатІул
Даву дучІину!

Лап дусса духІин бур
Га лухІихъатІу!
БучІия хъатІай га
Ца тямадану!



Бахтгун ГЪАЗИЕВА

АГЪ ДУНИЯЛ!

*На вайлул хьуну лавгра
Аьзиз буттал шярава,
Кулпат бубан, хьус лякьин,
Къатлул маэшат гьаз бан.*

*Занай ивкIра шагьрурдайх,
Лайкьсса даву ххал дуллай,
Нугьайнал авлахьругу
Мадара къидир бубав.*

*На кунмасса пакьиртал
Ттун чIявусса ккавккуна,
Бувку ччатIух зузи бан,
Буржуйтуран ччай бия.*

*Ца даву дулул ттууцал
Къянкъасса къутIи дурна:
Ца шинай ххуйну зурчан,
Багьлул рязи уванна...*

*Къалавгра игьалаган
Гъинттул аьзиз ниттичIан,
Арцул жипгу дуриIуну,
Зана хьунсса пикрилий.*

*Къуртал хьуна икьралгу
Ца шинай жура дурсса,
Ккуркки ларгуна шингу
Хьхьу-къини зун икIайсса.*

*Ура ххарил ивчIавай,
Ниттил дакI ххари дубан,*

*Ца хьунмасса арцул кацI
Ганил карав бишин ччай.*

*Га аваданчу тIурчан
ХIиллардахун агьуна,
Ца-ца багьана буллай,
ХьхьичIа лихьлан ивкIуна.*

*Ахиргу цяивкIуна
Дулунсса арцу ккалай:
«Вайксса токрах ччурччунни,
Вайксса газрах дагьлай дур,
Вайкссагу къатлух най дур,
Вайкссагу дуканмуних.
Вингу вайксса личIлай дур».*

*Буллуна ттун багьагу
Анжагь шавайн иянсса,
Ниттихь ця чинтIисса
Ча занай ивкIра кукун?*

*Агь, дуниял, дуниял,
Ссайн дурккун дура ина,
Буржуйтал чIяву хьуну,
Мискинтал гьарза хьунни.*

*Агь, заманай, заманай,
Загьрурал пурха тIисса,
Таракьай буккантIисса
Вай зулмурдал ххяппула?!*

ИНА ДАКІНИН БАГЪУКУН

*Ина дакІнин багъукун,
ДакІнияту майдан шай,
Нажагъ чІарав биярча,
Дуниял хъама дитай.*

*Ина цу бавал душира
Ттул дакІниці кюру бувсса,
Цавагу душнихагу
Лавхъхъусса бакъарахха.*

ЛАККУ МАЗ

*Ттун ччива лакку маз хъама къабивтун,
Ттула оърчІал оърчІан пасихІну кІулу,
Ччива чІахху оърчІру гъалгъа тІий къатІув
НахІусса, кІукІусса лакку такъвалий.*

*Циванну, ххирахъул, къухъна бацІлайсса,
Цанни зун къакІулсса жула ниттил маз?
Цуйри тахсир хъусса зун маз къалахъхъин,
Мюрцину бунува маз къакІулли тІун?*

*«Бивзрув, бавал!» – кувкун на лакку мазрай,
Цанни чин къашайсса: «Бивзрав инагу»?
Цанни зу тІутІусса: «Здрастуй, бавай!»
Муксса къадарссарив лакку маз бусса?*

*На бура аьй дуллай миннал ниттихъай,
Къабарчаллагъ хъуннав миннал ппухъруннан,
Оърмул оърмулухун ххирану бивкІсса,
Ниттил маз – лакку маз къюкъин буллайсса.*

БУТТАЛ УЛЧА

*Агъ, даралул ххуйшиву
ТІутІавун дахъ лагаву,
Вай зунттал илкинишиву
Кисаран урттун тавтсса.*

*Вил къума ратІал щинал
Жюржулул тІааьнишиву,
Зумардайх ххярхсса тІутІал
Къункъалгу нахІушиву.*

*Зунттул чІанула ливчу
Щарацулгу бюхъаву,*

*Макънияргу ливцІусса
Ссав циву чІалачІусса.*

*Ва алжангу къабивтун,
Чунъявав жува лавгсса?
Ттул аьзиз буттал улчай,
БивкІсса ина чІюлусса.*

*Вана тти зана хъуну,
На вил аьзизишивручІан,
Вил хъхъичІ никирттайн багъну,
Тти бура икрам буллай.*

Усурвалсса литературалува



МахАаммад АХИМАДОВ,
Дагъусттаннал халкъуннал шаэр

ИХТИЛАТ

– Чунна, зунттал ратI, ина
Анаварсса буцилий?
– На хъхъиричIан най дура
Зана къахъун къасттирай.

– Чун най ура, зунттал чув,
Къабивтун вай зунтурду?
– Най ура на хъхъиричIан,
Ххал дан ччай зунттал ратIру.

КИЯЛАСА ЭЛЕГИЯ

Хъинну някIсса бяруву,
Агъ, бур гъузуй урттил къаз.
Лелуххул караматсса
Бур гъаз буллай ттубу хIаз.

Буттал кIанттул урттил къаз –
ЛухIисса бярув гъузуй.
Бур аьзаврай урттил къаз,
Махъ цуппа буллай къаччай.

Га лелуххи ттун ччай бур,
Валлагъ, биллагъ, ххассал бан!

Дагъсса ххют лелуххуя
Къабюхъай дугъан.
Га махърив аьркинсса
Шай захIмат лякъин.

Агъ, лелуххант бикIича
Лехлай хъинну ххарину...
Ца хъис нарив къаувчIлай
Буссар ттул Буттал кIану.

Ура нарив увгъуну
БувчIин къашай балардал!

Буттал шяравалугу
Ттуя архну дур цIана!..
Ттун бюхъай хъхъунил чIумал
БувчIин, валлагъ, цимурца.

Ххал хъунссар буттал къатта,
Буттал буттахъал мина;
Бан някI га лухIисса бяру
Цукунникъай бюхъайсса?

* * *

Агъ, икIуча га ганин
Хъис къаувчIлай увагу.
Гъурбатрай мудан уна,
Ххирар ттун Буттал кIану.

Агъ, дикIуча лелуххул
Ттухъхъун ххют къадириллай...
ЛичIуча Буттал улча,
Лелуххи кунма, лехлай.

КУНЦА

Бакъахъунссар хъис бигъа,
Валлагъий, кунцѳуллунгу.
Уцу-цулгъи, лелуххант
Бай кунцѳуллул арх хъинну!

Валлагъ, бур оьсса хъинну
Оббала ччисса кунцѳа!
Цийва ччан бивзма ганил
Ай, валлагъ, жандалуцѳа!

Аммарив тачѳав кунцѳа,
Валлагъ, къашай хъис пашман.
Рухѳ думур га кунцѳуллул
Ххирар, валлагъий, дюкълан!

Агъ, хъхъунил чѳумал цѳаннай –
Кунцѳа Заннайн лабизлай;
Ца ратѳ дан кунцѳуллуя
Къаччай Кѳа Заллив икѳай!

ШАЙССАНИЯКЪАЙ ТТУЦА!

Шайссаниякъай ттуца
Чантѳ чин бан Буттал улча;
Яла вай зунтурдугу
Чантѳ чин бан, бувну барча;

Чурду тти пандурданул
Бур баллай чѳиви-чѳиви.

Чантѳ му чѳумал чинссия
Ттуву абадсса ччаву;
Хъунссия лапва аьзиз
Ттула Буттал улчагу.

Архсса миллатирттал маз
Бунуккар тти хъанай гъан.
Балай транзистордал
Тти шай бучѳи ххира хъун.

Чантѳ цѳуницѳа чинссия
Ттуву буттахъал тарих;
Цаный га Буттал кѳанттул
Талайнма бивкѳсса турлих!

Къужери ккурчѳа-чѳирахун,
Агъ, къабатѳай тти сайки.
Дурмур жула буттахъал
Къадуллай буру салкъи.

Кѳялазурттай хѳатталлив –
Аьрабрай дурсса чичру...
Гай дур, агъ, буслай жухъра,
Жува буру тѳий чийву.
Дахѳаву буттахъацал
Дикѳуча личѳлай чѳири;

Бур ца пикри дакѳниву,
Ташвиш уллай на мудан;
Буруччин га цала яхѳ
Буржрихха тѳий миллатрал!

Гъич, валлагъий, ттун къачча
лирчѳун ва дакѳятинну!
Бур ччай ттун миллатрал яхѳ
Мудан ливчѳун ятинну!

* * *

Агъ, щинни аьркинсса
Ва жула ххуллу?
Бакъар чани хъисгу,
Дур так эяллу!

Къадарсса къадаргу
Бухѳлай ца хъинну;
Бутлай бур гай оьрму
Дакъа ца ссихѳгу!

Агъ, бан улча къюкъин
Шайма цумари?
Гъаттарайн бувксса халкъ,
Аман, циванни?

Агъ, увну къюкъингу
Лап аски увма;
Ччай буриг вин хъинну
Бала бухѳлайнма?

* * *

*Билаят бувгуну
Абадлий цаннал;
Хханссар тархъанишву
Дурксса дуснакърайн.*

*Билаятрал рухгу,
Агъ, дур оьттүву...
Бакъар билаятгу,
Къадучай интгу.*

* * *

*Къабюхъайсса бувчин,
Агъ, бур ва улча.
Бур, валлагъ, бакъасса
Ва хъисгу барча.*

*Бур малаикталгу
Киямур чулух.*

*Щяйтлантрал даккаву
Дур урча чулух.*

*Дязаннаву гайннал
Уссара нагу.
Акъахъунссар чара
Рязину Залгу.*

ХЪАМА БИВТССА ШАЭРТАЛ

*Агъ, гай кIусса, битавсса
Луттирду хъунни куклу.
Шаэтурал чивчумур
Хъусса хханссар шяршаллу.*

*Агъ, ккавкссар ттун шаэртал –
Хъисвагу бюхъу бакъулт;
БикIай нан бакIъялавай
Гай бакIракъутри дувулт.*

*Агъ, шаэтурал дурмур,
Валлагъ, ларгунни ратIух.
Гъавас шеърирдавусса
Тти хъунни, валлагъ, ца пух.*

*Тти пашман хъанай бурув –
Хъама бивтун тIий зува?
Бунну личин тIайлану
Тти, шаэртал, зу чийва!*

*Ваца хIавтIливу кунна
Дур дяркъу шеърирдаву.
Лагъарт кунна, кувку тIий
Дур хIарпру чичрурдаву.*

*Зул битавсса луттирду,
Валлагъий, хъуну куклу;
Зул ххаллилсса шеърирдайн,
Утти бур чIатIи багъну.*

ТIИЙ УР ЛЕХХАВУ-ХХЯП СОВЕТРАЛ ШАЭР!

*Вав-шав, тти ци бави,
Тти чун ххяххава?
ЯхI вай ттул шеърирдал
Бувккунни ххяхха!*

*Увтунни муруллайх
Бакъа хъисгу ас!*

*Коммунизма жулла
ТIий дюхъ дакъуя;
Агъ, дунни нач дакъа
Га ххяхха-парча!*

*Лениннул баллу бакI,
Бувну гъагъари;
Жап жушчала буллан
Га къаивтмари!*

*Агъ, нацIлик ия тIий
Хъунасса Маркис;*

*Ччянива Астталин
Вайннал увна пуч!
Ганал дурмур ччуччин
Бувна кIири пач!*

*Астталиннухасса
Гай ттул шеърирду –
Гай тIар вайннал бия
Шярал хаварду!*

*Лахъ уллай хъиннува
Ленин – жула вождь;
Бакъайссия, валлагъ,
Ттула бусса гуж!*

*Тти тIар ия Ленин
Валлагъ, ца лянка;
Буккайсса ччи-ччиних
ЧIявукIул цулчIа!*

*«Бур чIу щялмахърайсса!» –
Куна хIакъмунил.
«ТIайламурда мудан!»
Куна щялмахърал.*

*ЧIюйдIуя Кремлилул
Мирхъ, валлагъ, багъунни щяв!
КъюкI-мурчIи хъусса хханссар,
Валлагъ, тти жула циняв.*

*Халкъуннацал властьрал
Бай яхъану ихтилат.
Хханссар жула агъали,
Валлагъий, бувсса пасат.*

*Пашман-загу шайривав
Ва жулла хIукуматгу?
КъацI бацIаву – мусири,
Мусил бухъунссар халкъгу.*

*Гъич баян га аьркинмур
КъадацIай ва хIукумат.*

*Агъ, экъи ливчуну
Ххаллилсса бархху;
Леххаву-ххяп ура
ТIий, валлагъ, нагу!*

*Бур щинчIав къабаллай
Тти шаэрнал чIу!
Бур багъну шеърирдайн
Тти чIявусса тIу!*

*Коммунизмалулъяв
На, валлагъ, пахру!
Тти чай ттул шеърирдайн
Агъ, дур ми пухру!*

* * *

*Га вокзаллай бикIу,
Авлахърай бикIу –
Бур тти гъарца кIанай
Щялмахъ лавайну!*

* * *

*Цимурца Кремлилул
Пасат дайсса дур аьдат.*

*Агъ, укунсса бухъунссар
Тти миллатрал колорит...
ЧIалай Заннал цимурца,
Оьккимур къабай пасат.*

*Нуххуву бакъар цIансса
Валлагъий, чIалай чани.
Бумагу хъинну чани
МурчIул ачин ай утти.*

*Буру тIийнма леххаву
Хъунасса жула Заннайн;
Ххаллилсса жула Ватан
Дуккан дува тIий чаннайн!*

КЪУЛЧИНМУР ВЕК

*Къулчинмур век, лажинни,
ХIалал ити, миннатри!
Хъинну ччай тIайлашиву,
ИкIайссияв къизгъинну!*

*Век къулчинмур, миннатри,
Ина ити на хIалал;
Шайвав так ца ина ххал
Ччапану бунагъирттал.*

Туллу къадарми ттулла
Къахъанай хIисаврагу;
Шайва ххал ттун так ца вий,
Къулчинмур век, бунагъру!

Век къуня цалчинмур
ДуркIссарив, мйяжаннура?
Балардал чIявушиврул
Хъунни бакI щала кIяла!

МИТИКЪУКЪУ

Бур гъарнан аьзизсса
Га митIикъукъу.
Га ккалли аькъылнан
Бай муданмагу.

«Ххирамур, учакъай,
Винна ца пIапIрус!
ТIий пIапIрус, агъ, шайссар
Валлагъ, хъинну хIаз!»

Бур захIмат ххирасса
Хъинну га щулгъи.
ЧIявусса щугълурду,
Агъ, га баймурди.

Агъ, бивзуна микку
МитIикъукъун сси!
Агъ, бия хъячавай
Ганил сситтучIи:

Бутайча, агъ, ганил
Ттувун пикрирду.
Щулгъилул щайтIансса
Ара махIрумгу.

«Урача учIисса,
Укъу ттул хъхъичIа!
Дан бити на даву,
Ахмачиларда!

Агъ, зисса бур зийнма
Га митIикъукъу.
Ххал га тачIав къашай
Бигъа лаглайгу.

ШапIрусгу заралсса
Инава тIутIу!
Къадайссар на даву
Багъанну тIувтIу!»

«Вин ччимур цирикъай,
Ил, митIикъукъуй?» –
Агъ, цIуххав на ганихъ,
Жаваб хъинну ччай.

Яру мазрая.
Таржума бувссар
Мазяйхъал Казбеклул.



Проза

Гъза ГЪЗАЕВ



НИТТИ-БУТТАЯССА КЪИССА

Ххутрал шяравусса хъунисса ва бусравсса кIива тухумрал оърчIгу, душгу куннан-ку нясив бувну, сакин хъуну бур ттул нитти-буттал кулпат. Гъзахъал тухумдалиясса ххоя арсгу, кIива душгу бусса Гъзал ва Марияннул чIивима арсан – Садикълун бувцуну бур Кушахъал Аьвдуссамадлул ва ПатIиматлул кIия арс ва шамма душ бусса кулпатравасса хъунма-хъунмур душ – Пирдавс.

Буттал буттан Гъзан ва буттал нину Марияннун цивппа сагъну бунува кьолтI учин багъну бур ацIния мяйра, кyunия арулла шиннардивусса арсру нязанный литIаврил оьсса кьурчIишивуртту ва мий ссавурданий кьамул дурну дур. Цува кьалайчину Севастополлай зий ивкIун ур ва цала тамансса хъу-лухчинулсса бан шавайгу учIайсса ивкIун ур. Зузисса кIанайгу, шяравугу хIурмат лавайну ивкIун ур. Ххутрал генерал Иса ПирмаIаммадовлул ппу Абакардул бусайва Севастополлай муксса лавайну ивкIессар Гъза, мунайн «Севастополлал паччахI» учайва тIий, ганал бусравшиврун хъунмасса кымат бишлай.

Ниттил ппу Аьвдуссамад кьассавчи ивкIун ур. Ваччи-ЧIяту ятту, ризкьи машан лавсун Гъумук, Ххутив кьассав байсса бивкIун бур ва хъу-лухчинулсса байсса бивкIун бур, ттуршуннийн дирсса найрдал хъурзилтту диркIун дур.

ДакIния кьадуккай, аьпа биву, ниттил нину, жу ганин аму-дада учайссия. Бияча ца караматсса, марцIсса алжаннул инсан.

Оьрмулул 16 шинаву цар буллусса, мяйра шинай оърчI кьабуллайгу бивкIун, увсса цила хъунмур душнил арс, на аму-дадан хъинну ххираяв. Ттула нину дикIайва ттул ппу, цила куяв, аму-дадан хъиннува ххирая тIий. Дяьви кьуртал хъуну махъсса тай шиннардий Аьрасатнаватугу, цайми-цайми кIанттурдаятугу дяьвилул кьатта-кьушру лиян бувсса, дан-дитан дакъа ливчIсса чIявусса агьлу жула зунттал шяраваллавун букIлай бивкIессар, букансса ччатIух луглай. Мукунсса тамансса инсантал аму-дадал, цаннийнма бувцуну, гьантта битайва, цичIара думур гайннан дулун мяш кьашайва. Гъай-гъай, гьарцаннал аму-дадахъулгу ххуйсса

бикІайхьунссар, амма ттунма ххан бикІай, ттулламур кунна, ляличІисса цайминналсса дакъахьунссия, тІий. Ганил бувсѣсса аькълу-кІулшилунсса, багъу-бизулунсса, тарбиялунсса чІявусса насихІатру дакІния къабуккай. Масала, учайва: «Ургу, ттул оьрчІ, уччиннин дукра дукаву заралссар, уттигу чансса дукан ччай унува, къаритан аьркинссар, мунияту чурххан хайр буссар, ягу, жунма яла аьркинмур ччатІри, мунил хІурмат хьунмасса бикІан аьркинссар, ссупралийн къатІ хьусса ччатІул мюршгума, бавтІун бувкуну хьинссар, вияра хьунаманал увкумур булува, щялмахъ бусаву – му хьинну къадарсса къелли ва мукунма цаймигу чІявусса насихІатру бусайва, къулгъу-алхІан лахъхьин бувна. Нагу аму-дада ххари ва рязи хьунмур байссия ва тачІав хъамагу къаритай. Ттулламур ниттиннив цилла нину, ттул аму-дада, аьзизшиврул дазу-зума дакъая.

МукІруссара на дунияллийн увксса гьарца инсаннан цалла нину хьинну ххирану дикІайшиву. Ххирану диркІссар цала нинухъру «Дуссар ва дуни-яллий жува мудангу буржлувнувацца ляличІисса рухІ дусса аьламат – му нинур» тІисса ххаллилсса мукъурттил авторнан Николай Островскийнгу, «Дуруччара нину» тІисса поэма чивчусса хьунасса шаэр Расул ХІамзатовлунгу, мудан ниттияту чичлайнмасса Фазу Аьлиевангу, цайми-цайми шаэртурангу. Цуксса ххирасса дакъахьунссия цалла нину дяъвиллийн лавгун чІярусса чувшивурттугу ккаккан дурну, ххувшавугу ларсун увкІсса, чІярусса орденнал ва медаллал кавалер, Ккуллал шяраватусса машгурсса шаэр, учитель ва журналист Аьбдул Мирзаевлул, ниттин хас бувну, вай шеърирду чивчусса:

*Ттул нину, на вичІан най,
Дуниял риртуссия,
ДунияллуцІух ларчІсса
ЦІугу лецан дурссия.*

*Азарила агънугу
Азарила ивзссияв,
Вихсса ччаврил азарда
Нину ххассал дурссия.*

*Ниттихъул мурадрайн биян банишиврул
Азарда къадагъа зия давияв.
Арснал цала ниттин байсса хьинбала
Цинявпа ниттихъан нагу бавияв.*

Вана Гьумучатусса машгурсса учитель, чІярусса шиннардий Цуссалаккуйсса, МахІачкъалаливсса школардал директорну ивкІсса Бюкъ-МахІаммад Рашкъуевлул цала ниттиха дурсса назмулувацца ца куплет:

*Ттул оьрмулул шеърій, мяьрипатрал жууж,
Жан къурван дарчангу, лахъан къашай бурж.
Ца вил цІанийнура на дунъяллийсса,
Ца вил яхІлийнура ччаннай авцІусса.*

АцІния ххюлчинмур ттуршукулий парснал ва таджикнал шаэр, философ-суфий АбдурахІман Джамил увкуну бур: «Цукунни ттун ттулла нину гъаххирану дикІан аьркинсса? Мунил на цимигу шиная цила хъазамраву чІувин увну, ххира уллайрахха ивкІсса. Цурда ахиратлувун гъаннин цила дакІнил ттюнгъашиврий ва рахІму-цимилий яувссарахха. Ниттил хІурмат къабаврияр къадарсса зад ттун цамур къакІулли. Багъдадуллал дуснакъравун авкъусса Иракънал имам Азамлул полициянал цайва буллалисса оьсса зулмурду, аьзав-аькъувартту духІлай, увкуну бур: «Я Аллагъ, вин леххаву тІий ура, ва цІанакул на ци тагъарданий уссарив кІул хъун мадара ттул ниттин. Агар кІулхъурча, га дирчІанссар, ттушарив къахъунссар ганил къюву-аьзият духІан». Укун имам Азам ур мяълумсса, балжисса мисалларайну жунма бувчІин булла ниттин цила оьрчІ цуксса ххирассарив ва жуннагу нину аьзизну дикІан аьркиншиву.

Ца чІумал Шамиллухъ цІувххуну бивкІун бур: «Ина мукун лахъсса даражалийн лахъаврил савав цери», – кунуча, ганал жаваб дуллуну дур: «На ниттиха хъуннасса аякъагу дайссия, хІурмат-иззатгу байссия, нину сагъну дуссаксса. Ттуяту хъинну рязину га даиман Аллагъу тааьланайн леххаву тІий, дуаьртту дулла дикІайва, я хъуннасса Аллагъ, ина лахъ ува ва ттул арс, ва цала дакІнил мурадлайн иян ува, тІий. Яла махъ ттун бувчІуна, мйжаннугу, ниттил леххаву, дуаь Аллагъу тааьланан бавшиву ва кІанал къамулгу дуршиву.

Жунма цинявнангу кІулну бикІан аьркинссар нахІуну, хІалимну нину ххира-ххуй дуллалаву, ниттил чулухунмай ччаву дуну, хІурматрай буруглаву, гъарзад ганин аьркинмур дузал дуллалаву дин-исламраву хъуннасса агъамшиву дусса, гъанусса ишну хъанахъишиву. Нину – му рахІму-цимикул шарашир. Так ссавурданулгу, хъиншиврулгу видурцусса, багъа бишун къашайсса ниттил къюкІлишари цила ттюнгъашиврийну, иминшиврийну ва ххира-ххуй бан кІулшиврийну бассан бан бюхъайсса къинибархан захІматсса даврий багъІатІ хъусса ласнал ссигу, цила оьрчІал таршиву ва хъеришивугу. Инсаннавусса яла ларайми хасиятру жувунна гужрайну къадакъайссарча, ниттил накІлилли хІасул хъун дайсса.

Дунияллийн увксса гъарцагу инсаннал, идавстурая байбивхъуну, (аьлайгъи ссалам) оьрму бутаврин аьркинмунилсса – дуки-хІачІиялулсса, лаххи-ликкиядулсса, оьрчІал тарбиялулсса нину булла дур. Къатлуву талихІ бусса оьрму ниттил симандалийсса пишлия байбихълай бур. ОьрчІал хъювсулшиву, пашманшиву духлагай ниттил янусса бургаврину, миннал бакІурдийх цила цимикул канил ках учаврину. Бюхъайссарив ниттихъал къюкІливусса оьрчІахсса ччаврил асардал дуцин дан? Шайссарив жушаву жула цІаний ниттихъал бувсса хІат-хІисав дакъасса захІматрахсса бурж гайннан лахъан? Я му дуцин дан, я ниттихъан бурж лахъан хъуссар, хъунссар тІимигу, гъай-гъай, къатІайлар.

Уттинин ялув чивчуну, ниттихъал чулухунай цума цагу цукун бикІан аьркинссарив бувсун махъ, ттуламур ниттияту, га цукунсса диркІссарив бусан багълай бур. На хъинну вихну ура гъарцагу инсаннал нину цала оьрчІан ххуйсса дикІайшиву, амма вамур чулухагу, дакІ дарцІуну ура га жула нину цинярда ниттихъавугу яла ляличІимур диркІссар, тІий. Ттула пикри хІакъсса бушивугу на тасттикъ булла ура немецнал хъуннасса шаэр, чичу, философ Вольфганг Гетел увкумур тІайлану чІалай. Ганал увкуну бур:

«Яла бюхттулмур нину буттал кІану бугъан бювхъумурди», – куну. Ганал тІийкун, жул ниттилгу бувгъуна кІия буттал бугъансса кІану. Жу мюрщину бунува, ппу ялату гъарчагу, ганил жун ятиншиву ккаккан къариртуна. Цила оърчІан бакъассагу, ганил хъунмасса кумаг бувна ппу ялув акъасса ссил мукъва оърчІангу, уссилминнангу.

ХъунмурчІинмур ихтилат шикку ниттияту бунугу, буттаятугу бусан багълай бур, цанчирча, ва лу ккалаккиминнан жула ппу Садикъгу цукунсса ивкІссарив кІул бан чай бур. Мийжаннугу, жул ниттил ва буттал ташу, оьруснал тІийкун, ссавруннай бувсса бия. Мий кІиягу куннан кув нясив баврия цивпагу даиман Аллагъу тааьланайн щукрулий бивкІун бур. Нину буслан дикІайва (кІинналагу аьпа баннавча), ппу дяввилийн гъаннин, цачІу оьрму бутлай ца лахъсса, кІусса чІу буттая бавну дакъара, тІий. Лап бавкъуну, кунная кув рязину оьрму бутлай бивкІшиву жяматрал агъулданунгу кІулну бивкІссар. Цайми-цайми чІявусса кулпатру кунма аьратталсса дяввилул лиян бувссар жулмур кулпатгу.

1935 шинал бутталгу, Увайсхъал Ахуннулгу сиптталийну зузи бувну бур Ххутив цайнува цивпа хъусса артистурал театр. Пьесардавусса хъуними роллугу дугъайсса диркІун дур жул буттал. Му театрданул хІадур бувсса пьесарду бивхъуну бур Ххутив бакъасса, Хъанаривгу, Ури-Мукъаривгу, Маркъавгу, Варайгу. Шяраваллал агъалиналгу мий хъинну ххарину къамул байсса бивкІун бур. Ккаккан бувсса пьесардан цІардугу вайри: «Оьмар ва Аьшиат», «Аршин мал алан», «Машади Ибад», «ХІажияв ва ХІабибат». Артисталну роллу дугълай бивкІун бур ттул ппу Садикъ, Кушахъал Рамазан, ванал щарсса Аминат, Ахунхъал Ахун, Аьлишахъал Бадруттин, ванал щарсса Камилат, Пахихъал Сулайман, Къарнихъал КъурамахІаммад, жагъилсса душру ТІюхчихъал Написат, ОьмариагІахъал Ххадижат, оьрчІру Шуаьйхъал Устгаз, Аьлибуттахъал АхІмад ва цаймигу.

Буттал хъинну ххуйсса такъвалий балай учайсса бивкІссар, мукуна мугу, Мусалавхъал Сайпулагъгу, аквар учин, мизитрал цІив лахъайсса бивкІун бур. Пахру-ххара бакъасса, мяърипат, духІин дусса, щин бунугу кумаг бан анавар уккайсса, яхІ-намус, инсаншиву дусса унутІий, жул ппу цинявннан ххирасса ивкІун ур. Хаснува буттал хІурмат байва чулахъминнан, инжитминнан. Ппу чІявуну жуннинма бувцуну учІайва мурчІисса хІапизтал (къурандалул лу дакІних кІулсса) ХІасанбаг ва Аьлил, мукуна сагъ чансса НасухІхъал ХІусайн. Мий дукан, хІачІангу бувну, тамансса хІаллай дин-исламрая, багъу-бизулия ихтилатгу бувну, лаххиликкулия ци дунугу дуллуну, тІайла буккайва. ХІасанбаглул гъарца мудан ттухъгу, ттул уссихъгу, ссихъгу цува ахиратлунун гъаннин (1980-ку шинал) уссил оьрчІру тІун икІайва.

1939-1940 шиннардий ппу колхозрал яттил удаманну зий ивкІссар. Та чІумал къутандалий, чІявусса ятту ливтІуну, ппу судрахун агъссар. Хъирив лаяву дурукун, кІул хъуссар колхозрал председателнаал амрулин бувну, ятту гъан бан къабучІисса кІанайн гъан бувну бивкІшиву удаманналгу, хІухчалтралгу тІутІимунихгу вичІи къадирхъуну. Мунияту, председатель тахсир увну, судрал ганан ца шиная хІукуматраха зун хІукму бувссар, амма га хІукмулий рязи къавхъуну, председателнаал Верхсудрайн кассациялийн бувтун, председателну зузисса Сулайманов МахІадлун 4 шин дуснакърал

кьуркьуссар, ппу тIурча цукунчIавсса аьй, тахсир къялявкьуну, марцI увссар.

1940 шинал ахирданий ппу хIалтIилухун Краснодардайн лавгссар, къялайчишиву дуллан. Буттан пикри бивкIссар 1941 шинал гъинттул жула шалва кулпат, Краснодардайн бувцуну, нагу шагърулийсса школалий дуклаки ан, амма му пикри дузрайн къябувкссар, дяъви байбивхьуну. Ппу цувагу, дяъви байбивхьуну, хъунма хIал къавхьуну, аьралуннавун гилава увцуссар. Фронтраятугу ца-кIива чагъар бакъа къябувкIун, цува кунасса цимивагу миллионнайсса аьскартурашал дяъвилул овькьссар. Мюрщисса жугу, яла аьркинсса чIумал ппугу ялату лавгун, ниттихун багъну ливчIссару, ниттилгу, ппу акъашиву жун кIул хъун къяиритун, жун бутташивугу, нинушивугу дурссар.

Ппу шавату хIалтIилухун, гиччагу дяъвилийн лавгун махъ, жул къатлул низамгу даххана хъуна. Нину, хъхъуния кьини дурну тIисса кунна, дяхтта колхозрал давурттай, ахттакьун бивзния махъгу, кIюрххицIуннайгу жула ризкьилулсса буллай, хъхъувайгу, хъхъудяризаннингу, ганияр махъгу фронтран – армеецтуран гъан дансса ппалул катIри, жуларду дуллай дикIайва. 9 шин хъусса нагу, 4 шин хъусса уссу Ширванигу, ниттил булла-лисса захIмат чIалай, ганил увкумур бан хIарачат байссия. Га чIумал жул ца шиннагу къярхъусса ссу Умукусунгу буссия. Нину буслан дикIайва цурда, 16 шинаву щар хъуну, мййра шин ларгун махъ, къяавай увсса ттул хъирив кIия арс ялагу увну, кIиягу, ца 3 шин хъуну, цагу 2 шин хъуну, я лавчIун, ливтIуна, тIий. Гужну къашай хъуну литIавайсса оьрчIал, цинна дуллусса дардисаншиву чIалай, цила ниттил, ттул аму-дадал, тамур къатлувунгу бувцуну, цув паракъат буллай, бакIрай бацIан буллай, увкуна тIар: «Ттул душ, ява ссавурдания бувккун, арсру къртал хъунни тIий аьтIий, вев-шев матIра, Аллагъу тааьланал мий, буллусса кунма, махъунмай лавсъссар, иншааллагъ уттигу булунтIиссар вин Аллагънал». Гъаксагу къумашиврл тиха зума дакъая, гукун эмаратру кунмасса, бювхъусса арсру ливтIусса ттун, амма ниттил тIимур бувну, дард, кърчIишиву ялун личин къадурну, вирдай кьютI увкуссия. Яла 1937-ку шинал Аллагънал уллуна Ширвани, шанна шинаватугу Умукусун. 1942 шинал февраль зуруй колхозрал правлениелул хIукмулийн бувну, шяравусса къатрайх бавчIуна интту колхозрал хъуруннай бугъансса лачIа, увацIа марцI бан. Жугу, оьрчIру, буру булувкьуну, лачIавату у бувчIлай. Му чIумал увкIунни жул ссурахъу ца, муси кунма, цIай-цIай тIисса чила лавсун. Къюркьу буллуну ура, га ци дурив ххал дан. Хъанай бакъар, нину жушчала у бувчIлай дуну. ЧIахху царсса дуркIун ганин аьркинмур дулун, нину цалчинмур зивулийсса къру къатлувун лагайхту, на ивзун, лахъурттул лувсса кършилива къяцIагу лавсун, чIавахъулттил улттуй мюрах бачIиннин бияннин ссаллив бувцIусса чила марцI буллай ура. Ттул куямур чулх уссу, вамур чулх ссурахъугу бавцIуну бур. Ттун ччай бия гания пар-пар тIисса карандаш бучIайсса зад дан. Га марцI дан хъанай дакъая. Яла на, ганил вив мяр бивхьуну, къяцIа ганийх бивщуссия. Яла цивхъуссияв къакIула. Къатта бутансса, хъинну гужлансса чIугу бувну, га пIякъ куну дия ттул каниву. Мукъра шинавусса уссугу, ттул лякьлуцIух цIу ларчIунни тIий, леххаву тIий ия, ссурахъун ци-чIавгу къавхьуну лавгун ия. Ттулгу куямур канил кIива кIисса багъну бия.

Та кьини жул кулпатрал ялун бивсса бала жу, кИягу уссу, аьпалухъхун къалавгун личIаврил савав жул аьзизсса ниттилгу, аму-дадалгу дуллай бивкIсса ва дуллалисса дуаьртту Аллагьу тааьланал къамул даву духъун-ссия. Та кьини жул къатлувун шалагу щарнил агьлу бувххуна. Багьсса кIиссуртталгу, витIанхъ ппив хьусса канилгу гужсса къюву дунугу, ва ишираву ттуйра хьусса аьйгу кIулну, нава сававну уссу ивчIавай ливчIуннихха тIий, ганал цIунция ттула дакIнивух ччала кунна къуртIуну, язугьгу, цIимигу хъанай, хъисрагу аьтIаву къаларчIуна, вивай къупIа тIий ухьурчагу. Тара кьини ахтакьунмай жу Къалалив больницалийн бувцуну бувкIру. Уссу шийва хьин ан къахьунсар тIий жухъхун МахIачкъалалив гьан направление дуллауна. Цила хьуннар хьусса ниттичIа шинва ца-кIива барз хьусса душгу, ризкьигу къабивтун, жушал нинугу, буттауссугу бувкIссар. Та чIумал Грозналлал чIарав дяьви бивну бивкIссар. Машинартту бакъа Гьумучату Щурагьун, дучрал аьравалттий бувкIун, гиккува ца госпиталланий ливкссару. КIива-шанма гьантлий ххуллийхгу хIаллангат хьусса уссу, цичIаргу къаканай, хьинну заэв хьуну ия. Къува гьантлул мутгалий, духтуртурал бачIвасса таблеткардугу буллай, дукрагу къаканай, дачIрасса щин дакъа, цIунциялул къювулий шанангу къаикIлай я дяхтта, я хъьувай, ттаркIгу ганссса, дикIулгу учсса уссу, лап илтIа хьуна. Так лякъа дия дурурххуну, хьинну хьунна хьуну. Ттулмий багьсса кIиссурттал ухавату мюрш хьусса ттаркIру къацIрах дуклай, гужсса къювурду духIлай ура. Жу госпиталланийн бувкIун 21-мур кьини, Москавлия ялтту буккулт бувкIуна. Гайннан уссу ккаккайхту, духтуртурай хьунисса аьйрдугу дурну, гайннан выговордугу буллуну, увкуну бия: «Ва оьрчIал ппу дяьвилий цала кулпатралгу, жулагу цIаний душманнащал талай, зу тIурча танал арс аьркинсса кумаг къабувну, ивчIан къаивтун, аьркин бакъасса таблеткардугу буллай, зу мурчIи хьуну бурув, чIалай дакъарив ванал лякъа лалул дурцIуну душиву, ваксса хIаллай, операция бувну, вай циван дуккан къадарду, ваксса хьунмасса хIаллай чIивисса оьрчI захIматсса къювурду духIлахIи циван арду», – куну. Га цIана, ниттища операция бансса рязишиннагу ларсун, гара кьини операция бувна. Операция буллалиссаксса хIаллай нину, цила лякъагу дургьуну, операция буллалисса къатлул хъхьичIсса жанахIравух тиху-шихуннай, аьгу аьтIий, занай дия. Ца ппурттуву, вев-шев тIий, аьтIий ивкIсса оьрчIал чIу бухлавгуна ва чIал къавхьуну тива увккуна операция буллалиний чIарав ивкIсса жула Ххутиятусса хIакин Микьдар Щейхов, Щурагьсса республикалул медкомиссиялул председатель. Нину ганачIан ххярххун, аьтIий дунура, цIухлай дия: «Амангьар, Микьдар, оьрчI къуртал хьурив, танал чIу бухлавгуннихха». «Ина ци тIиссара, ттул ссу, оьрчI хьин хьуссархха». Яла, палаталунгу увкIун, бувсуна Ширванинал лякълувату шанна литранияр ххишаласса лал дуркшиву. ХIал чан хьуну, кIюла увккун уну, чантI къаучин бюхъай тIий, шанаша ай дару (наркоз) буллуну бакъая. Лякълува, чавхъ куну, лал дуккайхту, га цIана лахъну аьтIисса чIугу бацIан бувну, тиккува столданий шанан ивкIуна тIар. Чурх загьрурацIа марцI хьусса уссу махъмур кьини ахттайнингу шанайна ия, къуния мукьва-ххюва гьантлийсса шанан къаикIаву хьирив лахъан дуллай. Та хъхьуну ниттилгу чансса дигьа ларгсса ккик увкуна. Жул госпиталланийн кIива барз шавай ливчIуна. Уссугу хьин хъанай авчуна, навагу кIисри бакъу хьунав. Га чIумал кIул хъанай бакъанугу, яла махъ, утти ниттий бия язугъ хъанай.

Госпиталланий ганин я тах, я топчан къабуллуна, кIива зурул лажиндарай жул цIуллушиврул къаралданий кIанттуй щядиркIун, чIун гъан дурссар жул ххирасса ниттил.

Так къащи хъанай дур та чIумал жула райондалий таксса хIурасса духтуртал, хирургтал бикIаву, га госпитальданийгу мукунма. КъуртIусса кунна дуккан бюхълай бивкIсса лякълуйсса бурчул ва вихссакалул ялтту-сса бурчул дянив дурхсса дукнилул чIивисса касакрая, гайксса лал хъуну, оьрчI къуртал шавайсса кIанайн бияннин духтуртал ци дуллай бивкIссарив къакIулли.

Аллагънал цIими бивхъуну, хъин хъуссар уссугу, навагу, так нину гара цила лархъхъу туралий, мицI къадарцIуну, зий-занай дия. ТачIав ттуннарив, нагу дурххунна куну, дигъалаган щядиркIун, ккарккун акъара нину. КIия уссугу, шанма ссугу бусса кулпатраву хъунма-хъунмурну бивкIсса ттул нину чIивину бунува захIмат ххирану хъун хъуну бия, цанчирча жагъилну бунува, нину-ппу ливтIуну, ятинтал хъуну, цаннийнма бувцуну, хъуни хъанакъисса буттарссил шанма оьрчIалссагу бан багъну бия чIивисса душнин цаламиннащал архIал. Циламур нину сагъ чанну душаврийн бувну, къатлулссагу, хъунилссагу, ризкъилулссагу бан чIивину бунува чурххалгу бювхъусса, цIуллу-цIакъсса душнин, жул ниттин, багъну бия. Мунишала 6-7 шинаву къурандалий буккингу, чак бангу лавхъхъуну бия. Ппу къассавчи уну, къатта-къуш аваданну бунугу, ччатIул хъяншлул къадру, хIурмат хъунмасса бия къатлуву, ччатIуяр ххирасса зад цичIар дакъассар тIий, жунгу лахъхъин буллан дикIайва нину. Мюрщину бунува жун ниттил къулгъу, алхIан, наси, палакъигу лахъхъин бувна, чак бан лахъхъин бангу ччай дия. Буттал аманатри тIий жул дуккавил ялугу дарцIуну дикIайва.

Ххутивсса арулшинал школагу къаоьккину къуртал бувну, на увхра педучилищалувун кIия ттула дуснащал. Му бия дяъви къуртал хъусса 1945-мур шинал декабрь барз. Жу архIал дуклакисса дяъвилий ппухълу, хъуними уссурвал, ниттил ва буттал уссурвал бумий ахттакъунмай лагайссияв Гъарун Саидовлул гъайкалданучIан жула гъанмий хъунабакъин. Та чIумал Гъумукун ва шиччачIин Ккуллал райондалин буза, къай-къуй ххилаххисса тамансса амерканал студибекерду тIисса хъуни машинартту бучIайва. Гайннуй аьралуннава нанисса жула чиваркIгу бикIайва. Жу тикку хъатIан бизаннингу, ганияр махънингу бикIайссияв. Цаппараннал ппухълу, буттауссихъул, ниттиуссихъул бувкIун, ххаришиврул леххавай лагайва, ттулгу, цаппара ттул дустуралмигу най бакъая. Яла цал, мудан куна, игъалагай къини дан, шавай лавгун унува, бутта дяъвилий ивкIусса мяу бувккун лявкъуна. Гаксса гъирарай бутта ккаккан ччай, га хъуна акъин оьхъхъул хъхъу дукканнин ялугълай ивкIун, вана гъархъхъуну учIанссар, гъунтти учIанссар тIисса ттул нацIусса умудгу гъюжу-гъярж бувккуна, хияллугу щялу хъуна, ттуннагу, гъарзадрава дакI дурккун, дуккавилхисса гъирагу левщуна. Яла хъунмур язугъгу так ниттий хъанай бия, цанчирча, цила тачIав къакъабитайсса ххювагу чакличIагу, хъхъугу-къинигу даиман дуллалисса дуаьртту, АллагъначIан къадирссаривав тIий, аьратталну духъунссия. Навагу ххюва-ряхва гъантлий дукрагу къаканай, дарсирайнгу къалавгун, лап заэв хъуну ияв, амма цукун бунугу педучилищалул ца курсе къуртал бувссия.

Хъиривмур шала шинал ттуща дуклан гъан къавхъуссар, къашай хъуну,

цал Гъумуксса, яла Краснодардайсса азарханардай хъин хъанай. Ца шингу лях ларгун, махъунай лавгун, дуклай 1950 шинал къуртал бав педучилище. ДакІния къадуккай мукъулчинмур курсираву дуклан айишайхту, нава лажин дурурххусса обккисса азарданул (ганин рожа учайва) къашай хъуну, Къалалив больницалий утту ишин увсса чІун. На больницалий усса ур тІий бавну, нину дуркІунни анавархъиндарай. Мукъва-ххюва гъантта хъуну бия ттул, 40 градусрайн дирсса кІиришивугу гъаз хъуну, ссихІ къадуклай, ивкІусса куна, ках куну, ивхъуну. Хъхъугу, къинигу ттул гузатрай диркІун дур нинугу. Яла ттул чІарав ца сестрагу къабивтун, нину ва азарданунсса дарув-дарман щин кІулну бурих ххал бансса мурадрай ахттая чул хусса чІумал ларгун дур Хъурих. КІикку арулла-мяйра шарсса щядиркІсса ккурчІав дуркІун увкуну бур:

– ХІурмат бусса ссурвал, на больницалия зучІан бувкІра кумаграл хъирих. Ттул арс ур кІиришивугу лагъ къахъанай, ца ххуй дакъасса азарданул къиялул лажингу дурурххуну, къуртал шавайча, зун щинчІаввагу къабавсарив укунсса азарданунсса дарув?

Та цІанакул ца дугъарасса шарссанил увкуна тІар:

– Ягъар му «орватІи бихъу» дусса дурхха, – куну.

Яла бувсун бур му цукун бишайсаривгу. КІайннахъгу хъунмасса барчаллагъ куну, нину га цІана анаварну ларгун дур больницалул лултту чулийсса шарашул хъхъичІсса чІивисса бярничІан. Гикку бярнил зуманив 2-3 орватІи бивкІун бур щинавун ххяххавай. Ниттил, хъинну мугъаятну гъан хъуну, хъап куну, ца орватІи бувгъуну, гъагълицІагу марцІ бувну, дуркІун палаталувун, сестрагу гъан бивтун, кІа хъури шарссанил тІийкун, лякъулл дянх орватІи чІиллух ххябуккун, дурурххуну, парх диркІсса ттул лажиндараву бивхъуну бур, цурдагу нигъа дурсун дуссияв тІар, хъхъувай духтур увкІун, орватІи лажиндараву экъи къаличин. Ялув увкусса куццуй мукъва-ххюва гъантлий яларай къадагълагъисса кІиришивугу лагъ хъуну (чІумуя чІумуйн нину температура дуцлай диркІун дур), кІюрххил баргъ щилайсса чІумал ттувату чІу бувккунни тІар: «Дадай, ва ттул лажиндаравусса ва ци затри, дукъа ва», – тІисса. КІа чІу баяврил цурда ххаришиврул лехлахи дурссара, Аллагъу таабланал хъунмасса цІими бивхъунни тІий, хъиннура щукру буллал дурссара тІий, дикІайссия аьпа биву. Тамансса гъантрай на цичІар къадуркушиву кІулну, ниттил цІувххунни, ци дукан ччива, ттул арс, куну. Нагу учав, ттунма хъинну ххирасса нисирал ххункІ букавияв, куну. Хъурияту нисгу ларсун, ххункІ тиккува азарханалул кухнилува бан бюхълай бунува, нину, зунттал бюрни кунна, анаварну ларгун шардай Ххутив, мяйра километралул манзилданий дахътта, шанна ссятравату, ххункІгу бувну, дуркІуна. На хъин хъанай айишаврил ниттий хъару хъун дурну дия. Яла махъ, ларгун кІа на хъин хъун савав бувсъсса хъури шарсса ляркъуну, хъунмасса барчаллагъгу куну, ссайгъатгу буллуну бия.

Педучилище къуртал бувсса 1950 шинал авгъуст зуруй нагу, кІия орчІ цаймигу жул директор Шуаьнат МахІмудовнал бигъалагайсса Гъунивсса къатлувун тІайла бувккунав. Хъинну ххуйну бигъа лавгру Ялув Гъунивсса тІабиаьтрал аваданшиву хъуннасса кІанай. ЧагъардайхчІин дахІаву дурну, ниттищал икърал дарду Щиндархъату ахъулссагу ласун, ттуккугу бувцуну, ряххулчинмур классраву дуклакисса уссищал на уцин бучІан. КІюрххицІунмай шаппату бувккун, Щиндархъату ахъулссагу ларсун,

Гъуниннал лувсса ламучла уссугу ттуккучла къаивтун, нину дуркIунни 6-7 километралул ххуллийх домотдыхалийн – Ялув Гъунив. Нагу, ттул дусталгу ккавккун, нину ларгунни гъунтти на учIаннин, Коммуналий гъанттагу бивкIун, ттух ялугълан. Ахтгая махъ, Коммуналия бивккун най, Чувхъун бивсса чIумал дарусса дунял Мияйнал ялун бивсса чIумал, ттуруллив дурккун, лухIи-цIан ларгуна. Буллан бивкIуна марххала. Жу тIурча буру гъинттул лаххиялуву. Варайннал дяликIулувун биявайсса кIанай ххуллул чулух дия хъунисса нухру. Жу буру дадахъ, марххала бацIаннин, кIивун бивххун бацIанну, бигъа лаганну тIий. Ниттил вев увкунни, зу авлия хъуну буру, жува шивун буххарчан, шивува личIан бюхъайссару микI лавчIун, нанисса чIумал дяркъу духъурчагу, жува микI къалачIунтIиссару, куну. Бавчуру. Щаллуну цIан хъунни. Инсантал къазаназисса ххуллу, марххалтанул кIяла лаган бувну, чIалай бакъар. Жул хъхъичI, ххуллу ккаккан бувну, барчаман ттукку най бур, бурхIай мадарасса ахъулссаннул кIушивугу дусса. КIа чIумалгу ниттил жу цила аькълулул камилшиврул тIабиаьтрал балаллуца «зунтту лачIаврища» ххассал бивссару. Ца къатлуву жул мудангу пач бикIайссия. КIа чIумалгу, шаппай бияйхту, ниттил га цIана цIу дирхъуну, къатта кIири бувну, жу ххуллийх бявкъу-гъели хъуну бунугу, къашай къавхъунав. ХъхъичIавагу, тай шиннардийгу жула шярваллавугу кIинттул гъели бан цIу дишайсса ца пачкъатта бакъа къабикIайвахха, мугу пачливу цIу лархъун дуссаксса, гъелинма бивкIун, яла бякъайва. Мунияту утту бихълахъиний, виргъандалул ялун цамур виргъан ягу бартукъ бутайссия. КIинттул чIумал такIуй дакIний бакъар жува – уссугу, ссугу, навагу кIюрххил бизлазиний, къатта бявкъуну. Нину кIюрххила ччяни чак бай чIумал, дирзун чакгу бувну, пач лавхъун, къаттагу ний-ний тIий, гъели бувну, ризкъилун лазуни дичин лагайва. Жун оьрчIансса дукрардугуриу лап нахIусса ххуйсса дайва. ЦIанакулгу къацIливва бур ниттил байсса нисирал эьки найсса буркал, аьрччапрал, нисирал ва дикIул ххунчIал, дикIул, нисирал, уртту щинал чуттурдал, кIарттуву бившусса къавкъсса ва хамил ччатIул, цайми-цаймигу дукрардал тIин. Гъзахъал арантал хIалтIилухун нанини кIюрххила гай тIайла буккан байссия щай ини, яла на Гъумукун кIюрххил авчукун, ниттил ттун бивсса щай ини букан ттушал дуклакисса дусталгу бучIайссия. Дяъвилул чIумалгу, Ххутив буссаксса хIаллайгу яла 1963 шинал МахIачкъалалив бивзун мукъахгу, ниттил гъарца мудан хамис къинилул нюжмар хъхъуну рухIирдан къанкъ дуккан дан тIий буркив, кIюла ччатI бувну, бачIайссия, му къини жучIан батIайссия уссур-ссу. Му аьдат ттулгу, уссилгу хъаннил дурурччуну, гъарца нюжмар хъхъурдай буркив букан бучIайссар жул гъанцири.

Буттал мяу бивккун цими шин гъарчагу, ниттин тачIав чай бакъая ппу бат хъушиврийн вих хъун, жушчал байсса ихтилатгу мудан га чара бакъа учIаврия, учIан аьркиншиврия бикIайва, га сагъну, саламатну ушиврий дакI дарцIуну дия.

Ттунна 17 шин барт ларгун, учитель хъун хъунма хIал къаливчIсса чIумал, ниттил ттул хъхъичI буттал шанна костюмгу дирхъуну (нину дикIайва гай буттукъраву кIучI дурну, янил жавгъарду кунна, ядуллай, ппу увкIукун, ганал лаххан, шярваллил инсантурангу кIулссия Ххутив Гъзахъал Садикълул куннасса ххуйсса костюмуру чIявуссаннал дакъашиву ва ганал кунна къишуну янна лаххайссагу шяраву чансса бушиву), увкуна: «Ттул

арс, утти ппугу най акъарча, вайннува цания ца лаххи, увкІукун, ганангу чан къахъунссарча», – куну. Ца чулуха ттун ччай бакъая ниттил гукун аякъалий ппу учІаннин ядуллалисса костюм лаххан, ца чулухагу утти навагу хъуна хъуну урахха тІий, ниттил увкумур бан ччай бия, га увкІукун, ганан ттуцарагу ласун хъунссар тІисса пикри бия. Мукун на личІи дурссия ттуйнна руртІуну дурсса куннасса коверкот янналул оърussa костюм. Тай шиннардий ттул оърмулувусса оърчІал дакъаяхха тукунсса костюму. Та костюмраву увкссияв на ттухъхъунма буллусса цалчинмур классравусса оърчІал хъхъичІун 1950 шинал сентябрь зуруй Ххутрал школданий зун. Гара костюм лархссия на гъинттул нава Гъумучиял педучилище къуртал баврин хасъсса итабакъаврил мажлисрайгу. Га костюмраяту лахъи буну чичлачисса муниятур, цанчирча, га мажлисрай жун, студентътуран, жула нину кунна, ххирасса директор Ахкуева Шуаьнат МахІмудовнал ттухъ, га костюм барчагу куну, ниттихъ барчаллагъ уча куну, ттун гукунсса буттал костюм дяъвилул гай захІматсса шиннардий ягу дурну, лаххан дуллуну тІий. Костюмрал дана-гъана ниттил ганихъ бувсхъунссия. Нинугу, Шуаьнат МахІмудовнагу куннан кув ххуйну кІулссия. Яла махъ ниттил ттухъ бугу бувсуна га костюм буттангу яла ххирамур диркІшиву.

Шикку кІицІ бан багълай бур, мйяжаннугу, тай захІматсса дяъвилул ва танияр махъсса шиннардий шяраваллил инсантурал цивппа бакІ букканшиврул, ккашил къалитІун цала дуссар кусса янна-ка, арантуннал лаххия, ссур къяпри, арцул мухІулттив, ххаржантру, хъаннил хара лачакру, зяр лачакру, амбарчартту, чарсери, хъаннил арцу-мусил мухІулттив, яруссаннайн лавгун, шагънал лачІах даххана дуллай бивкІшиву ва чІярусса лакрал хъус-хъиншиву, бикъав багълун дуллуну, ярусса миннул заллухъру хъушиву. Амма ниттил цуксса ххирану гай костюму даххан тІий диркІнугу, буттукърава дуккан къадурна. ДакІний бур ниттил ппу лахлай ивкІсса кожинка яруссаннай, ца ттуккух даххана дурну, га ттукку ца-кІира шинай ичІува зийгу бивкІун, ца гъинттул гъаттаращал канаки буну шаппай буцин мудан лагайсса уссу Ширвани, жула ттукку бурцІил бувтшиву хІухчил бувсунни тІий, аьтІий шавай увкІсса чІун. Амма, хъунма хІал къалавгун, ниттил базаллува цамур ттукку машан лавсуна, гъаманки, цуппагу жун, Гъунияту наниний, Варайннал дяликІулийн биявайсса чІумал ххуллу ккаккан буву.

Ниттиясса ихтилат щаллу къахъунссар, агар нину колхозраву зузаврия къабусарча. Гъай-гъай, мйяжаннугу, дяъвилул аьратталсса шиннардийгу, танияр махъгу шяравусса зун бюхъайсса циняв хъами гъакссагу хІарачат буну, хъхъичІунну зий бивкІссар, так миннавугу бивкІссар хъиннува ххуйну, лябукку буну, цайминнан эьратну зий бивкІсса. Масала, Аьвдулхаликъхъал Рукъижа, Гъазихъал Муъминат, ттула нину Пирдавс, Шагъсалан Пахихъал, Гъажиявхъал Ххадижат, Аьвдуллахъал Тагъират, Авакархъал ХІулаймат, Ахсархъал ХІуризат, Нурижат, Дагалахъал Ххадижат ва цаймигу. Колхозрал ризкъилун кІинттулнийн ххулу хъаннил, мукъав къарду дурну, буххайсса бивкІссар. Мий цинциттай буцайсса бивкІссар. Та чІумал яла кІуми къарду Авкархъал ХІулайматлул (ттуршуннияр ххисса

килорду дусса), ганил хъирив ттул ниттил Пирдавслул, яла Машттухъал Амадуллагълул ларсун бувкӀун бивкӀун бур. Муксса кӀусса ххалал къарду къадикӀайссар, миву чартту бивхӀуну бикӀантӀиссар тӀий, председателъналу, цинцилттай ххулув буцлациминналу, къарду ттирихӀин бувну, гиву чартту къалявкъукун, цанна нач хӀуну, багъишла бара тӀий бивкӀун бур.

Колхозраву чӀявуми хъаннил так чӀучӀаврил, хӀухӀаврил, ххулу батӀаврил, мий буххаврил, нувщуйн аьрши диян даврил, ччарду даврил давуртту дуллай буххурчан, ниттил мий давурттугу дуллай, арамтуннаяр махӀун къадагӀну, колхозрал ятту букваврил, къамурду, скирдру баврил, ххалал ттукри бахӀаврил давурттугу дайва. ТӀайлассар, цаппарасса цайми хъами кунма, нину фронтовикнал шарсса дунутӀий ва оьрчӀру мюрщину буну тӀий, каналлу дуклангу гъан къадурна. Амма, къабагълай бунува, цаппара шиннардий жуяту дикӀ ласлай бивкӀун бия. Яла, ниттин кӀул хъувкун, къатӀайлану ласлай бивкӀшиву, гай ласлай бивкӀмигу дащуй бивхӀуну, закон зия дуллалаврин ахир дирхъуссар.

Колхозрал давуртту дакъасса, шардагу чансса дакъаяхха давуртту: гъаттаран кӀинттулнийн лазуни хӀадур даву (ниттил усттарну чӀиникӀгу бищайссия), чатӀа баву, выставкалий бишин бучӀисса цавай эмаратсса бярал чӀулли байссия жула ттарацӀ ва чӀаркӀнил цӀияллай, шанма-муква ттуккуй гъарахъа бан навагу увцуну, Гъумуксса, Вилтгациял чӀаравсса гъарахӀун гъайссия, ссуттихунмай бихху байссия. Уттигу тикрал бан хъхъурай нину жуларду, катӀри щашлай дикӀайва, фронтрайн гъан дансса, цурдагу тӀун дикӀайва, вай нара дурсса жуларду, катӀри жула мямман, дяъвилийсса ххутири оьрчӀан, лакку оьрчӀан нясив дайния тӀий.

Ниттин яла ххирамур байран зума ритаврил байран дия, ххирая ганин интнил хъхъунил, хъарас щаврилмийгу. Мий байрантрайн ххуй-ххуйсса дукрарду дурну, оьрчӀайх дачӀинмур хӀадур дурну, хъхъахъхъари, бувцӀу ххункӀру, буркив, бартри дурну, хӀадур шайва. Му чӀумал жуннийн бучӀайва, гъанцири бакъассагу, ттул дустал. На Гъумук педучилищалуву ккалаккисса чӀумал базар кьинирдай, ттун дуканмур ларсун, нину духхайва жул общежитиялувунгу, кӀул шайва ттушал дуклакисса, архӀал цачӀу ялапар хъанахъиминнашал, мукунма ттушал архӀал дуклакисса Уруватусса ХӀажидаудгу, Гъидаятгу шаппай най ХхутийхчӀин хъусса чӀумал, жуннийн бувххун, хъамалу шайва. Ттул ниттишал кӀул хъусса цинявгу ттул дустурал, ца зумату кунма, тӀун бикӀайва: «Да, Гъазай, ва вил ниттил дакӀнил аьчухшиву, ххуйшиву, укунсса нину дусса ина талихӀрал заллу ура», – тӀий. Ттунмагу мукунсса махъру дустурая баяву тӀааьнну бикӀайва.

Шяраваллил инсантал, хъуниминнал амру бувсса кунма, шагърурдайн бизлай бавчукун, гъарца иширттаву хъхъичӀ диркӀсса ниттингу ччан бивкӀуна цайминнаяр махӀун къадагӀну, шагърулий къатри ласун. Жула бусса ризкь, ятту-гъаттарагу бавххуну, уссугу, нагу къалайчишиву дуллай ляркъусса арцугу хӀала дирчуну, ниттин ччисса куццуй МахӀачкъалалив 1963-ку шинал цачӀу уссингу, ттуннагу ласарду царай къатри. Гъаманки,

гай къатраву жул, уссилгу ттулгу, кулпатру ца ссупралух канай, хІачІлай бивкІссару гара хІаятраву жу цІусса къатри дурну, нагу, ттул кулпатгу гивун бизаннин. Мунияту жул оърчІругу хъуни хъуна ссурахъалну бакъача, ссурвал-уссурвалну. Жула ниттил мурадгу му бивкІшиву бувчІлай бия. Жулмий оърчІруив ниттин дазу-зума дакъа ххирая. 1970-1980-ку шиннардий Хасавюртливсса ссилмийгу, Гъанжиливсса жуламийгу бувцуну, гъинттул нину Ххутивгу лагайссия. Лаккуй колхозравугу, шардагу дурсса чІярусса захІматсса давуртталгу, къюлтІ увкусса дардирдалгу, нину инжит хъанан дикІайва, амма цурда къашайшиву кІулхъун къаритлан дикІайва ттула оърчІру, зугума инжитну бурухха тІий. Лаккуй дусса чІумала нину, бакІ цІий, МахІачкъалалив хъин хъун дурцуну, азарханалий мунил бакІраву рак бушиву ккаккан бувну, духтурнан операция бан ччай бивкІссар. Му диркІссар на армиялийсса 1955 шин. Операция бан, цахъис махъ дучІанна куну, нину шардай цивпалу къабивтсса мюрщисса уссиЧангу, ссичІангу дуркІссар. Яла тІурча, больницалия оьвтІий бунува, къаларгссар, рак бакъашивугу мяълум хъуссар, духтуртурал хъиривляяву дансса, амма ниттин загърмансса операциягу къабувнма ливчІссар.

МахІачкъалалив бивзун тамансса шиннардий нину жул хъаннищал архІал базаллун дукамур ласун, хаснува дикІ машин ласун лагайссия, ганин ххуйсса дикІул хІал кІулъя, циннагу аьгъумур дикІ ччан дикІайва. Ца чІумал базаллуну укунсса иш хъуну бия. Ххуйсса дикІ ххал дуллаи нанисса нинугу, ттул уссил щар ПатІиматгу бивну бур ххуйсса аьгъусса дикІ дахлахисса адиминачІан. Касакру бувсса дикІ цинцилттай дихълай дунура, дахлахима лаккучу ушиву кІул хъуну, ниттил часса ура, ттул арс, куну, цІувххуну бур, ганалгу ЦІусса Ккулату, куну, жаваб дуллуну дур, ялагу ххибуну бур, вай дикІ дунгъузралли, куну. Нину, къаччан бикІаврил кІялагу ларгун, яла ганахъ: «Агъ, ина акъа-къатІа ивуй, лаккучугу дунгъузрал дикІ дахлай икІайссарив», – куну, гай цила кару щях дуклан диркІуна тІар, цалчин га къини базаллува дикІ къаларсун бувкІун бур. Гания махъ цурдагу, цичІар ласун, базаллун ларгун дакъар.

1990 шинал, нину къашай хъанан дарчукун, дадах бургангу, хъин дангу, бучІайва машгъурсса хІакинтал Щайххъал Микъдар, профессортал КъурванмахІаммад Минкаилов ва чІаххуврайсса Ибрагъин Шамов, доцент Дибир Абдуллаевич. Вайннайн хъинну бусрав-барчаллагърай дикІайва. Ниттих буруган гъанцири бакъасса чІаххув-чІарахми, цайми миллатиртталмигу бучІайва.

КІюрххил даврийн гъаннингу, яла увкІун махъгу, хъатІан бизаннин, на щала чІун ниттичІа гъан дайссия, цІухху-бусу буллаи, цичІава щябивкІсса жугу вичІи дишин бувну, Къуран ягу ГъунчІукъатІан ккалай. ГъунчІукъатІан ккалан ниттин Лаккуйвагу лап гъира бикІайва, ваний чивчумур Къурандалул ялтту ларсъсса бартри учайва, ва луттирай чивчусса куццуй гъарцагу бусурманчунван зун, занан, оърму бутлан аьркинссар, чайва. Жугу мудан ганил тІимуний рязи шайссияв.

Нину аьпалухъхъун гъан кІира-шанна шинал, ца шинал, цаппара зурдардил, ца нюзмардул хъхъичІгума ганищал буллалисса ихтилатраву

даиман Лакку кІану, Ххутив диркІсса цила авадансса тІюва, хъунисса эмаратсса къатри, ризкьи-кьини, хъуру дакІнийн дичлайнна дикІайва, буттал ца тІурча зуматурагу къадукъайва, тачІав вихну къадикІайва га акъашиврий. На мудангу, хІатта цІанакулгу, барчаллагърай ура ттула уссийнгу, ссийнгу, ттула царессанийнгу, уссил царнийнгу, ниттийн ца жумужул ккуккукссавагу къаччан бикІанмур къабувну, ганил ба кумур буллай бивкІун тІий, га сагъну дунура, ганин ччай буну тІий, чакругу буллан байбивхъуну тІий. Ниттил цилагу мудан жухъ учаймур бикІайва: «Я Аллагъ, ттул арсру, душру, зу ттун кунмасса зунмагу зула оърчІру хъуннав», – тІисса. Ганил укун учирчагу, жунмарив бувчІлай бур ниттин жуйвасса буржирдал ттуршва бутІул ца бутІавагу къалавхъшиву.

Агъ, ца ххари-шад шайссиявча нава нину тяхъа-шадну, ганил симан, нурданул чанна лахъан дурну, ххал хъусса чІумал. Мукунсса чІунгу, чІяру-ну дакъахъурчагу, дикІайва, мугу мюрщисса жул оърчІал, душварал дянив ларсун, гайннал дуллалимуния ва тІутІимуния ххари хъанахъисса чІумал. Ххаришивугу, пашманшивугу, куннийн кув къарщисса мяъналийсса асарду бунугу, архІал най бур. Мукун пашманшиврул хъирив ххаришивугу, ххаришиврул хъирив пашманшивугу най дур. Уттарашиврул щин хІарчІун, тачІав жуятура личІи къахъунсса ххай бивкІсса аьзисса нину, 1992 шинал ноябрь зурул 10-нийн аьпалухъхъун ларгун, жул ялун хъуннасса пашманшиву, къумашиву дируна. Жун, гъанцириннан, кІулминнан кунна, нину тІабиаьтрангу ххирасса диркІун дия: га кьини кІюрххила дуниял дайдирхъуна, аьтІисса кунна, сив-сив тІий цІимилул вирхху буллан. Яла, хІатталлив бачин, жаназа хІаятравун дуккан дурну, шаппагу, хІатталливгу ивкІуманак байсса къулгъу-къурангу бувну, нину дурччукун, махъуннай гъарал лачІлан диркІуна. Махъмий кьинирдай даруна. ЧІявусса халкъ бувкІуна жижара бан, алхІан буккин, тийх-шийхсса шагъурдайсса бучІан къавхъусса гъанминная, кІулминная телеграммардугу дуркІуна. Нину ахиратлун ларгун ца шинал махъ аьпалухъхъун лавгсса Мариям Ибрагъимоваясса телеграмма лакку мазрайн таржума дурну дуссар. Шикку га телеграмма дуркІсса куццуй оьрус мазрайра ришлай ура: «Дорогой Газа, тяжело терять такую маму, как Пирдаве. Пусть боль утраты притупят сознание выполненного сыновьего долга до конца. Мариам. Кисловодск».

Ялавай чичлачисса махъру нину ахиратлун ларгун ца-кІира нюжмар хъуну махъ чивчуссар: «Ларгунна, ххирасса дадай, ина жучІату абадлул къатлун. ТачІав дакІнийнмагу къабагъайва, ина жува къабитанссару тІисса зад. Духъунссар му тІабиаьтралла къанун. Ина вила дуаьрттаву чІявуну кІицІ байвахха, дадай, Я Аллагъ, нитти-буттан оърчІал дард-буруккин къаккакканнав, жунгу оърчІал хъачІунттай хІатталлив гъан нясив баннав, куну. Жугу, мукун хъуннав тІий, амин тІун бикІайссияв. Му вил оьрмулийн къаивну, аьпалухъхъун цучІав къагъаннав, тІун бивкІру, яла ина ларгукун. Ларгунав ина, дадай, шийра аьрщарай инара дакІния къадуккансса чІяру-чІярусса хъхъичІунсса давурттугу дурну, гъанцири, жяматрал агълу, хІатта дахъра инара кІул хъуми цил аьпа баннав, мубараксса, дакІ хъиншиврул дазу-зума дакъасса хъамитайпа бия тІий къабивтун. Ларгунна ина, дадай,

ххюцаллий кІира шинал мутталий дяъвилийн лавгсса ласнах, жул буттах, ялугълай, га сагъну, саламатну ушиврийн вихну, учІаншиврийнсса умудрай».

Укун ларгуна жул аъзизсса нину жучІату мудангу цурда хІадур хъанай диркІсса гамур дуняллийн – абадлиймур къатлун. Жугу гъарца чІумал Аллагъу тааьланайн лабизлай буру цинна цІа дирзсса Пирдаве алжаннуву нинугу, ппугу хъуна бакъин нясив бува, тІий.

Нину ахиратлун ларгун кІира шин хъувкун, жул кулпатирттал, циняв уссур-ссуннал ялун дирсса хъуннасса ошивуну хъуна ттул уссил Ширванинал арс, жула буттал цІа дирзсса Садикъ ва ганал ххюра шинавусса душ Сабина, машиналий авария хъуну, аьпалухъхъун лагаву. Ва лялиян дан къашайсса хъуннасса къурчІишиву жу цинявгу гъанцириннал захІматну къюлтІ учирчагу, цуксса цурда ссавур дусса дунугу, сагъну диркІссания ниттища къабюхъанссия духІан цина ляличІинува ххирану ивкІсса арс-нал арс Садикъ ивчІаврил ошиву. Ци банссия Аллагъу тааьланал чичру укунсса диркІун дур. Ттиняр тихунмай махъминнал оьрмурдай барачат бишиннав.

Укуннагу тачІав хъама къаритайсса, дакІния къадуккайсса нину, ва ххуллук циятура ва буттаяту вай чичрурду дуллалисса чІумал, сагъсса кунна, ттула хъхъичІ дарцІуну дусса куна ухъувкун, нигъа увсун ияв, вай чичрурдавун къалпмур, тІайла дакъамур хІала къахъун. Мунияту хІарачат бав гъарзад хъумур тІайлану, бивкІсса куццуй ккаккан бан. Ниттил тІий диркІсса чІявусса насихІатрал махъру цІанакулгу, вичІилух бишлайсса кунма, баллайнма бур, цурда ахиратлун гъан цаппара гъантрал хъхъичІ жу циняв – арсенал хъами, душ, цаппара гъанцири бавтІсса чІумал ниттил увкусса: «Бавкъуну бикІияра, Аллагъ хъама маитари», – тІисса махъру.

Нину лап хъинсса дикІайва чІаххувращал, хаснува мюрщиминнашал. Увкунур мйжаншиву тасттикъ буллай бур хъуну бивкІсса ва иширал.

Нину аьпалухъхъун ларгун кІива барз лавгсса чІумал жижара бан жучІан бивкІуна Ххутив жула къатрал ялтту чулий ялапар хъанай бивкІсса ниттил хъинирвул душ Аьшура (аьпа баннав цил вагу, жагъилну бунува, ахиратравун лавгссар). Нину дирчІайхту къабавну му хавар, уттигъанну бавунни тІий, гъа аьтІун бивкІунни, гъа аьтІун бивкІунни цила яла гъанма – нину, ниттирсси дахъра къуртал хъусса кунма. Паракъат буллай, къабагъан буллай бан шайрив. Циванни ттун къабавсса, нину кунма, ххирану бивкІсса Пирдаве ниттирессу бивкІушиву. Мйжаннугу, Дербентлив ялапар хъанай бивкІсса Аьшуран, цукун къабавссарив, бавну къабивкІун бур нину аьпалухъхъун лагаву. Яла аьтІавугу дацІан дан хІарачат буллай, ссинкъа тІий бунува, буслан бивкІуна.

– Вар га, Пирдаве-ниттирессу, жун, чІаххуврал душваран, ххирассия. Дин-исламрал чулухуннай хъинну цІакъсса бия, аьпа биву. Нюжмар хъхъурдал хІурматран бувсса кІюла ччатІ, буркив мудан чІаххув-чІарахнайх бачІайва, цІияллал ялувсса жунгума багъан байва. ТачІав дакІниятувагу къабуккай ца укунсса ишгу. Пирдаве-ниттирессихъал хъуни къатрал майданнуксса цІияллу тІайланна жул къатрал хъхъичІ тІитІи даркъуну

дия. Чаххуврал душваралгу жула тIуркIурду кIикку байссия. Пирдавс-ниттирессихьал цIияллу, мудан култа бувну, дюрчIуну дикIайва. Ца чIумал жу, душварал, классирттай буккан цIияллай мадара куртIсса аьшругу дурккун, кьинибархан тIуркIу тIий буссияв. Хьхьурай ларчунни гужсса гьарал. ТачIав кIукI кьадулкайсса кьатлун-тавханттувун та хьхьуну гай жу дурксса аьщурдивух чIярусса кIукI дурккун дур ва мукун хьушиву Пирдавс ниттирессин кIул хьуну бур. Яла ттухьгу, ттушал бивкIсса вайми душварахьгу муксса иминну, цукунчIавсса ссигу кьабивзун, увкуна: «Агь, зу, кьукьуцун кьабакьивухьул, талихI буливухьул, жул хьун кьатта кIукIал бяххан бувну бурхха зул классирттал, утти на зун ци танмихI бави? Уттиняр тихуннай мукунсса кьел мадари, агарда дуварча, зу ттун кьаччан хьунтIиссару, бувчIуричI?» Вев-шев тIий, ссививзун кьаувкуну, иминну, цукуннив, жу цинма ххирану бушиву бусласисса кунма, увкусса Пирдавс-ниттирессил махьру, хьинну бювххуна, кIа ссавур дусса, мяьрипатрал дурччусса шарсса душиву исват хьуна. ХIатти циякьай кIанияр махь жу цIияллай кIукун куртIсса аьшру дуккан. Ялагума нава Пирдавс-ниттирессин цIияллай култа бан, цIиялу дюрчIан дан кумаг байссия. Ттун, ттула аьзизсса нину кунна, Пирдавс-ниттиресси тачIав хьама кьаританссар, куну, Аьшура ялагу агьи-агьи тIий аьтIун бивкIуна.

Тамансса хIаллай щягу бивкIун, Аьшура лавгун махь жува – уссу, ссу, нава, жул хьами бивкIиссару хьунмасса барчаллагь хьуннав цийн тIий, ганихьгу, ганил кулпатрахагу дуаьлий, гайннан тIайлабацIу, хьинмур, ххаримур хьуннав тIий, амма ца-ца чIумал дацIарчагу дуаьрттугу мудан кьадацIайхха, хьунма хIал кьавхьуну, цуппа сагьну бунува Аьшурал жагьил хьусса арс ахиратлун лавгуна. ЛивтIуминнал цинявннал аьпа баннав, рухIру хьинний дишиннав.

Дунияллул тарихраву мудангу оьрмулувусса ца яла хьуннасса, оьшиву жагьилсса хьамитайпа щацарну личIаву дур. 1940 шинал ппу шавату хIалтIилухун, яла гичча дяввилийн лавгун, цурда гьаттавун гьаннин, 52 шинал мутталий цурда ца кьини га дакIния уккан кьаивтуна, ганал хьиншиврия, чумартшиврия, яхI-намусрая буслай дукьаххайва.

Тамансса шинну ларгунни на гьарца кьини цIанакулгу, кIюрххил кьатлува увккун наниний, тамур кьатлуну шкафрай дирхьусса бутталгу, ниттилгу суратирттахь, сагьминнахь куна: «Бивзру, цукун буру, дадай, мяммай», – тIий, ссалам буллай. КIайнналгу ттухьва: «Инагу иззрав, арс, ххуллухьин», – тIисса кунмасса асар хIасул хьанай. Му чIумал хIакьну, исватну бувчIай нину-ппу чIярусса шиннардил хьхьичIва ахиратлун лавгун бунугу, жува сагьну буссаксса, жушала сагьну гайгу бушиву.

Нину дия жул эбратрансса дагьани. Ганих бурувгун кьуццу барча, занакьулу хьанарча, жуятува ххуйсса инсантал хьун гьахьунссия, амма насихIатругу кьабувсун кьадикIайва. Миннугу чIявуну тикрал шайми вай бия: цукунчIав Заннайн аьсив кьашаву, аьмал ххуй баву, хIарамсса зат кьатлуну духхан кьадаву, щинчIав кьаччан бикIан кьабаву, мюхтажманан кумаг баву, дусну, бавкьуну бикIаву, цIакьну дин-исламрал ххуллийх бачаву. Ялагу тIун дикIайва: цурк баву – му кьадарсса кьелли, щялмахь

бусаву – начсса ишри, лажин лякъаву карагъатссар, виярва заэвманай ябацѹ баву бунагъссар, лавмартшиву кьюкьалассар, тий ва м.ц.

Шардаллилмур кунна, колхозрал давугу буюху буну дайсса нину цѹсса захѹматчи диркѹссар. Хъу ттихѹлахѹсса кѹанай ца звеноравусса чѹлаххувшар Пирнахѹал Амадуллагъ дадахъ тий диркѹн дур ца чѹмал: «Ягъар, Пирдавс, аьнакѹайн гуш тий, кьинибархан ка галай дулларчагума, инсан багъѹатѹ шайссархха, ина муксса чялишну, булукьуну циван хѹй бура, жуца вил хьирив лаян буюхѹлай бакъар», – тий. Наварив даимангу мукѹруну уссияв, агар га ттула ниттихъхъун дуллуну диркѹссания шяравумурниязгу лахъсса, райондалул каялувчинал даву, мугу ганил ларайсса даражалий биттур данссия, тий. Аьпа биву, дада цумур дунугу даву дан паргалсса дия.

Аьзисса нину... Га дия жул оьрмурдал нурданул ттарцѹ, узданшиврул, ас-ламусрал, адав-инсапрал ххазина, къатлул кѹини, тирхханну. Га бия иман-исламрал, ссавурданул, дугъришиврул вибувцѹсса, чумартсса хъамитайпа. Ниттихѹал чулинмай цинянналгу укунсса, ваниха лавхъхъусса пикри бикѹан аьркинссар. Муниязу на ванияр 63 шинал хъхъичѹ учитель хъувкун, нара дарс дишайсса оьрчѹлахъ мудан учайссия: «Ттун яла ххирами оьрчѹру ниттихѹал хѹурмат баймири, цала дадахъул, буттахъул ххирамири», – куну. Инсаннал хасиятравусса яла ххуймургу хѹасул хъусса ниттихъаятур.

Дуруччара нинухълу!

Нитти-буттая бусланмур уттигу цикссагу бур. Бухъурчагу ванийну кутѹа буллай ура. Так ччай бур шиккува кутѹану бусан ттула уссиятугу, ссиятугу, миннаяту личѹийну къачивчун.

Усуу Ширвани ттуяр ххюра шинал чѹивиссар. Ширвани ур ттул аьзисса усугу, хѹакъсса дусгу. Иширах бургарчагу, жул оьрмурду кѹа Ххутив жува дунияллийн бувкния шихунмай, армиялийн, хѹалтѹилухун лавгсса шинну хѹисав дакъа, цачѹу, ца ужагърай, кунначѹа кув лавгунни. Уссияту бусайсса ванайн багъайсса чѹявусса хъинчулийсса ишру бур, дакѹнивун пашманшиву дутлатиссагу чансса бакъар. Цѹанакул пашманшивурттая къабусланну. Ми ва къиссалувугу кѹицѹ лавгун буссар. Кѹицѹ банну так цаппара оьрмулул лахѹзарду. Ширванинан ттуннияз ххирассия шаппаллил иширттаха зун, чѹивину унува ва ия жула ризкъи-къинилулсса байсса оьрчѹ. Ванал ми канаки бан, хѹачѹан бан лагайва, лазуни дичайва. Хъуна хъувкун цулун, гъайтѹун лагайссия. Яттил ттурзандавуусса жула ттарду, кунни кѹулессия. Муниязу нинугу рязину дикѹайва. Ширвани Махѹачкъалалив тамансса шиннардил мутталий яла цѹа дуркма суратрищуну ивкѹссар, яла музыка чичайсса студиялий зий ивкѹссар. Захѹматраву ларайсса ккаккиартту хъундаврихлу шамила увчѹуну ивкѹссар шагърулул Советский райондалул советрал депутатну, цимилагу лайкъ хъуссар хѹукуматрал хѹурматрал грамотарттан ва бахшиширттан. Мунан дуллуну дур «Захѹматрал ветеран» тѹисса медал ва хъхъичѹунну зузаврихлу профсоюзирттал дуллайсса лишанну. Лахъи къабан, учин ччимур вари. Цѹанакулгу жу, ца хѹаятраву личѹи-личѹисса къатраву бунугу, гъарца къини кунначѹан кув буххайссару. Ттул къатлуву

ци-дунугу низамрай дакъахъурча, ми дакъин дан анаварну Ширвани учІайссар, мунал дакъин дайссар. Ванал канила къадуккайсса цурда цичІар дакъассар. Жулгу, жула кулпатиртталгу, оърчІалгу, душваралгу хІала-гъурттушиву ларайсса даражалий душиву гъарцаннан кІулссар. Щил-бухъурчагу уссурвал ва ттул уссу Ширвани кунмасса хъуннав. Цала оърчІрунияр личІи къабайссар ттулмигу, нагу муналми. Ваная чІярусса чІапІай чичинсса бунугу, кутІа банна, так учинна, уссу Ширвани, инагу, вил щарсса ПатІиматгу азардацІа марцІ хъуннав, цІуллу-цІакъну чІярусса шиннардий оърму бутан нясив баннав.

Ссу Умукусун. Дяъвилийн лавгун бат хъусса жул буттал лажин къаккарксса ххирасса ссур жун Умусукун. АцІнияз мязра шинавува, Хасаврай учительну зузисса ттула дус Къушаев Макъсудлунгу щар хъуну, дуклан гъунарду буна, оърчІру хъуни буллай, гайнналссагу, къатлулссагу буллай, къадурккунма ливчІссар.

Ниттил куннасса хасиятгу, хІарачатгу бусса жул ссу Хасаврайсса жулагу, цайми инсантуралгу дянив бусраврай бия. Му шагърулул дуки-хІачІиялул давурттай зий хъхъичІунмурну бикІайва, муниязу хъхъичІунну зузаврихлу дуллуссар мадарасса грамотартту ва бахшишру. Аьпабиву ниттингу ххирассия ца-ца чІумал душничІан Хасаврайн аьлтту дуккан гъан, ниттил уссугу, цайми гъан-маччагу бия гийх. Яла куявгу, уссугу МахІачкъалалив бизан бангу хІарачат бувна, гайгу бивзуна.

Вил ахир хайр даннав, жул ххирасса ссу Умукусун, дакІниймур барт лаганнав, цІуллу-цІакъну вила кулпатращал лахъисса хІаллай оърму бутан нясив баннав, оърчІалгу, оърчІал оърчІалгу ххари буллай битаннав.

Шиккува кІицІ бан ччай бур чІявусса инжитсса инсантурал чулухасса зукълурдан лайкъ хъушиву ттул уссил Ширванинал душ Светланагу, ттула душ Зульфиягу. Светлана бур МахІаммад ХІажиевлул кІичІиравусса Министртурал Советрал зузалтрансса поликлиникалий медициналул процедурарду дайсса сестрану, Зульфиягу Казбековлул цІанийсса кІичІиравусса диагностикалул центрданий оьттул анализру дайсса лабораториялул зузалану.

АцІрахъул шиннардий агъалинал цІуллушиву цІакъ дан щаллу бувсса вай идарарттай зий чІявусса къашайшалтрал мурадру щаллу бунни вайннал, мукун вайннязу ххишала бакъа рязину бур минначІан бучІаймий, архІал зузимий, миннал каялувчитал.

ТалихІ-тирхханнарайн букканнав зу, Светланай ва Зульфийай, зула оърчІал, душварал ххари баннав.



Публицистика



Сиянат ХІАЖИЕВА

БАШИР УВАЙСОВ ДАКІНИЙН УТЛАЙ

Жула Дагъусттаннал хъуншагъру МахІачкъалалул кучардавух нанийни, бюхттулсса зивурдайсса къатри, багъру, тІутІавун бахълавгсса паркру, вирттаван дацІан дурсса гъайкаллу ва чІюлу бувсса кучарду ккавккукун, дакІ пахрулул гъалак дуллан дикІай.

Ва шагъру укунсса сийлийн бучІан бан хъунмасса захІмат бивхъуну бур ва бихълайгу бур жула архитектортурал, чарил, муххал устартурал, художниктурал ва скульптортурал, мукунма муданма шагърулул марцІ-шивруха узиминнал.

Миннал сияхІравун агъну ур уттигъанну апалухъхъун лавгсса художник, скульптор, дизайнер, Ваччатусса Увайсхъал Давдил арс Баширгу.

Башир увну ур 1946-ку шинал Ваччийл шяраву. Увну цаппара зурдардива ивкІуну ур ганал ппу. Дяъвилул махъсса шиннардий чІявусса захІмат, ккаши-мякъгу ккавккун бур Баширдунгу, мунал уссу-ссурваврангу. Цала ссийшал му ивкІун ур Хасаврайсса Детдомрай (оьрчІал къатлуву). Цаппара шиннава студентну МахІачкъалалив дуклакисса хъунама уссил Ссугъуринал Баширгу, гама уссу ва ссугу, нинугу бувцуну бур цацІанма МахІачкъалаливн.

Башир дуклан авкъун ур 16-мур МахІачкъалаллал школалийн. Гай шиннардий Баширдуву художник чантІ куну ур. Цаймигу гъунар бусса цала дустурашал га занан ивну ур халкъуннал творчестволул къатлувусса художник хъун лахълахъисса студиялувун. Ганил хъунаманугу ивкІун ур Дагъусттаннал халкъуннал цІанийн лайкъ хъусса МахІаммад Юнусилау. Ганащалсса кІулшаву Баширдул махъ дурсса давурттал дайди хъуну дур. Къурттаяту личи-личисса эмаратру дайсса мастерскойлуву зузисса чІумал Башир къурттал парчрая дуллан ивкІун ур аьжаивсса мозаичнайсса суратру. Мукун дурсса машгъурсса скрипка бищул Паганинил суратрал махІаттал бувну бур учительгу, цайми кымат бищулту. Гукунна къурттарая дурсса къавтІалтрал сурат машин ларсун дур Министерство Культуралул.

Художникшиврул аргъиравун увхсса чІумал, махъсса шиннардий Ба-

ширдул дурну дур чІярусса жула шагьру чІюлу буллалисса давуртту. Ванал дурсса давурттал чІюлу бувну бур (Лениннул) Расул ХІамзатовлул цІанийсса кІичІиравалу ва майдан. Гикку дур Дагпотребсоюзрал чІирайн лархъуну «Къурукъру» тІисса гъайкал, Р. ХІамзатовлул цІанийсса библиотечалучІасса «Элегия» тІисса гъайкал, щала га кІичІиравусса ва Лениннул цІанийсса майданналийсса фонарду, Обком профсоюзрал чІирайсса муххая дурсса композиция «Слава труду» тІисса. Укунсса давуртту Баширдул дурсса чІярур шагьрулуву.

Ттул пикирий, цал куц бувну, яла мах дарцІан дурну, гукун бюхттулса, урувгма махІаттал хъунсса гъайкаллу дан бювхъусса инсан хъунмасса гъунарданул заллу ивкІун ур. Бюхъайссар, чІявучин къакІулну бикІан ва фонардал «Ансамбльданул» автор цу уссаривгу.

Башир ия цаятура цІарду дуллалинийгума нач хъанахъисса, пахру буллан къаччисса. Ванал дурсса караматсса гъайкаллу дур дацІан дурну Мурманскал Никель тІисса шагьрулийсса «Восход» тІисса дворецраву.

ХІазран бакъархха учайсса: «Гъунарданул ликри лахъиссар», – куну.

Игрушкартта мякъсса мюрщисса оьрчІан, цичІара гай машан ласунсса кашигу дакъахъукун, Баширдул ниттил Марияннул аьрщарая дайсса диркІун дур личІи-личІисса ссихъри. Ганийва гъира багъну бивкІун бур чІивисса Баширдун аьрщарая личІи-личІисса жанаварт, инсантал буллан. Му бакъассагу, ванал хъунама уссил, цІанасса Дагъусттаннал халкъуннал цІанийн лайкъ хъусса чичул Ссугъурилгу дайсса диркІун дур суратру. Ганалгу хъунмасса гъира бувтун бур Баширдувун. Ялагу хъунмасса кумаг бувну бур Баширдун МахІаммад Юнусилаул. Вай шама инсаннайну дузал хъанай дур ванал дуккавугу. Ванал дуллалисса давуртту хІисав дурну, экзаменгу къадуллунова Башир къамул уллай ивкІун ур Ттуплиливсса художественный Академиялувун. Багъантту чІяву хъуну, Башир Увайсов дуклан лавгун акъар.

Гъашину МахІачкъалалив Башир Увайсов аьпалухъхъун гъан чансса хъхъичІ ванал дурсса гъайкаллул суратру ва мукунна портретирттал кІива выставка тІиртІуна. Га дия увкІма, ккаркма махІаттал хъунсса, хъуннасса выставка.

Амма чІун дакъасса бивкІулул жула яла агъан унни хъунасса художник, скульптор, дизайнер Башир Увайсов. Дакъар ванан ХІукуматрал дуллуна хъунисса бахшишру, цІарду, амма ва жула шагьру чанна лахъан бувсса, чІюлу бувсса художникнал цІа мудангу дакІний личІантІиссар миллатрал дянив.



**ДИБИРОВ АБДУРАХИМ ДИБИРОВИЧ ЛУЩАЛССА
ИХТИЛАТ**

(Гъумучиял азарханалул хъунама)



- Абдударах1им Дибирович, виятува чансса бусарча ччива, ина та, чув увссара?

- Ттул нину-ппу Ххутиял шараватуссари. На увссара Маскавли 1962 шинал. Нину-ппу Маскавли ялапар хъанай бия таний. Бутта Дибир Мах1аммадович Цалчинмур Мединститутраву зий ия. Нину Мая Хасовна МИСИ-луву (Московский институт строительства и инженерии) зий бия. Жу бияв шама арс. Циняв шаллугу бувну, ларайсса к1улшигу ласун бувна нитти-буттал.

- Вин цукун гъира бивзуна х1акин хъун?

- Цукун бизави, гъарца кьини иттал хъхьич1 ия х1акин – бутта. Муниятуттун цамур пиша бушивувагу къак1улссия. Чивинияца ивк1ра к1яласса хялатрах ччаву хъуну. Гъанжилив бивзун махъ, бутта цала х1акиншиву дакъасса, жяматийсса иширттахунгу машхул хъуна.

- Медакадемия ци шинал къртал бувссия?

- 1985 шинал лечебный факультет къртал бувссия.

- Яла чув зун ивк1ра?

- Цал «Грознефтьсервисрай» шагърулул 4-мур азарханалий хирургну зий ивк1ра, ялагу шанна шинай Гудермесрай шагърулул 2-мур азарханалий зий ивк1ра. Ми шиннардий ттул хирург х1исаврай ка ишла хъуна, санят лархъхъуна.

- Буси вила кулпатрая...

- Ттул к1ива душ ва ца арс буссар. Душру Маскавли ялапар хъанай ва зий бур, арс Ибрагъим-баг 11-мур классраву ккалай ур. На ххарину ура га ххуйну дуклай уну т1ий.

- Гъумуксса азарханалий зун та увк1ра?

- 2013 шинал апрельданий.

- Ина увкѣсса чѣумал ци тагъар дия азарханалий?

- Иш лап обккину бия. Иржа бивхъуну, хъхъугу-къинигу хѣакинтал де-журстволий бацѣаву дакъая, анаварсса кумаг бакъая. Ремонт дакъая, штукатурка къатѣ хъанай дия. Къашайшалан мюнпатрансса, га игъалагансса цукунчѣавсса шартѣру дакъая. Хѣакъину ми масалартту щаллу бувну буссар.

- Ци чара ина тѣисса медициналул тагъарлданийн Лаккуйгу, Дагъ-усттаннайгу.

- Ххуй чулиннайсса дахханашивуртту дайдирахъунни цѣусса министир здравохранения Ибрагъимов Танка Ибрагъимович ивтѣсса чѣумал. Га хѣарачат бусса, халкъуннай дакѣ цѣуцѣисса министир ур. Ганал жул азарханату, цайми районнайсса азарханарттугу гъарца аьркинмунил щаллу бунни. Амма диал къахъанахъимумургу чансса дакъар, масала, операция байни ишла байсса столлу, хиругнал инструментру (ярагъ), лазерданул луч (туран), ортоскопический ярагъ биялну бакъар. Хѣайп, Дагъусттаннай Медакадемия бунугу, цила багъайкунсса саняткартал, специалистал биял хъанай бакъар.

- Ттун бавссар Хъурттал Къалалий ина дуклаки оьрчѣру бигъалагансса лагерь бувшиву.

- Лагерь бувссар «Гъази-Гъумучи» Фондрал Лакрал райондалул администрациялушал ахѣлал. Хъунмасса кумаг бувссар мукунма му лагерь бан Дагъусттаннал Жяматийсса Даккаврил депутат Джафар Абуевлул. Шиккува учин га ур лакрал патриот, миллатрал цѣаний жан дулун хѣадурѣсса. Къурбандалул байрамрайн ганал спонсоршиву дурну, 70 хѣайван машин ласарду. Ми бачѣинтѣиссар каша чансса кулпатирттайх. Шиккун къамул байссар лакгу, лакрал тарихгу ххирасса лакку оьрчѣру Маскавлия, Петербургия, Аьрасатнал цайми шагърурда, Махѣачкъѣалалия, Каспийскалия. Арулла шинава ацѣния ххюра шинавун бияннинѣсса оьрчѣру къамул байссар. Миннахъ дишайссар лакку мазрал, тарихрал, хѣисаврттал, магъирлу-гърал (Бархъаллал тѣахѣунттѣив дувултрал пиша).

- Ци чара ина буккултархъ, цѣуллу-сагъшиву ядуваншиврул гайннал?

- Машина зананшиврул, ганил техосмотр дайссар чѣун-чѣумуй. Даххана дайссар нагъ, шинарду, цайми-цайми затру. Мукунѣсса халкъгу чѣун-чѣумуй занан аьркинѣсар махѣлалул хѣакинначѣан. Ганал буцѣинтѣиссар тарг (пульс), ххал дантѣиссар давлениялул лагъ-лахъшиву, дантѣиссар узи, ххал бигъинтѣиссар качар цѣкѣсса бурив. Вай гъарзадрал кумаг байссар азар дунийра духлаган дан. Агана, къулагъѣс къадурну, къадитарча, чурх лияйссар, ургала акъѣсса машина кунма.

- Барчаллагъ вин хъунмасса Аьбдурахѣим Дибирович, ххуйѣсса маслихѣатру баврихлу. Тѣиртѣунийн ка диллай личѣаннав!..

Редациялул чулуха: цѣанѣсса чѣумал Аьбдурахѣим Дибиров зий ур Каспийскалал шагърулул азарханалул хъунхѣакинну.

МАММАЕВ МАММАЩАЛССА ИХТИЛАТ



Маммаев Мамма Раджеф Тайип Эрдоганушал, 2006ш. Анкяла

- Х1урмат бусса, Мамма Нурмах1аммадович, ина ура ц1а дурксса политик ва ишбазаранчи. Ина ивк1унна Дагъусттаннал Жяматийсса Дастгалугърал членну, Госдумалул депутатну, Нигъач1аврилсса байсса комитетрал хъунаманал хъиривчуну, Данди бац1аврил комитетрал кьют1сса бюджет ххал бигъайсса ва Миллат буруччаврилсса байсса комиссиялул членну. Махъсса ппурттуву ина чувч1ав кьуллугърай акъаяв. Му цукунни бувч1ин аьркинсса?

- Ттуйн оьвт1ий бия зун Дагъусттаннайгу, Маскавлийгу, амма на нава рязи къавхъуссияв. Т1айламур бусан, цаппара иширттай дак1 къадаркьуна. Цурда даву дачин даврил къяйда хас къадирзуна...

- Мамма Нурмах1аммадович, ци чара ина жула республикалий хъусса дахханашивурттайн: Владимир Аьбдуаьлиевич Васильев итаврин.

- Му суалланун на жаваб дуллуссия телеперадачалуву. Ттигу тикрал банна: ттун к1улли Владимир Васильев Госдумалий зуннийн тинайва, ванийнин 19 шинал хъхъич1ва. Га курт1ну гьарца иширал вив уххайсса, арилла дурцуну, цал кьукъайсса чуври. Ганал оьнма аьдада махъ къаучайсар. На дак1 дарц1уну ура, агана цахава лархъхъусса командагу духурча, ганал ччясса мутгалий Дагъусттан таза-тирх чин бант1ишиврий, цамур даражалийн лахъан бант1ишиврий.

- Жун бавунни ина Мах1ачкъалалив Деловой клуб т1ит1лай ушиву, яни Зузинал ккуран дат1лай ушиву. Буси, му идара т1ит1аврил багъанна-савав цири? Мунил даймур-дитаймур цири?

- Учин мукъун, жула республика коррупциялувун дюркьуну ларгун дур уттаннай ва лахъиннай. Гьалбатта, детсадирттайн ва инвалидтурал пенси-ярттайн «азар» лархъун дур. Х1атта В.В.Путиннулгума увкунни: «Дагъусттаннай дя къадик1ай: ягу инвалидтал, ягу спорсменталли бусса,»-куну.

Чувчлав ялагу ва азар вакссара оьнийн дурккун душивугу къаклулли. Мунин сававгу укуссари хусса: Чачаннаву дяьви буну, Дагъусттан Аьрасатная, Дунияллия ябувцун ливчлссар. Мунин буну гьарца ишираву махьун багъссар. 1999 шинал, В.В.Путин учлавришал иш ххуй чулинмай баххана хуссар. Басаевлул къачагьтал 99-ку шинал авгъустрай Дагъусттаннайн ххяххсса члумал на увчлунав ополченцынал штабрал хьунаману. Хьунмасса кумаг бувссар ттушал ахлал Питердайсса жула лаккучув аьба бан цал Исмяиллул. Бучлия га Исмяиллуя ца ххуйсса макьала, лу чичин. Га кунмасса лак чан хьуну бур, лак бакъа цаймигу. 1999 шиная тинмай байбивхьуну, Центральный телевидениялувух Дагъусттан так вахлшитал кунма ккаккан буллай бивклуна, урувгнаву ххуй бакъасса асар къабитлан бивклуна. Амма 2010 шиналгу биялсса ххуйсса ишру хуссар жучлава, так мий ккаккан къабувна цаннив. Мунияту Деловой клубрал хьхьичл бавцлсса масалану хьанхьиссар Дагъусттаннай хьанхьимуния тлайла-гьайлану бусаву, баччин къабувну, Маскавуллахьгу, Питердахьгу, Дазул Кьатлаллихьгу. Му бакъассагу, Клубрал лагма лаган бансса къаст дуссар хларачат бусса, итххяххсса жагьилтал. Жул умуд буссар республикалул хьуниминнал чларав бацлансса, миннан шайсса кумаг-ка бувансса. Акъа миннахун даиман кунма, байбивзунма къабиклансарухха, мий тлайлану зий бухьурча. Амма хьхьичлва кунма зурча, гайннангу тлайласса ххуллу ккаккан бан аьркинни.

- Вил пикрилий, ци бур Дагъусттаннал цлуци базу? Жула шархьурду дачлра хьуну дур. Ци бан аьркинни зунттаву оьрму уттава буккан бан?

- Газ буцин аьркинни, ххуллурду бакъани бан, буни бакьин бан аьркинни. Инсантал бацлансса шартлру лякьин аьркинни. Агана Махлачкъала ласурча-шикку иш лапва оьккину бур. Ца яла агьаммур масалану на ккалли баяв шагьрулий коммуникацияртту дакъашиву. Думигу – аьвзал заманайрасса, дух хусса дур. Жула республикалул хьуншагьру мурдалсса бур. Ва масала щаллу бан циняв гьуртту хьун аьркинни. Цанчирча, ца-клиннал дувайсса даву дакъархха ва. Марцлшиву диклайсса лакьлайни дакъача, чапалшиву къадайнири. Деловой Клубрал ният дуссар Дагъусттаннан шайсса кумаг бансса.

- Максим Шевченко ия Дагъусттаннал Конституциялувун бичин аьркинссар цаппара шариаьтрал масалартту тлий: маслихлатру байсса, никлахл бишайсса ва м.ц. Ци чара ина мунийн?

- Хлукуматрая дин личли дурну дуссар Аьрасатнаву. Мизитраву маслихлат бан цувчлав ахчилачисса акъар, Конституция даххана къадарчагу. Дин Хлукуматрал иширттаву хлала дакълакьаврил хьинмунийн къабуцайссар.

- Ци бан аьркинссар жагьилтал вацллувун къалихьланшиврул?

- Жагьилтал вацллувун лихъаврил ца савав – даву дакъашивури. Килчин, жагьи-жугьулт бур эьки бивчуну къабивтун, минналсса байсса цуклуи акъар. Жагьилтурал комитетрахьгу миннал масалартту биттур бансса каши дакъар. Аьрасатнаву Дагъусттаннал цалчинмур клану бугьайссар оьрчлру баврил ва махьва махьмур -зунсса клантурду бушаврил. Гара коррупцияри жагьилтал вацллувун лагаврил хьунмур багьана-савав, мукунма чиновниктурал халкъ «цаламиннайх» ва «чилминнайх» бачллачлавугури.

- Ина тамансса дунял клучлу дунни. Ца ккакври, цу даклинний ливчлри вин?



**Африканал (Экваторианльнй Гвинея) Нигачаврил
Маслихатрал мирзанащал**

- На ивссара Индонезиянавун, Китайнавун, Индиянавун, цябала цаймигу мусульмантал бусса Азиянал ва Африканал билятирттайн. Ттун дакний ливчунни Раджеф Тайип Эрдоган, Муаммар Каддафи. На ура Муаммар Каддафинаясса дакнийн бичавурттал лу чичлай. Мукуна на ура ккалай геополитикалиясса лекцияртту МГУ-лул студентьтурахь, эксперт хлисаврай гуртту хьуссара цимивагу геополитикалун хас бувсса форумирттай. Цалчин нари бувсса Маскавлив Советирттал Къатлуву «Мусульмантал терроризмалйн кърщи букваву» тисса Международная конференция. Яла бувссия Махачкъалалив, Германиянаву, Италиянаву.



Ираннал Нигачаврилсса байсса мирза Мухаммадийнащал, Тегераннай

- Ина к1улла политик х1исаврай, амма къак1улла спортсмен х1исаврай...
 - На Цуликъянив школалийва спортрахун агьссияв. Ттун ххирая ла-
 ч1ун уккан. Пединститутраву ккалайни боксрахун агьссияв, яла махъ ка-
 рателухун, дзодарахун агьссияв. Дзюдорал спортрал мастерда. На ивк1ра
 группа захвата х1адур байсса тренернугу, миннал хьунаманугу.



Абдул Абзиз бин Салманнушал - Саоьдинал МВД-лул министрнашал



Саоьдинал торгово-промышленный палаталуву Аьрасатнашал
 вакилнашал (киях Саоьдинал паччах1)

- Вил игьалансса ч1уннагу лич1айрив? Му цукун гьан дуvara?

- Ттун ххирав луттирду ккалан. Махъсса ппурттуву бувкминнугу ттун
 ххуй бизай Мариям Ибрагьимовал «Имам Шамиль» т1исса роман. Лахъсса
 къуллугьирттайсса чиварк1 къабагьну бивк1сса ч1умал, цанма цич1ав къ-
 ахьун ни гьа бувсун, га хьамитайпалул цилва ч1у Шамиллухлу гьаз бувну
 бур. Ганил виричувшиву хьина т1ий ик1ара ч1явучин... На навагу чичара
 луттирду геополитикалин багьайсса. Ттул буссар 400-хъайсса макьалартту
 Аьрасатнал Элмурдал Академиялул журналлай бивщусса. Мукунна гай
 бувкссар Дазул Кьат1увгу: Болгариянаву, Ираннаву, Туркнаву. Ац1ния хъ-
 айсса х1укуматирттай мукьтуршлий хъайсса макьалартту бувкссар.

- Барчаллагь хьунмасса, Мамма Нурмах1аммадович, жу вин ч1а
 т1иссару гьарзад хьинмур.

АБДУЛЛАЕВ ССАПАР АБЛИЕВИЧ.ЛУЩАЛССА ИХТИЛАТ



- Ссапар Аблиевиџ, ина та, чув увссара?

- На увссара 1944 шинал, 10-мур феральданий Вираттиял шяраву, Лакрал райондалий. Ттун шанна шин там хьуну дия нину-ппу Гьумукун бивзсса члумал. На гикку хьуна хьуссара.

- Вил нину-ппу ца бия, ци пиша-санятрал халкъ бия? Зул кулпат чливисса бияв, хьунмасса бияв? Мискинну ялапар хьанай бивк1рув, ягу аваданну?

- Ттул бутта, Абдуллаев Абли кьалайчи ия, нину Батла колхозраву зий диклайва. Кулпатраву арулва оьрч1 бия. Кьалайчинал кьатта, личисса аваданшиву дакъанугу, ччат1 бусса кьаттари.Мунияту буттал жун ккаши-мякъ ккаккан кьабивтуна. Цува х1алт1илухун лавгний, Аьшттарханная, Свердловская, Уральская ганал шаппай ппиринж, качар, нугьуллу гьан дайва.

- Ссапар Аблиевиџ, ина школа чув кьуртал бувссар? Цумур дарс дия яла ххирамур? Цукун дуклай ивк1ра?

- Гьумук арулва класса кьуртал бувссар. Х1арачат булла иклайссияв ххуйну дуклан. Ттунна х1исаврттал дарсру гайминнуяр ххирану диклайва. Муния махъ, 1961-ку шинал Мах1ачкьалалив Строительный техникум кьуртал бувссия. 1967-1972 шиннардий Политехнический институтрал ПГС кьуртал бувссия.

- Ина Армия лавхьссарив, кьалавхьссарив?

- Та члумал техникумрава Армиялийн кьабуцайва. Техникум кьуртал бувну, най буна институтравун бувхмийгу, кьабуцайва. Мукун на кьалавгуна ливч1унав.

Амма на учивияв Армия жагьилутуран чара бакъа аьркинсса школари, куну. Гикку инсан кьянкъа-кьурч1и шайссар, дусшиврул кьимат клул шайсар, зах1мат цирив бувч1айссар.

- Вила кулпатрая бусарча ччива...

- Ттул царсса Октябрина Зайдиевна Абдуллаевал, аьпа биву, Дагъусттаннал университетрал химико-биологический факультетгу къуртал бувну, тамансса хIаллай зий буссия университетраву дарс дихълай, муния махъ МахIачкъалаллал консервный заводрал лабораториялуву. Жул буссар шанма щаллу бувсса душ. Гай циняв МахIачкъалалив ялапар хъанай бур.

- Ссапар Аьлиевич, ина зун ци чIумал, чув айивхъура?

- 1959 шинал зун айивхъура штукатур-маляршиву дулла. Строительный техникумрал кIилчинмур курсирай дуклай уна, зун ивкIра цал чарил, яла тIаннул устарну. Дуккаву къуртал хъуну махъ къатри даврил пишалул циняв шачIантту лавхъсар: мастер, прораб, участокрал хъунама, начальник управления строительства. Биялсса хIалллай зий ивкIссара «Дагрыбпромрал» строителстволул управлениялул начальникну.

- Ина ура Жяматийсса Палаталуву зий. Бусарча ччива, му циван дурсса Палатари? Мунил даймур-дитаймур цири?

- Жяматийсса Палата, цувгу хъанахъисса граждан обществолул институтну, хIасул дурссар 2005 шинал. Халкъуннал ва Каялувшиву дулла-лиминнал дяниву дахIаву цил дуллалисса идарари цурдагу. Масала, жу мухлукъуннал букъавчIачIимур аьвам байссар; чIатIалтран, кьини дуркминнал кумаг-ка байссар; аьркин дакъа дуркми кьанунну дукъан дансса чаранну лякъайссар.

- Махъсса ппурттуву зу ци агъамсса масалартту ххал бигъарду?

- Буссар сакин бувну 7-8 комиссия оьрмулул гъарца чул ххал бигъагъисса: багъу-бизулул (социальная), луртанналул (экономическая), чил хIукуматиртташчалсса дахIаву дайсса (международная), шяраваллил ичIаллилсса байсса (сельскохозяйственная), миллатирттал дянивсса (международная). ХIасил, дан-дитанмунил хIат-хIисав дакъар.

- Вил бияла цири му Палаталуву?

- Ттул ацIра шанна шинни хъунаманал хъиривчуну зий. Гъашинугу цIунил ттигу шанна шинайсса увчIунна вава къуллугърайн.

- Вил пикрилий яла агъаммур хIукму ци бия зу къамул бувсса?

- АьрашарацIун, хъу-лухччинуцIун бавхIусса масалартту ххалбигъаву. Дукъагъайсса хъуруннал, заллу акъа лирчIсса аьрцаралсса буллай бикIайссару жу. 40% хъуруннал дукъагъайссар Дагъусттаннай. Му бакъассагу жу бувайссар халкъуннал къатри баврилсса, коммунальный инфраструктуралулсса.

- Барчаллагъ хъунмасса, Ссапар Аьлиевич, цIуллушиву дулуннав вихъхъун вания тихуннайгу вила бусравсса давриву хъхъичIуннайшивуртту дуллан.

*Ихтилат буссар
Хизри ИЛИЯСОВЛУЛ*



КЪУРБАНАБЛИ МАХАММАДОВИЧЛУЩАЛССА ИХТИЛАТ



– Къурбанабли Махаммадович, ина ура Аьрасатнал лайкъ хьусса художник, Академия художестволул член-корреспондент. Цими шинни вил Художниктурал Дагъусттаннал отделениялул хьунаману?

– Аьрасатнал Художниктурал Союзрал дуссар 108 отделение. Дагъусттанналмургу миннувацца цану хьанахьиссар. ДукӀу жул идаралун 80 шин хьуссар. Хьунаману зий ура 2005 шиная шинай...

– Цими член ур зул къюкълуву?

– На увкӀсса чӀумал 132 ия, утти 178 бур. На 20 инсан художниктуравун къамул бав.

– Ци темарду дур жула художниктурал творчестволуву яла агьаммур кӀану бугълай?

– Гай вихну бур цала санятрайн. Ци рыночный экономика дучӀарчагу, цал бувгъусса ххуллуин хаин къавхьуну бур. Цуксса захӀматну бунугу, яхӀ буллай бур, цацава шаймур буллай Ватандалун хайр бан. Темарду тӀурча чансса дакъар, цӀанасса оьрму ккаккан буллалисса тамансса суратру дирхьуну дур. Гьарца шинал Аьрасатнал Художниктурал Союзрал 18-16 выставка дувайссар межрегиональный чавай, всероссийский чавай, международный чавай. Дагъусттанналмур отделениягу чӀяруми выставкардавух гьуртту шайссар, хаснува республиканскийрттавух.

– Ца бур гьунар бусса художниктал?

– ХӀажи МахӀмудович МахӀаммадов, Расул Аьлиханов, МахӀаммад Джамалудинов, Манаба МахӀаммадова ва м.ц.Вай циняв машгьур хьуссар госзаказрай, вайннал канил дурмур дуссар музейрттаву дазул къатӀувгума. Заказ бакъаний, гьунар бусса бунугу, художникталгу щинчӀав кӀул къавхьуну, цала пишагу ишла къабувнува личӀлай бур.

– Багьишла ити, цаппара лакрал гьунар бусса художниктурал цӀардугу кӀицӀ ларгун ччива.

– Цанни къадувайсса. Гьумучатусса Сиражуттин ва Ххадижат Параман

зовы, Жабраилов Малик; ХАбибуллаев ХАбибуллагъ худграфрай зузисса. Тамансса шинну Китайнал живопись лахълай Поднебеснаялий бивкIссар МахIаммад-хIажи ва Загъидин (бутта ва арс) Бархъаратусса.

– **ХIукуматрал зун ва даву дара куну, заказ дулайрив?**

– Агъ, вил къаттай, ина ча гъалгъа тIий ура?!Ца художниктал бакъа, циняр творческий союзуру хIукуматрал аякъалулу дикIан багъавайссар. Амма му бувчIайсса, къулагъас дувайсса цучIав акъар. Художниктал тIурча гъакссагу цашава шаймургу, ца ххишалагу буллай бур ХIукуматрал тIалавшиннардун биттур дан, ганил къуллугъру барт бигъин. Масала, дявилул ва захIаматрал вирттаврэн гъайкIаллу, скульптурарду щилли дувайсса? Жу дакъарив? Жу гъарца иширавух хIала буссару.

– **СССР дуний, зун творческий мастерскойртту булайссия. Му къяйда ттигу дуссарив?**

– 20 шинни цуппа ца мастерской жун къабуллуну. Гъарца шинал на му масала сукку бара, амма шайсса цичIав бакъар цалсса.

– **Къурбанабли МахIаммадович, ина чассара. Буси чан-къансса виява.**

– На ляхъуссара Цумадиял райондалий Агъвали шяраву. Ттул бутта ия Гигих шяравасса Халилов МахIаммад, машгъурсса зурнавчи; нину дия колхозница ТIлондада шяравасса Шарудинова ПатIимат. Байбихулул школа на къуртал бувссия Гигихлив, 8-мур даражалул школа ТIлондадалий, Дянивмур даражалул школа Хуштадалий. На дуклан увхссияв Дагъусттаннал Художественный училищелувун. Лахълай ивкIра заргалнал даву. Дуккаву къуртал хьуну махъ, гиккува зун авцIуссия. 31 шин дуллуссар на педагогикалул даврин, жагылсса художниктал-заргалтал хIадур буллай. На дишайссия композициялул дарс, практикум ва материаловедение. Мува чIумал ДГПУ-лул географиялул факультетгу къуртал бувссия заочнайну. «Экономика и социальная география мира» тIисса дарс дихълай ивкIссара. Ми шиннардий азараксса заргалшиврул усттар итаавкъссар на.



– Вил усттаргал ца бия?

– Чашкин Олег Борисович накыч дишаврил (филигрань) усттар ия, Апандиев ХИажи Апандиевич дючІан даврил усттар (мастер по гравировке). Уссар ттул ялагу ца учитель – ГьунчІукъататусса Хаджаев Альберт Захарович, суратру дихьу. Ганал кьуртал бувссар Ттуплисулал Академия Художеств.

– МахІачкьалаллал ва Оьргьрал комбинатру зий буссарив?

– Зий буссар тІисса тІарди бусса, туристал буцин, гайннан ккаккан баншиврул. Гай тІурча цакьнива приватизировать бувссар. Гайннул даймургу, хьхьчІра кунна, эмаратса кьадикІай. Усттаргал цала-цала шаппа зийри бусса. Так гайннал дурмур дахханни кумаг байсса комбинатрал.

– ДукІу вин дуллунни медаль. Му щил ссахлу дуллури?

– Му дулайссар Маскавуллал правительстволул магьирлугьраву хьхьчІуннайшивуртту дурну тІий...



– Ттиния тинай ци зунсса хиял бур вил?

– Дан-дитанмуния гьалгьа тІийнияр, дуллай хьинссар. Ци бикІави, ттинин дуллай ивкІсса давриха зун, халкьуннал дакІру ххари дуллан ттула творчестволийну цайми художниктуращал архІал.

– Барчаллагь хьунмасса, жугу ххари бару ина дуллалимунил!



**МУТАЕВ МАХАММАД ШАМИЛОВИЧЛУЩАЛССА
ИХТИЛАТ**



– **МахАммад Шамилович, буси инава та, чув увссарав?**

– На увссара 1959 шинал Лакрал райондалий Ххутрал шяраву.Ттул бут-та Шамиль МахАммадович, аьраличу, яни военный икАйва, аьпа бан цал. Нину Разият МахАммадовнагу, ласнащал военгородикртгай ялапар хъанай бикАйсса бивкIун бия. Гъашину ганин 84 там хъуссар. Гай бикАйва хIал бавкъусса, цаннал ца лавсъсса. Гайннал бия мукъва оьрчI: ттуяр хъунисса кIиннчалт-уссурвал ва чIивисса ссу. ХIасан тIима кIинничув цIа къачай азарданул лавсунни. Вайми уссу-ссу цала-цала тIювардай, паракъатну ялапар хъанай бур.

– **Ина дуклай чув ивкIссара?Ци дакIний ливчIри тай шиннардия?**

– Ттул нину-ппу Гъанжилив бивзун бия. Нагу подклассаравун 38 школийн лавгссияв. Ттун яла-яла ххирая тарихрал дарс. Ттигу тарихрал учитель хъунссияхха тIий икIара. Хъамакъабитай Тамара Трофимовна тIисса учительница. Ганил ттуву дарсирдахсса гъира хъиннува цIаран лахъан бувна. Мунияту ганийн барчаллагърай икIара. ЧIявуну ттун га инсан дакIнийн багъай...

– **Ина аьралуннаву къуллугъ бувссарив?**

– Гъай-гъай.На ивкIссара Совет Аьралуннаву къуллугъ буллай танковый автобазалий Роставрал областърай, Новочеркасск тIисса шагърулий.Армиялул хъахъа дикIуя дурцIу дикI дайссар. Хъхъарасса инсанная къянкъасса чув увайссар, мунияту бурхъничувнан му чара бакъа лахъан аьркинссар.

– **Вил кулпат буссарив?**

– Ттул буссар щаллу бувсса кIива душ. Гай Гъанжилив ялапар хъанай

бур. Ттул шарсса Зарема жула шяравассар. Цувпагу махънийн бухгалтерну зий бикІайссия.

– **Вил ларайсса кІулши дуссарив?**

– Гъай-гъай. На къуртал бувссар цал МахІачкъалаллал Автодорожный техникум, яла Сельхозакадемиялул экономический факультет.

– **Ина чув зий айивхъура, цІана ссаха зий, ци дуллай ура?**

– На айивхъура зий Автоторданул Цалчинмур ДСУ-рай 1977 шинал. ЦІанасса ппурттуву тІурча зий ура Аьрасатнал автомолистураал обществолул Дагъусттаннал отделениялул хъунаману (Председатель Дагестанского отделения Всероссийского общества автомобилистов).

– **Зузисаксса хІаллай микку ина цичІав цІусса дурссарив? Му щин-чІав хІисав хъуну, кымат бивщури?**

– 2013 шинал Минтрансроссиялул ттун дуллунни Почетная Грамота давриву дурсса хъхъичІуннайшивурттахлу.

– **Ци дур вил даврил яла хъунмур жапашиву?**

– Ци дикІави, автошколаду чІяву хъуну бур, амма ххуллурдай аварияртту чан хъанай бакъар. Цанчирча, ххуйну машинартту буцин лахъхъин буллай бакъа тІий. Мунияту, ттул пикрилий, ялув бацІан аьркинни, контроль, цІухху-бусу бикІан аьркинни.

– **Ина ци чара, Дагъусттаннайн В.Аь.Васильев гъан аврия?**

– Ци чиви, гъакссагу пашманна. Лажинни туну, жула итансса чув ухлавгссарив? Му ци хаварди?..Амма на рязийну ура цІуну ивтма зузисса куццуа. Ганал тІалавшин хъуннасса дур, хІисав ларсун къуццу тІий ур.

– **МахІаммад Шамилович, ялунчІин мартрай Аьрасатнал президент увчІин най ур. Ина щихлу ура Путиннухлу ягу Жириновскийлухлу?**

– Ча-чунайсса Жириновскийри тти мугу?! На – Владимир Владимирович Путиннухлу ура! Мунан альтернатива ттун чІалай дакъар.

– **Ци чара ина лакку маз, жула культура ядаврия? Вай масаларттая махъсса ппурттуву чІявусса гъалгъа тІий бурхха.**

– Лакку мазрай луттирду ккалан аьркинссар. Шаппа чара бакъа лакку мазрай гъалгъа тІун аьркинссар. Маз бунийри культурагу дусса. Ми цанницІун ца дархІуссар. ЧІявуну шархъавун занан аьркинссар. Каши дунал кІий къатри дуван аьркинссар. Вана на дував къатри Ххутрал шяраву, мажал бирийихту, оьрчІал оьрчІащал кІинай лагара. Жула халкъгу кІий бучлан аьркинссар.Буттахъал гъаврдалвагу жува лавай зана хъун къабай-рив ккаккан.

– **Вил игъалансса чІунгу дикІайрив? Ина му цукун гъан дара?**

– Ттун ххирар луттирду ккалан. Вана ттигъанну ттун пишкаш бунни Рустам Ибрагъимовлул цала нину Мариям Ибрагъимовал чивчсса луттирду. Яла-яла ттун ххуй бизай Имам Шамиллуя ганил чивчсса куц. На ивкІра уцан къашавай га роман ккалай. Ттун биялсса ттинин къакІулну бивкІсса задру лавхъхъунни. На хъинну пахрулий ура ттула буттал шярара Ххуттия гукун цІа дурксса хъамитайпа ливчун тІий.

КЪУРБАН ДИНМАХІАММАДОВИЧЛУЩАЛІССА ІХТИЛАТ



– Къурбан ДинмахІаммадович, буси инава чассарав, нину-пшу ца бивкІссарив, миннал кулпатрая.

– На Ціалакъаниятуссара. Ва шяравалу Ахъушиял райондалий дуссар. Ва дакъассагу цайми шанна лакрал шяравалу дуссар ва райондалий:Улучур, Бархъал ва Хъюл. Жул шяравалу ххуйсса кІаний дуссар лакрал ва даргиял дазуй. Шяравалу дусса кІану яла лахъмурди Ахъушиял райондалий. Мунийн бувну кІинттул бивкъусса кІану бур. Шяравалугу аьвзал заманнал тарих бусса дур. ПаччахІнал заманнай, цІарай битайсса ттупангру ишла буллалисса чІумал, жул шяраву нувчІа буккайсса бивкІун бур. Мунийн бувну дирзхъунссия



Ціалакъян

Цалякъи тїсса цаґу.Шяравусса халкъуннан чїявуминнан даргиял мазгу кїулли. Жул шяраваллил ва даргиял Щукьтти тїсса ца колхоз дуссия уттигъаннунийн, ялагу ца шяраваллил администрация дуссар кїирагу шяравалу цачїусса. Даргияшал маччашивугу дуссар, маша-ташурдугу куннан кув я бувцусса, я шар буллусса чїявур. Ттул бутта ДинмахІаммад хьунмасса хІаллай шяраваллил советрал хьунаману уссия, жул кулпатгу даргиял шяраву Щукьттав ялапар хьанай буссия къуния ххюра шинай. Буттан кІай шяраву яхьанахьисса халкъуннал хьунмасса хІурмат буя, бутта цувагу ца дурксса зузала ия Ахьушийл райондалий.Нину ва ппу яла колхозру леркъсса чїумал жулла буттахьалмур шяравун Цалякъанив бивзри. Цува шяраваллил советрай зузисса чїумал кїирагу шяраву низам дишин, халкъ колхозрал даврий зузи бан, шяравусса школарду, медпунктру, клубру ва цайми задругу цїу дуккан дан хьуннаса даву дайва ганал. Хаснува мюрши-оьрчїру низамрайн буцин ва дуклаки банссаннух луглан икІайва. Ганал чїявуну учайва, чув адамина чару куна, къянкьясса икІан аьркинсар, оьрмулувугу яла захІматсса зад му гьарцаннал адаминашиву дуручинни бусса, куну. Ва буттал суратри.



ДинмахІаммад

Ххюва оьрчїгу хьуни бувну(ттул кїива ссу ва кїива уссу буссия) вайннал, захІматну бунагу, ххуйсса оьрму бувтуна. Ттул чїивима уссу 1995 шинал, авария дурну, ивкїуна. Химиялул ххуйсса специалист уссия Киеврай институт кьуртал бувсса. Ва хаваргу бусанна буттаяту. Махьсса шиннардий на Аьнжилий кьатри дуллай уссияв. Ца чїумал бутташал лавгун Каспийскалияту хІаятраву дишисса плитка ларсуссия, грузовой машиналий дирхьуну. Мий плитарду Аьнжилийн диян дурну бувкїуна машина. Ликкан машиналияту дуван кумаг чансса бия: навагу, буттагу ва чІаххучувгу ттула чІарав яхьанахьисса. Жу ликкан дуллай буна, машиналул шупир, хавардугу буслай жухь, авцїуну ия. Яла мунал буттахь увкуна, ина хьунасарача мазра, дучІан дан бити жагьилминнал, куну. Буттал увкуна мунахь: «Валлагьий, ттун агьзинсса чув чІаххурайвагу къаччиссар». Мукун буттал учайхту, шупиргу айивхьуна жун кумаг буллай. Нину диркїуна 2008 шинал, кьатри ччурччуну, ппу ивкїуна 2011 шинал, къашавай хьуну, аьпа баннавча. ЦІана шяраву чансса халкъ ливчїун бур. Хїукуматралгу шяраву

халкъ бацансса цичав буллай бакъар, цусса давуртту сакин дуллай бакъар ягу сакин дуллагиминнан кумаг буллай бакъар.

Жул шяраву мукъва классрал бакъа школа бакъая на дуклакисса чумал. Яла Бархъарав къуртал байссия Дянивмур даражалул школа. На ххуйну дуклай уссия, дуклангу ттун хъинну ххирая. Бархъарав 5-6 классру къуртал бувссия. Нину-ппу Щукътав бивзсса чумал нагу тиккусса школалийн занай уссияв. Буттангу ччай бия ттун кумаг бан, оьрус маз лахъхъин бан, на дуккин уван. Ялагу ванан ччай бия ттун оьрму цукунсса буссарив лахъхъин бан. Байбихъулул даражалул школалий дуклакисса чумал на кийла пеонерлагерьданийн гъан увссия оьрус маз лахъхъиншиврул каникуллал чумал Щурагъун. Арулчин классраву дуклай уна, на Къизлардайн гъан увра буттал интернатравун. Интернатраву нитти-бутта бакъасса оьрчругу чявуя, къутаннай нитти-бутта зузиссагу бия. Учителътал оьрус бия. Ттун школагу, гиккусса тарбия бувавугу ххуй дирзуна. Амма байбихъулий ттун захимат хъуна. На къашавай хъуну, бакрай лишай хъуну, дарсругу къадитан багъуна ца-кйива зуруйсса. Интернат ва детдом лавхъхъусса буссар. Микку нитти-бутта бакъасса оьрчругу, правонарушениярду дурну, милицанал учетрайссагуна бия. Классравугу на яла чивимагу ияв, чурххалгу чивисса ияв. Мунийн бувну, ттун байбихъулий дуккаввивугу, цусса гьалмагътурацалгу захимат хъуна. Ттун ччай буссия гиккугу ххювардайну дуклан. Амма байбихъулий му бюхълай бакъая. На ниттичан чагъар чивчуссия (буттачан къачичав, мунал учинмур кйулу) махъунай учанна, Бархъарав школалийн занан. Буттангу ккаккан къабувну ттул чагъар, ниттил дуркйуна, Бархъаравсса школа, пожар хъуну, ччувччуну бурча, чансса халлай миккува ацу тисса. Нагу Къизлардайва авцйура, Бархъаравсса школагу ччувччуну бакъая. 1970 шинал Дагъусттаннай лухччи сукку хъусса чумал чявусса шяраваллаву къатри леркъуна. Жул интернатравун, шяраваллава оьрчругу бизан бувну, интернат цувпагу Вышний Волочек тисса шагърулийн бизан бувна, поездрай шябивтун.

Вышний Волочекрай 8 классрал школа бия. На 10 классраву уссия. Жул Къизлардаяту бувкисса 9-10 классру шагърулувусса 4-мур школалийн занай бувна тиккусса дуккай оьрчашал. Тикку учителъталгу ххуйсса бия, жушалсса зузавугу, тарбия бавугу хъинсса дия. Ца зуруй буссия тайннашчал дуклай. Амма Дагъусттанная бувкисса жулва оьрчругу байбивхъуна жун личийсса класс сакин бара тий, жу Къизлардай жулва мазрай дуклай буссия тий, тай хъяврин буллай. Школалул хъуниминналгу, банмур бакъа, жун тава школалий личисса 9-10 классру сакин бувна. Амма цусса классраву чявуми учителътал цайми бия. Жулва оьрчругу, дарсру къадитлай, чал хъанай бия. Ттун му тйаьн къабивзуна. Яхъанай интернатрай, дарсирайн шагърулувусса школалийн занай уссияв. 2-3 нюжмардува на, кйорххил ивзун, лавгра та шагърулул оьрчругу заназисса классравун. Дагъусттанная бувкисса оьрчан му ххуй къабивзуна. Ца шанма гьантлува, дарсирдаяту увкисса чумал, ккаккунни ттулва кровать коридорданувун буккан бувну, Дагъусттанная бувкисса орчал цаятува личий увну. Интернатрал хъуними байбивхъуна ттухъ, шавай тйайла укканну тий, Дагъусттаннай насу тий. Ттун занай хъун ччай бакъая, навагу, каругу дуллуну, ссайгъатругу бивхъуну, тйайла увккун нитти-бутталгу, мачча-гъанминналгу, шяравуминналгу. Ттун му, ца ливхъун занай шаву кунма, чалай бия. На увкуссия цамур интернатрайн гъан увара куну тиккува. Амма на чунчав гъан къаунав, тиккува ивтуна, так 2 мур классрашчал яхъанахъи увна

интернатравува. Тайннашал яхъанай на школагу къуртал бував, ттуяту тайннал воспитательгу хъуна, учительгу хъуна, ттунна ттула дуккавриха зунсса тагъаргу дия, мюрши орчIру утту бивхъусса чIумал.

Школа къуртал бувкун, на увхра Рязаннай Радиотехнический институтрал вечерный факультетраин. Зун айивхъура слесарьну комбайновый заводрай. Та чIумал на увхссияв компьютерный факультетравун. Компьютерду уттизаманнай кунма ишла буллай бакъая. Институт захIматсса ва хъинну дуккавил чулухунмай лавайсса бия. Яламур шинал на дневной отделениялийн увхссияв. Ялагу та институтраву армиялул званиярду дулайсса кафедра бия. Ньюмардий ца кьини та кафедралий дуклан лагайссияв. На институт хъинну ххуйну къуртал бувссия. Лавайсса отличниктуран булайсса стипендия ласайссия. Ххуллун кьини ва алхIат кьини чун-унугу арцу лякъин даврийн лагайссияв. Мийгу муххал ххуллул станция, дикIул комбинат, чяй личIи-личIисса шушравун дичайсса фабрика, кондитерский фабрика ва цаймигу. Гъинттул строительный кьюкълуву ляркъусса арцугу, стипендиягу ттун биял шайва щаллусса шинай. Ттун ххирая институтраву дуклан. Къуртал бав на институт 1977 шинал. Уттигу лагара институтравун тай ттушалва дуклай бивкIсса оьрчIащал хъуна акьин. 7 майрай дуссар День радио. Та кьини цинявппа институт къуртал бувсса выпускниктал бучIай тиккун хъуна бакьин. ЧIавуми бучIай выпускрал юбилей дуний-5, 10, 15, 20 шин хъувкун. 30 шин къуртал бувну махъ лавгссиявча, институтравун увхра тай аудиториярдавун, кафедралийн, лабораториярдавун. Яла лавгра библиотекалийн. Тикку абонементрай хъуна бавкъунни та нава дуклай ивкIсса чIумулагу зий бивкIсса сотрудница. Ттухъ бувсунни на цина дакIний ушиву чIявуну библиотекалий чIун гъан дуллай: «Что опять что ли пришли (Гъу, ттигу увкIрав)?» - тIий. Ялагу ца хавар. Лухччи сукку хъусса чIумал Дагъустаннай шяраваллавун 1973 шинал Москавлия комиссиярду бучIайва хъусса зарал ххал бан. Щукъттав бувкIсса ца бухъурчагу буттал хъамалу буцайва цачIанма. Гъинттул на каникуллай увкIсса чIумалгу ца хъунасса къуллугъчи увкIун ия Шяраваллил хозяйствалул министерстволияту. Жула шава, кIюрххил шанияту ивзсса чIумал, мунал канийн щин дукIлай уна, лажин диссун, ка шюшин, мунал цIувххунни чу дуклай ура, куну. На бувъссия. Му инсан тамаша буллай, вих къахъанай ия, архсса зунтавусса шяраватусса ина та захIматсса институтравун цукун агъра, цукун дуклай ура тIий.

-Ина Армия лавхъссарив?

– На Армия къалавхъссар, цанчирча таний мукунасса къанунну дия, ду-клакими букъацайсса. Амма на Армия хъинну аьркинссар тIиссара жагъилтуран, миннан зад бувчIиншиврул, чансса захIмат ккакканшиврул, гъарзад гъукра дусса ххай къабикIан, цахва чIила къуртIуну бакI ялугъий бусса ххай къабикIан.

– Буси вила кулпатрая...

– Ттул шарсса жула шяраватуссар. ПатIимат учайссар. Жул буссар мукъва оьрчI. Ца Москавлий зий ур, кулпатгу бувну, Университетраву. Вайми шама бур МахIачкъалалив: кIия ишбажаранчиталну, чIивима колледжраву дуклай ур. КIия оьрчI кулпат бан бувасса бур. Цалсса на гайнная рязийну ура, ттул хIурматрай, лавай бавцIун бур. Ца чIумал буттал увкуна ттухъ: «Ина ттун хIурмат бувара, на рязийну ура вияту. ТачIав ина ттун къаччан бикIан къабунни.Цамур куцуй мабувчIара ттул махъру, мий вилва оьрчIан инава ттуяту нигъ душиву ккаккан булува». Вай бия куртIсса

махъру. Ттул оърчАлгу ттун къаччан бикАнсса зад къабунни. Аллагънайн щукру.

– **Ларайсса кІулшиву ларсукун, ина чув зун ивкІра?**

– Институт къуртал бувния махъ, чансса хІаллай Москвауллал областърайсса Коломна тІисса шагърулий зий уссия конструкторну «Конструкторское бюро машиностроения» тІисса предприятиялий. Та бия хъунмасса предприятие даъвилул ярагъ бувайсса. Тикку байва чІявусса, личИи-личІисса ярагъ. На уссияв ракетарду сакин дувайсса конструктортурал отделениялуву. Институтрава гъан увунав тиккун 5 курсраву дипломный даву чичайнива. На тикку кІира шиная зий уссияв. Ттун, жагъилсса специалистнан зад лахъхъин хъинну мюнпатесса предприятие бия, даъвилул чІумал минометру ита дакълай бивкІсса. Коллективгу хъинну бавкъусса буя. Тикку жулва лакгу зий бия. Хъунама конструкторнал хъиривчу ия Чалавиев ХІажи-Апанни АбдулХамидлул оърчІ Гъумучатусса ва ЦІаххаев МаХІаммад ГъунчІукъататусса. Жагъилсса ттул чІарав бавцІуна мий аькълу бусаврийну, даву цукунсса дуссарив бувчІин баврийну. Чалавиев Х.А. хъинну цІакъсса зузала ия, Бауманское училище къуртал бувну бия танал. Та предприятиялийгу хъинну хъунмасса хІурмат буну ия. Коллективгу хъинну цІакъну низамрай зузи байва. Цал танал ттухъ цІувххуна: «Вин кІуллив яла чувнал къадуван аьркинсса даву ци дуссарив?» - куну. Цала жаваб дуллуна: «Яла чувнал къадайсса даву – цІичІав къадуллалавур». Аьпа баннав цал, хъинсса икІайва. Ттун ччай бия диссертация чичин, элмуллул даврихун агъан. Преприятиялий му давриха зунсса чІун дакъая, кумаг баву дакъая, элмулуха зузиминналгу чІарав бацІлай бакъая. Мунийн бувну, на пикри бувссия институтраву даврий ацІан. 1978 шинал сентябрь зуруй айивхъура зий Дагъусттаннал Политехнический институтраву лабораториялул хъунаману. Миккувагу чансса духъурчагу хъхъичІра-хъхъичІ дарсру дишаву дайдирахъуссия. Яла мукъра шишава 1981 шинал тІайла увккунав Бауманнул цІанийсса университетрал аспирантуралувун. Тикку кандидатский диссертациялул защита дурссия 1985 шинал.

– **Элмийсса давуртту ссан хас дурсса дуссия вил?**

– ЦІанагу элмулуха зий ура чІумух ва тагъарданух урувгун. Докторский диссертация къуртал дав. Ванил темагу компьютерду тІайлану зузи баву ва гайннул гъалатІ ита бакъин къабитавриясса дур, компьютерный системардал цІакъшиврия (надежность).

Аспирантура къуртал бувсса чІумал на Политехнический институтраву зий уссия. Цайминнал къатраву яхъанай уссия, шанма оърчІгу буссия му чІумал. Ттун къатлул ва харжирал пикри бан багълай бия. Харжгу бия 130 къуруш. Мий диял хъанай дакъая ттул кулпатран. Ттун преподавательну зун ччай бия. Амма на аспирантура къуртал бувния махъ, кандидатгу хъуну, чІивима элмуллул сотрудикуну къамул увунав. Аспирантуралувун гъаннийн, кІийхва хъунама элмуллул сотрудикуну уссияв. Мукун на институтрал хъуниминнал гъаз увнав.

Му ппурттуву ттуйн оьвкуну институтрал парткомрал секретарьнал. На рязий хъура ванал ттунма кумаг банссар тІий. Ттухъ цІувххуна, ина аспирантуралувун щил гъан увра, куну. На учав, Политехнический институтрал гъан увра, куну. Та хъурча цІухлай ивкІун ия, вил кумагчи цури, тІий. Оьруснал тІийкун «спина». Яла увкунни, институтраву даву дуллан, зун вин хъинну захІмат хъунтІиссар, куну. Нагу цІуххав циванни, куну. Ганал увкунни вил къатта бакъар, чІарав ацІансса цучІав акъар, куну. На учав: «Ттун уттинингу тачІав бигъану бакъассая. Амма ттулва дакІниймур, нара къас дурну, биттур дан ччан бивкІса зад, дурссар,» – куну. Мунийну жул

ихтилат къртал хуна. Жагылсса ттухь яхI бува захIматнагу, кьаттагу, цайми-цайми аьркинлугьгу хIаллих тIалав хьунтIиссар кьаувкури, му хь-унасса, ректорналсса кунма, институтраву махь нанисса чувнал. Яла Пе-динститутраву зий уссияв. Харжгу хьунмасса бивхьури, элмулухагу зий уссияв гикку, кьатри дансса кIанугу буллури ЦIусса Кяхулайрай.

– **Ина икIайвав МГОУ –рал ректорну. Буси мунийн ци кьавкссар?**

– 2000 шинал на гьалмахтуращал Москвауллал Открытый Универси-тетрал филиал тIитIав. Ваниха зий 14 шин хьуна. КIиазарунния ливчус-са студентьтал буссия, кIиттуршунния ливчсса преподавательтал буссия, нара дурсса филиалданул дуккавил корпусрал кьатри дуссия. ХIукума-траща арцу кьаларсуссия тачIав. Гьарца даву дайссия гьалмахтуращал жура ляркьусса арцуйну. Налогру дулайссая хIукуматран мяйва миллио-налияту лирчусса кьурушру. Амма 2014 шинал цIуну ивтусса Аьрасатнал Федерациялул министрнал Ливановлул Москвавийсса Открытый Универ-ситет лавкьуна, Дагьустаннайсса хьуниминнал кумаграйну жул филиалгу лавкьуна. Му давугу хьхьичIва-хьхьичI студентьтурайн, преподавательту-райн кьаршисса хьуна, вай кучалийн эки бивчусса кунмасса иш хьуна. Ва жулла хIукуматрай инсаннал багьа хьинну чанну бушиву мунийнугу чIалачIи бувна. Филиалдануву ххуйсса специальностру дуссия газрал, на-втлил, информатикалул, экономикалул, юриспруденциялул ва цайми ду-нияллул мазурдил санькартал хIадур бувайсса.

– **ЦIана Ахьшинский проспектрайсса зданиялуву ци институт бус-сар?**

– Тания махь тIитIарду цамур: Институт системных технологий. Ялагу тIитIарду нефтегазовый колледж. ЦIана вайннул лицензиярдаха зий буру. Та, хьхьичIвасса филиал кунма, зузи бан ччай буру.

Дагьустаннайсса министерствалул Минобрнауки жун дулун аьркинс-сар колледжрал лицензия, Москвавийсса министерствалул Минобрнауки РФ институтрал лицензия дулунтIиссар. Мукунсса давриву чиновникту-рал кумаг кьабайссар ва хIукуматрай, так жува мийннал тIутIимурди бан аьркинсса, документациягу лавайсса даражалий хIадур дурну.

Институт зузи бантIиссар, жагылсса оьрчIан кIулшиву дуллай. Умуд бур цIа дурксса институт буван. Лицензия ласуннин, жу зий буру коммер-циялуха, российский армиялул заказругума биттур дувару цаппарасса, дистанционный технологиярдай цайми Аьрасатнал университетирттащал оьрчIру дуклаки бувну буру. Мий дакъасса цаймигу давуртту дуллай буру. Тендердаву ва грантирдал программардаву хIала-гьуртту шару. Жунна жура даву сакин дуллай буру. Амма му бигьасса иш бакъассар.

– **Зу цIана ца хIадур бару?**

– Институтраву хIадур буллай буссару кIайра хьхьичI кицI дурсса фи-лиалдануву диркIсса специальностирдай.

– **Ци бур хIакьинну Дагьустаннайсса кIулшиву ласаврил иш?**

– Дагьустаннай образованиялул иш ххуйну бакьар. ОьрчIан кIулшиву дулаву дакъар. Школарду зий бакьар. Отчетру ва чагьарду чIяву хьуну бур, амма зад лахьхьин бавриха зузисса чанну бур. Цинявппа арцуха зий бур. Школардаву ва институтирдаву, учиннуча, гьава (оьруснал учайссар «ат-мосфера» куну) сагьсса бакьар, дуккавил, кIулшивурул бувцIусса бакьар. ЦIа дурксса Гуржиял философ Мераб Мардашвилл увкуссар «Образова-ние это взрослое состояние человека (КIулши му инсан хьуна шавури)» увкуну. Утти чIявуми мюрщийна личIлай бур.

– **Ци аьркинссар, вил пикрилий, Дагъусттаннал халкъуннал багъу-бизу, маэшат гъаз хъуншиврул? Ци дур хІакъинусса школардал проблемарду?**

– ХъхъичІва Дагъусттаннаяту, шяраву школагу къуртал бувну, Москавлий яла ххуйми институтирдавун дуклан буххайссия. Утти му бакъар, мукунсса масаларду чанну бур. Жува чІивисса миллат буру. Жува чан къахъуншивурул, буруччиншивурул, маз хъама къабитаншиврул, дуккаврихун багъан аьркинссару. Дурккусса инсантал чан хъанай бур, мийннан хІукуматрал кумаг чанну бур. Спортментуран кунма, аьлимтурангу кумаг буллан аьркинссар. Институтирдаву элму нани дан аьркинссар. КъатІаллил хІукуматирдай яла ххуйми университетирдаву хъинну лавайсса харжгу бур ва элмугу хъинну нани дурну дур, кымат лавайсса бур. Мунийн бувнури тикку Нобелевский лауреатъгалгу чІявусса, мунилли образованиягу гъаз дуллалисса. Ва хІукуматрай чулиннай арцу харж дурсса, дарцусса хаварду чІявур. Амма элмулунгу, образованиялунгу чанну дуллай бур. Масалларан, тай урцІалку шиннардий цукун ххуйну кумаг къабуври Джорж Сороснал. Танал лявкъуна та чІумал зузисса преподавательталгу, элмулуд зузалтгу. Масала, ГъунчІукъатІатусса многопрофильный лицейраву зузисса ххуйсса учительнан, физикнан Къурбан ХІамидовичлун кумаг бувна. Мунал учениктал буххайва та чІумал Москавлий Физтехравун, Бауманнул цІанийсса университетравун, МИФИ тІисса университетравун. Утти Дж. Сороснайн гъалгъа тІий бур, та къатІайлану зий ивкІссар тІий бур, хІукуматран зарал биян бувссар тІий бур.

– **Жула халкъ шархъаву бацІаншиврул ци зун аьркинссар?**

–ХъхъичІва-хъхъичІ газ буцин аьркинссар. Бакъаний ххуллурду бан аьркинссар. Шяравусса школарду буруччин аьркинссар. Газ буциннингу, бувцуну махъгу, шяраву ци духъурчагу даву сакин дуллан аьркинссар. Масала, теплицарду, усру дувайсса, ювелиршиву дувайсса, янна дуруххайсса устартурал цехру тІитІин аьркинссар, гъаттараха зузиминнан кумаг буллан аьркинссар. Шяравалурду къадиртун, бивзун шагърулийн гъарча, яла миллатгу бухлаган най бур. Ца яруссаннал шяраву школа буруччиншиврул, шагърулия бувцуну, учительтурал цала мачча-гъанминнал оьрчІру дуклаки бувну буя. Жува зунттал халкъ буру. Зунттаву хъуни хъусса халкъгу, зунттаву ябувсса хІайвандалул дикІгу, накІгу, нисгу, нагъгу, найрал ницІгу ляличІисса душиву щалла дунияллийсса халкъуннан кІулссар.

– **Вил игъалагансса чІунгу дикІайривкъай? Ци ххирар вийн, цукун игъа лагара?**

– Бусанна ттунна яла ххуй дизайсса ва ччисса даврияту ва игъалагаврияту. Ттун ххирар жагъилтуращал, дуклаки оьрчІащал зун, гайннан элму лахъхъин дуллан. Ва ттул оьрмулухунсса даву дур. Ялагу ххирар элмулуха зун, луттирду ва макъаларду чичлан. Советский хІукумат дусса чІумал яхъанай ивкІсса чичу Осип Мандельштамлул назмулуву махъру буссар:

**И тихая работа серебрит
Железный плуг и песнетворца голос.**

Ттун ххирар цайми хІукуматирдайн занан, зунттайн лахълан. ПпабакІуйн 15 лавхъссара, Эльбрусрайн лавхъссара, африканавусса Кили-

манджаро тIисса зунттуйн лавхъссара. Машгъурсса чичу Эрнест Хемингуэйлул «Снега Килиманджаро» (Къилиманджарданул занчру) тIисса лу бувккуну махъ, ттун гъира бивзуна кIа зунттуйн лахъан.



Къурбан ДинмахIаммадович Килиманджаролий

Зунттаву дакI дигъа лагай, шагърулувсса ва хIукуматрайсса диял дакъ-ашивурду хъама ритай. Яла зунттал инсаннал багъу-бизу, хасият, цуллу-сагъшиву хъинну ххал дай. Цилва кIанийн дущингу кумаг бай марцIсса гъаваралгу, зунттал шарашал щиналгу. Оьруснал поэт А.С. Пушкиннул чивчуссар:

**Под голубыми небесами,
Великолепными коврами,
Блестя на солнце, снег лежит.**

Эльбрусрайн лавхъсса чIумал ххуйсса къини дия, баргъ бия, дуниял чаннану дия. Вайми Кавказрайсса зунттурду, кIанил оьрчIру кунма, микIиралу, цIай-цIай тIий, чIалай бия.

Амма яла ххирасса ва дакI дигъалагайсса кIану шяравалу дур: буттахъ-ал мина диркIсса кIану, жуярва хъхъичI яхъанай бивкIсса, хъинну жапасса оьрму бувтсса ппухълуннал гъаврду дусса кIану...

– Барчаллагъ вин хъунмасса, Къурбан ДинмахIаммадович, цIуллушиву дулуннав вихъхъун ци-цигу бюхттулсса зунттурду мукIру буллан...



ЖАБРАИЛ ХАЧИЛАЕВЛУЩАЛССА ИХТИЛАТ



Ж.М.Хачилаев ва Д.О.Рогозин

- Жабраил МахIадович, ца хъис вила обрмулия бусарча ччива...

- На увссара Бабаюртуллал райондалийсса Тамаза-Тюбе тIисса посела-
края арх дакъасса «Чапаево» тIисса Кумиял колхозрал къутандалий 12 ок-
тябрьданий 1964 шинал. Га шин гъараллу ларчIсса, гъан-буккан къабюхъ-
айсса, овсса дия тIар. Ттул нину ХIабибат Куматусса Юсуплул душ, цилгу,
цил бутталгу аьпа бан, колхозница бикIайва, шярваллил ва ичIаллил да-
вуртту дуллан бикIайва. Чурххай хIал буссаксса чувппагу фермалий дояр-
кану зий бикIайва. Бутга МахIад, аьпа бан цал, хIухчу икIайва. Цал-цал,
хIухчу тIий, жува бикIару инсан ккалли-сан къауллай, амма ттул буттан
дурккуминнаяргу за кIула. Ганан кIула гъарца зунттун, машун, даралун,
ратIнин, уртту-тIутIан цIарду; дакIних кIула циняв жула лахъи балайрду;
кIула лакрал ва Дагъустганнал тарих. Тамансса профессорталгума мюх-
тажну бикIайва ганащал гъалгъа бан. Га ия Вихьуллал шярватусса. Ганал

ппу МахIаммад дяъвилул чIумал колхозрал председательшиву дуллай ивкIун ия. Фронтран сурсат гъан давриву хъхьичIунсса кIану бувгуну тIий, га гъан увну ия Щурагъун. Занази ЯтIул Ттугъ ласун. Амма ххуллийх машина кIура бавну, накълу хъуну ия. Къадардал даралуву гъав нясив хъуну диркIун дия, ци банссия. Ттул ппу МахIад I2 шинавусса оърчI цувалу ниттищал ПатIиматлушал ливчIун ивкIун ия. Бан-битан бухлагаврил букансса ччатIух чIавасса оърмулуву Кумав хIухчушиву дуллан лавгун ия пакъир, гиккун цащала нинугу дурцуну. Гикку гай ялапар хъанансса къаттагу буллуну бивкIун бия. Жагъил хъукун, ХIабибат бувцуну бия.



МахIад ва ХIабибат

Жу бияв арулва бакI: мукъа уссу - МахIаммад, Надир, на ва Адам ва шанма ссу – Аймисей, ПатIимат ва РайхIанат. ЧIанма-чIивимур ссу, шин къархуну, къашай хъуну, апалухъхъун лавгун бия. Буттал жу дуккин баншиврул Хасаврай, Мясокомбинатрал чIарав, Къаркъмасова тIисса кучалий ряххилчинмур номер бусса къатри машин ларсуна. Нагу подклассравун лавгссияв вокзалданул чIаравсса муххал ххуллул I12-мур школалийн. Хасаврай мукъва класс бувккунссия. ТачIав хъама къабитанссар учительница Раиса Яковлевна. Га бия аьчухсса, иминсса инсан, цинма кIулмур жун лахъхъин бан шайсса хIарачат буллалисса, жуй дакI цIуцIисса. Га жул классрал руководительницанугу бикIайва. Ганил ттувун дуккаврихсса гъира бувтуна. I975 шинал жун МахIачкъалалив бизан багъуна: жу ххуйсса кIулшиву ласуншиврул ниттин мукун ччан бивкIуна. Га хъинну жул дуккаврил ялув дацIайва. Амма ганин жу дурккуну къуртал хъуннинсса бутIа буллуну бивкIун бакъая: I976 шинал февральданий га жучIату абадлий ларгуна. ОърчIинияцIа къюкI цIуцIисса бивкIун бия байчара. Ниттил чIавамур ссу Аьйшат бикIайссия шярваллил советрал председателъну. Ганил жу цичIанма бувцунав, цилагу шанма душ буна. Циламиннухнийар

жух ургъил бикІайва ганин. ХІакъинусса къинигу жу ганин барчаллагърай буру, га кІилчинмур ниттин ккалли бару.

На икІайссияв цалчинмур сентябрь бучІайния тІий. Шанма каникуллал барз на гъан байссияв буттащал яттичІа ТтурчІайнна-зунтгуй, Дулттияллил чуллай. Буттал ляхъиндалул агьлу зий бивкІун бия Гъази-Гъумучиял хантурачІа личІи-личІисса къуллугъирттай, на учивияв, министры имущественных отношений, куну. Цанчирча, гайнная ирсирай дирхъунссия ттул буттан му «элму»: ганан гъарца зунттун, хъачІнин, машилун, хъунин, къунттун, неххан, неххамачІнин, щарашун, чарин ца кІула. Ссал заллу цу уссарив кІула.

Ниттил ляхъиндалий тІурча машгъурну ивкІссар аьлимчу СалихІ-апанни. Га цувагу Сурхай-хан Хъунбуттал диндалул ва дяъвилул иширттал насихІатчину ивкІссар.

- Ина школа чув къуртал бувссар?

- 1975 шинал буттал МахІачкъалалив Котрова кучалий къатри машан ларсуна. Мукун ччан бивкІун бия ниттин: шикку школагу хъинсса буну тІий, мачча-ляхъингу буну тІий. Нагу Лениннул кучалийсса школалин дарсирайн занан ивкІссияв. Тгун яла ххирая оьруснал литература, математика, геометрия. Миннун ххюварду бишайва. Амма оьрус мазрал дарсираннив мукъва бишайва, гъалатІру итххяхлай буну...Сочинение нава чичайссия, шилчІая лахъан къадувайссия.Переменардай футболаний буклан бикІайссияв. Утти хъю щиннив дарххуссар тІар, школалийгу Следственный комитет тІивтІуну бур. Школанува бивтссания, цуксса къахъина!

- Ина Армия лавхъссарив? Му аьркинссарив, къааьркинссар тІиссагу буккайхха...

- Волгоградрай кІийла Совет Союзрал виричув АхІмад-хан Султаннул цІанийсса Качинскил Лаваймур даражалул Авиационный училищелува курс молодого бойца (жагъилсса талаталал санят)лахълай ивкІссара. Тикку присяга буллуну махъ, гъан увнав Ростоврал СК-рал спортроталувун. Гикку машхул хъуссияв каратэ –до-лухун. Шиккува учин на Аьрасатнал Правительстволул вице-премьер Д. О. Рогозиннухъгу учав АхІмад-хан Султаннун буллусса шамилчинмур виричунал цІуку ганачІан къабившиву вам у масала бакІрайн буккан бан ганахъ тавакъюв бав. Ялугълай ура жавабрах. Мукунма генерал Муслим МахІаммадович Даххаевлунгу ХІукуматрал багъайсса къимат бищурча, тІайлану бикІанссия.

Аьралуннаву къуллугъ чара бакъа буван аьркинссар тІиссара на. Цанчирча, ганил ур адамина тарбия уллай, къянкъа лаган уллай, низамрайн уцлай, дан-дитанмунил пикри буллалли уллай, яхІ бутлай. Акъа туну шайссарив ччиманаща кІюрххил ссят ряххунний изан, левчуна ачин? Армиялул лахъхъин байссар хІакъсса дусшиврун къимат бищун, цума цу уссарив увчІин.

- Вил чІирай каратистурал гарамотартту чІалай дурхха? Спортра-хун ина Армиялий агъссияв?

- Армиялин гъаннингу ттун МахІаммадлул тамансса затру лахъхъин бувна.Яла ганацал Дагъусттаннал, махъ Аьрасатнал Каратэлул Федерациялул президент хъуна. 1990 шинал на лавгссияв МахІаммад бакІчисса спортсментурал группалушчал Оломоуц тІисса Чехословакиянал шагърулийн квалификация ласун. Саид Аьлимов тІисса Бурттуннал шяравасса

каратистгу уссия жушал. Тикку жул физподготовка – хІадуршин ххал дурну, спарингирттайн ита бавкьунав.Ттун дуллуна Цалчинмур Дан, ЛухИи МухІлу. 2010-ку шинал октябрьданий на лавгссияв Абу-Дабилийн ВахИид-ХІасан



Суратрай: Жабраил Хачилаев ва ВахИид-ХІасан Альмери

АльмеричІан. Га ия Щалагу Дунияллул Рюи-Джицу Карателул Ассоциациялул хьунама, цалагу Ю-мур Дан дусса. Ттул кІулмур ххал бивгьукун, ганал ттун дуллуна Мукьилчинмур Дан, ЛухИи МухІлу. КІира шинал мутталий на ивкІра Абу-Дабилийн Аьрасатнал спортсментал бувцун занай, тренер хІисаврай. Мий чІирайсса грамотарттугу тиккур дуллусса.



- Вил цумур лавайсса даражалулу кІулшиву дуссар?

- 1995 шинал Маскавуллал Институт предпринимательства (ишбажаранчишиврул) ва правалул (кѡанунну, ихтиярду) кѡуртал бувссия, ЯтІул диплом буссар. Мунир хѡхичІ тІурча ккалай икІайссияв Ростоврал РИНХ-раву...

- Ина та, чув зий айивхѡссара?

- Шяраву даву чан кѡшай. АцІ-ния-кІира шин хѡну махѡ буттачал зунттавух яттил хѡрив занай ивкІра. Гай давурттал чІярушиврул кѡума лаглангума икІайссияв. Зунттаву кѡушай тІурча ацІан кѡшайсса цІу дирхѡсса дяркѡ дикІайва. 1994 шиная 1998 шинайн иянинн МахІачкѡ-алаллал шагѡрулул депутатѡурал спикернал хѡривчувну зий ивкІра. Муния махѡ цимивагу созѡврал Госдумалул депутатѡурал кумагчину ивкІра. ЦІанасса ппурттѡу тІурча «Азовские судоверфи» тІисса идаралий хѡнаманал хѡривчуну ура.



- Ци бури хІакѡину Дагѡусттаннал ва лакрал халкѡуннал хѡхичІ бавцІусса яла агѡамми масалартту?

- Циняв масалартту байбихѡлай бур коррупциялѡу. Мунил лѡял литІун буллай бур халкѡ, хаснува гѡкѡасса ччатІух луглагѡсса жагѡилтал. Гай бур бюхттулсса кѡатравугу, ххѡйсса машиналувугу талихІ бусса ххай. Арцѡйн, хѡс-мусийн бур иман дирхѡну. Нигѡ-нач хѡама диртун бур. Ттул заманнай жагѡилтал хѡхичІун бурувгѡсса, дуклан, зун чѡисса бикІайва. Утти тІурча чІявуми бур ряххин, дацин, цалалуш дан «хІарачат байсса.» ЧІаравми республикарттай, учинну, Чачаннаву коррупциялушал кѡянкѡану талай бур. Рамзан Кѡадировлуца бювхѡунни низам дишин. ЖучІарагу низам тара-тагу хѡнссар тІисса умуд бур.

Ва дур шала Дагѡусттаннан аѡмсса проблема. Лакралмур ласурча, ЦІусса лакрал райодалул масала ттигу шаллу кѡавхѡссар. 90 шиннардий ттул уссурвалгу, нагу бивкІру му масалалуха зий. Ряхра-арулла шяравалури дирзѡсса Кѡумтуркѡалаллал райодалийн. Аѡркинссакѡсса арцу итадакѡлай бакѡар, итадаркѡумигу аѡркинсса куцѡу багѡавайсса ххуллий ишла дуллай бакѡар. Бизан баврил программалуха зузимигу дакІ тІайласса, миллатрай аѡтІисса бакІрайн багѡлай бакѡар. Муниѡу цукун-дунугу дурсѡа кѡатрал чІирттай хѡякру дагѡлай, лекѡлай байбихѡлай бур. Гай кѡатри багѡавайсса куцѡу дурну дакѡа тІий.

- Махѡсса ппурттѡу чІявусса конференцияртту, форуму бавтІунни лакку маз буруччин аѡркиншиву бусласѡсса. Ци чара ина муни?

- Ци чиви? Конференция бавтІун, цуппа цавагу маз бурувчѡусса тарих бакѡассар. Ми цала цивппа пиарить буллалѡсса давурттури, рекламари. Миннуѡа лакку мазран цукунчІавѡсса мѡнпат бакѡа чІалай бур ттул. Агана

лакку маз ябан ччай бухьурча, аьркинссар Совет Хикуматрал Чиумалсса лакку мазрал литературалул ва грамматикалул циняв классиртгал луттирду ЧиуницЦала итабакьин, школарттайх бачИин. Халкьуннан цала маз хьама битайхту, миллат бакъа хъанай бур. Мунияту мазрал масалалул ялув баЦан бур. Гьакссагу хъина му масала цала бакЦрайн ласунсса меценат уккарча.

- Гъан хъанай дур Аьрасатнал ва Дагъусттаннал хъуними бувчиАйсса Чиун. Ци чара ина, ца битанссар хъунимину?

-На бувчиу акъара...

- Ци чара ина Котрова уссурвал Хачилаевхъал ца къадизаврийн?

- ТЦайламур бусан, кучалун ца дизаврил масъала гъаз бувна жяматийсса ишккаккултрал, дустурал, жу муних мюхтажну къабивкЦру. «Хачилаевхъал ца цан къадирзссар кЦичЦираваллин?» - тЦий ччива ттун, му ца дирзунунияр. Щукру тЦий ура иш хъусса куццуь шаврийн...

ЧЦявуну гайннанчЦан хъамалу учЦайва. Хъинсса дустурал учайссар ттул къатта вил къаттари кунуча, мунияту, гаксса лайкъсса чувнал ца рирщуну кучалун, жу рязиссару, явара.Нагу га тачЦав ттула уссурваврая личЦи къавувайссия...



СалихI АЪЛИМОВ

80 шин



ТТУН ГЪМУЧИЯЛ САЭД ККАВКССАР

Яламаллал вокзалданияту ца версрал арх бакъа ухссавнил чулий муххал ххуллул чIарав жу бусса къатри бия, учин бюхъай будка, куну, Азирбижаннал ва Дагъусттаннал дазуй (Леджутуллал ва Самурдул станциярттал дянив).

Леджутуллал ухссавнил чулухату Самурдул къиблалул чулухун биянинсса Владиквказууллал муххал ххуллул мастерну ттул ппу СалихI ия 1918-1920 шиннардий.

1920 шинал апрель барз, интнил чIун дия. Ттун оърмулулгу 9-10 шин дия. Бутташал кIюрххила шанияту изайссияв. ОърчIсса чIумал бавмур, ккавкмур дакIний бикIайсса бур.

КIюрххил зунзулчаннашал муххал ххуллул ярагъ бивхъусса вагончикрашчал зузалтгу даврийн тIайла бувккун, къунниялнин зузалтрал дуллансса даврил нарядгу бувсун, артельный старостагу зузалтрал хъирив тIайла увккун, ппу шаблонгу канихъну муххал ххуллул дянив авцIуну ия. ВацIлул вив лавсъсса дуланттуву ухъурчангу, поездраяту нигъачIаву дакъая, цанчирча поездру цавагу чулийнмай къазанай гъантри хъуну бия.

Чани щях экъиларгун духъурчангу, вацIлувун цIан дагънура дия. Интнил кIюрххихсса гъавалул сукку буллалисса мурхъирдал чIапIал чIурду, зунттал щарашал щин ххюлуйх ккуру дихълахъисса чIурдаха лахълай бия. Хъхъирхату баргъгу буклай бухъунссия, бюхттулну бавцIусса мурхъирдал ялтту ритлатисса туранну вацIлувату гъаз хъуну къиблалул чулухуннай лахъну ссавнийх нанисса ттуруллайх дихълай, ттуруллив ятIу-хъахъи ларххун нанисса душаврал дасттардаха лахълай дия.

ЦIан лавгсса вацIлувату, лагъми мурхъирдал къяртригу кIутIу хъун дуллай, нанисса инсаннах ялугъий, нагу чапарданул чIаравсса тутлил мурхъирал къяртраву щяивкIун уссияв. ВацIлувату уккайхту, хъхъемал атил бувсса къяпагу къинтбакIрахун гъаз бувну, канийн дуртсса лахъи дакъасса лаххиялул ссимиялттух утасса нентбакI хIалану сахIибулхайр дусса сипатгу лирхъуну, хъахъи ларгсса чакмардах щюллисса урттуйх бивхъусса хъхъемал кIунтIругу пас буллай, ганал ттул буттачIан ххарххи лахъи дурна.

«Ссалам аьлайкум, СумбатIлияту урав?» – «Вааьлайкум ссалам, ча ув-

кра, хъамаличув, СумбатІлияту ушиву цукун кІулли?» – «Яр, ина дорожный мастер акъарав, вин ца СалихІ душивугума кІулли. Ккавказнавухсса муххал ххуллуния СумбатІуллал бивхъуссар тІун бикІай», – хъамаличув укун хъярчру булла ия. «Ина тІимур тІайлар, хъамаличув. Ккавказнавухсса ххуллу шалва къабиширчангу, Кисловодскалияту лавай Самурдайн бияннин бувссар хІарачат СумбатІуллалгу, бивхъуссар чІявусса захІматру. На нава оърмул 14 шинаву, муххал ххуллу бишинтІиссар тІий, носилкалий насыпру дулла ия, зий ивкІссара, каруннил гуж къалаллай, дарвачрахун лямка дуртун, аьрци ххилан багъайва, арцу пудратчинал дуллуминнуй къамулшин дан багъайва. Хъхъурду дутавуртту къатІув вацІраву, авлахъирттай, кунцІуллул зумардай шайва. Щархъурду гъанну дакъая, нажагъ бакъа станциярду, казармарду бувантІиссар тІий, дахъра планну дичлай бия. МичІакирттал лажинтру, яру буруххан байва, чІявуми зузалт бургъил зурзу булла ия, бабаьрал, лякълулссаннул къашай хъанай, литІайва... Муххал ххуллу бишайхту, путевой сторожну, яла артельный старостану зий, чан-къансса арцугу дурну, муххал ххуллул инструкциягу хъиннура лархъьуну, отделениялул начальникначІан лавгун, мастерну ацІан хІарачат бувссия. На вихъ ци буслава, хъамаличув, цу-цумур буслава, ци-цигу оьрчІал, арамтурал жанну къуркъу дурсса муххал ххуллур ва!»

Тутлил мурхъиярду увчІун нанисса ттухгу урувгун, хъамаличунал буттахъ цІувххуна, кулпатгу шикку буссарив куну. «КІия оьрчІ ттучІава ур, ца оьрчІгу, щарссагу Лаккуйри. КІай шилун буцингу, на ласайсса харжирай мукъва-ххюва бакІ ябуллан къахъун най бур, шилуми оьрчІру Лаккуйр гъан бангу жунма кІулсса Лакку кІану бур... Шаппаллил ахІвалгу ци бухъунссар, дукІура ттуршра къуруш арцул гъан дурссия, уттигъанну шарссанил чагъар бувкІунни, ина гъан дурсса арцу ларсун най буна, АьлихІажинал, ттуйн оьвчин бувну ссудкъатлувун, вил ласнал ссил цуппа бивчІан хъхъичІмур шинал ттуща ххюра къуруш ларсуна тІий, юзбашинал вакилтурал Мирзахъ ва Рамазаннухъ хІисав дан бувну, урчІцІаллий ххюра къуруш ларсуна пайдарттал пайдарттугур тІий, ттухъьунгу ххюра къуруш дуллауна тІисса. ЧІявуминнал захІматру булла ия лякъирчангу, чанми халкъуннал бигъану ляхълай бур...»

Буттал бусласиминнух вичІи дирхъуну ухъурчангу, хъамаличув иттацІанттугу ларай кІункІу хъун дулла ия, цайми пикрирду буллалисса куна чІала ия. «Цу-цумур буслава, хъамаличув, цІана ишру къуманиву бур: ва жу бусса кІану Дагъусттаннал ва Азирбижаннал дазу дур, ца версрал арх бакъа Яламалий Азирбижаннал штаб бур. Вай вацІравух лагма-ялтту заназисса вай мусаватистурал погранотрядру. Самурдул ламухгу большевиктал бур. КутІану бусан, оьрчІащал архІал зузалтгу, навагу кІира фронтрал дянив ливчІун буру».

Амма буттан хъамаличу цу уссарив къаувчІунугу, хъамаличунан кІулну бия цивппа чичрурдайнусса дахІаву дусса гъалмахтал бушиву.

Хъамаличу лавай ивзун, буттахъ увкуна: «Жунма хъинну кІулли, большевиктал захІматрал халкъуннаяту цачІун хъуну, жухлува биллай, захІматрал агълу тархъан булла ия най бушиву. Жула аьралуннан дустал цумирив, душмантал цумирив кІулссар, Азирбижаннавату вил канихчил жучІан букІлакІисса чагъардал буслай бурхха, Азирбижаннал халкъ большевик бучІаннин ссавур дакъа ялугълай бушиву. Инава гъан бувмур чагъарда-

нийгу бия Яламалийсса жандар Бабаевлушал ва мусаватистурал хІаписар-нащап ихтилат бав тІий.

Хьхьуниву большевиктурал цаппара ттупру, ттупангру пІякъ учин байхту, мусаватистурал аьрал, чунмайрив къакІулну, лултту яннардаву ливхьун гьантІиссар, ярагьгу канил бугьан къавхьуну. Романовхьал шантуршра шинай дургьуну диркІсса паччахІлугъ шанма гьантлул дянив, гьулусан дурну, гьан дурсса Лениннул большевиктуран циххай ура, мусаватистурал ххяппаксса штаб. Кьунну штабрал лагмагу увкра, аьркинмургу кІул бав. КІулну икІу, оьрчІангу, зунгу нигьачІаву дакъашиву».

Буттан щак багьхьунссия, хьинну аьжаивгу хьуну, цІувххуна: «Хьамаличу, аьйгу мадарача, ина часса ура, ца цур вин?» – «Гьумучатура, Саэд учайссар». – «Агьа, хьинну кІулла, инава ххал къавхьунугу, вил ца машгьурессар, ина гьан бувсса пакетру, листовкарду, Азирбижаннал щархьавух ва муххал ххуллул зузалтравух чансса тІайла дуркхьунссарив на. Аьркинсса чІумап инава увкІун, ххал шавриягу хьинну рязира. Ттун ина даврил хьирив увкІсса инсан ххива. Саэд, арх машара, чяй щарантІиссар цІанакул», – куну, ппу къатлуну лавгуна.

«ОьрчІан нигьачІаву дакъассар» увкусса Саэдлул махь ттун къулай къабивзуна, цанчирча, жун нигьачІаву дакъашиву буттан кІул хьувкун, жу бавачІан Лаккуйнмай къагьан бантІий бияв.

Бизарнувасса ттун нинугу дакІнийн дагьхьунссия, хьунмасса ссихІ бивгьусса ттухгу урувгун, Саэдлул ттул ка дургьуну, на цала чІарав скамейкалий щяивтунав. Шанияту ивзун нанисса ттул хьунама уссугу цала гамур чулух щяивтуна. Саэдлул жул хьара-хьарайн каругу дирчуну, цачІанма чІувингу бувнав. ХІурхІасса чІуний ттюнгану гьалгьа тІий, ххуй-ххуйсса хІазсса хавардугу бувсун, жухь цІувххуна буткалий зувалу бизар къашарув, цайми оьрчІру бакъассарив шикку, куну. «Бизар хьанахьийни, лагару станциялийн, солдатнал жу лихьангу къабару, цивппа бусса ялвми къатравунгу жу буцару». – «Лувми къатраву ци дур?» – «Ттупангру, пулеметру, бомбарду, хьулух аьравалттай бивхьунмасса кІива ттупгу бур. Кув чІумал солдат, ттупангругу хьара-хьарай бивхьуну, балайрдугу тІий, занан бикІай. Жугу, ттархьругу хьарай дирхьуну, солдатнал хьирив лечлай бачару». – «Мусаватистурал учайсса балайрду зун къалахьхьайрив, цавагу къакІуллив?» Тамансса кІулли, куну, цаппарасса Саэдлухьума увкуссия на.

Уссугу, пачливу дишин, тІама ласун лавгуна. Кия чулухунай къатрацІух нанисса Саэдлул хьирив нагу авчура.

Къатрал баргь буккай чулий нузру тІиртІунмасса шанма хьулу вив бусса коридорданул хьулухун бияйхту, Саэдлул цІувххуна, шиву ца буссар, куну. «Ца къатта артельный старостахь, ца путевой сторожнахь, вамургу казармар, чІявусса зузалт гьантта бикІан бучІайсса. Аммаки вай цинявннахьни-яр къатри жухь чІявусса буссар, дорожный мастер уну тІий», – пахрулий учав на.

Саэд хьхьичІ, на хьирив казармалувун буххайхту, лахьисса столдани-яту гьаз хьусса зимизирттал зиз-зив тІисса чІурдавух нарданий пачлихун къурхь дархІусса ШагьбукІ-Кьубил, бургьил зурзу буллуну, куннийх-куришлашисса ккарччал ва кувкулул чІурду хІала бухлай, аьжаивсса музыкалул чІурдаха лахьлай бия. Казарма бувсса чІумал бакъа къахІулурхІусса чІирай, чІитІру литІлай хьусса оьттул ххаругу музыкалул нотардаха

лахълай бия. Столданийсса ххункІру буккай урцІузу дия иргъин тІаннул гъиссилтту. МурцІугу левкъсса пачлил ккурккай ххункІру шахъай бадралузу бия тІутІул ххалляту щавшсса кавкил. ЧІавахъулттий иникІма дусса дарваграй бия арулва гъантлий цал къалия байсса лухІи муххал ягълав. Гамур чІавахъулттил ца зуманив бия пюрун бакъа чирахъ. Ца чулийгу ххунчІайн цІил щин дуллансса кІива ххяппаксса къуркъай цІу. Къашавайнал кІаралличІан гъанну дирхъусса тІаннул ккулугу бия зимизирттал бувцІусса мукъва-ххюва ххункІ. Нузахун гъанну мурцІув бивхъусса тІясраву бия бурчул уссулун бичин аъраян бивхъусса бугълул бакІликку. Нарданил лув дия арнил тІаннул ттархъру, цивппа шаппай бачиннин зузалтрал хІадур дурсса.

Саэд, цала яру ссайн тІайла бацІарчагу, хІурхІа бакІгу сукку дуллай, ялугълай ацІайва. Нагу Саэдлух ялугълай ацІайссияв.

«Зузалт гъарзану бурив, часса бур?» – «Къуния шама ливчІун ур, бачІи шаппай лавгунни. Утти ацІния кІия Лаккуятусса ур, ливчІми ярусса, дарги, лазги, кІия азирбижангу ур. Зунтватусса ливчІмигу, баргъ къалачІун, шаппай гъанну тІий бия, амма большевиктал бучІан чІал къахъунтІиссар, зу шикку аъркин хъунтІиссар тІий, бацІан барду».

Жул казарма кунмасса зузалтрал ватанну Саэдлун циксса ххал шайхъунссия.

Казармалузату увккун нанисса чІумал, Саэдлул, хъунмасса ссихІгу бивгъуну, цахъва цува куна, хІурхІасса чІуний тІий ия: «ХІуриятрал ттугъ бюхттулну, цІакъну гъаз банну». Ялагу цирив цайми махъругу тІийна, къатІувай увккун нанисса Саэдлул хъирив нагу увкра.

Буттагу, Саэдгу дянив къатлувун чяй хІачІан лавгуна. Дукра канакийни, хъамаличунах ялугълан маикІаванна буттал учайну тІий, нагу гамур къатлуванай лавгессияв.

Хавардай тамансса хІалгу бувну, бутта ва Саэд къатІувппай бувккун, гъалгъа тІий бавцІуна. Нагу заборданул чІаравсса тутлил мурхъирал къяртраву щяивкІра, гайннал хавардахгу вичІилий. Га дия 1920 шин, апрель зурул 14-мур къини.

«Самурдул неххахун большевиктурап гужру цачІун шавайри бусса, утти чІал къахъунтІиссар шихун бучІан. Амма мусаватистурайн вихшала дан багълай бакъар. Къунниялай, вихшаласса зузалтгу бувцуну, Самур станциялиягу шихуннайсса дуланттувату цаппара махру дуркъун, чулухуннай дичара, бюхъарчан, ца мах, архгу къадурну, вацІлузу ларитара зунна кІулсса кланай. АцІния урчІуннил хъхъуну тІурча, махру дунийра дирхъуну, ххуллу хІадурну бикІан аъркинссар. Хъхъунил ссят ца хъусса чІумал (1920 шинал, апрель зурул 20-нний) ва зул къатрах бронепоездгу бацІан бувну, фронтгу шичча тІитІинтІиссар. Мусаватисталгу ппив хъуну гъантІиссар, штабгу гъагъантІиссар. Зугу зунма зува кІулну бикІан аъркинссару. Жула аьралуннал хъхъичІ дацІансса зад къадикІантІиссар. Бакуйн бияннин...»

Укунсса ихтилат буллай ия Саэд буттахъ. Арх бакъа мусаватистурал штабравату хІаписарнал цала солдатнайн дуллалисса командалул чІу кладовойлул цІияллил мурцІний бавцІуну гъуп-гъупгу тІий леххан хІадурсса

духъжарттул чІунил циятува личІи буллай бия. Мурхъирдал ялтту тІитІи ларгсса бургъиятусса нурданул къяртри вацІлул вивсса ххютувух нажагъ хІала духлай дия.

СалихІлун наган ттупанчагу пишкаш бувну, хъямалагу агъну, Саэд вацІлувух Самурдул чулухунай лавгуна.

МаркІачІан чІумал, зузалт даврияту бучІайхту, буттал овъчин бувну Бугъаев АьвдурахІин тІисса зузалайн, муххал тталагу, путевой ключгу хІадур дува увкуна.

АьвдурахІин СалихІлул хъинну вихшаласса гьалмахчу ия. Га карчІ дакъасса, хъинну итххяхвхсса, гьарзадрал сант кІулсса инсан ия. Цахъва увкумур гацІанакул шаллу бувансса хІарачатрай икІайва. Оьккисса яннагу ларххун, муккурдул ххуржинттугу хъарайн дирчуну, шярайхукку хъуну, ганал Саэдлул гъан дурну дуркІсса листовкарду, пакетру, цала хилкІраву, дулагъирттаву кІучІ дурну, хъхъу-къини личІи къадурну, Азирбижаннал цархъавун, Хачмазуллал тихунмайсса станциярдайн, буткардайн диян дайва. Дагъусттаннал чулийннайгу Самурдухун диян дуван лагайва. Большевиктуран кумагран 1919-1920 шиннардий чІярусса давурттив дурна Бугъаевлул.

Саэдлул бучІантІиссар увкусса чІумал хъхъунил ссят цанний, апрель зурул 20-нний, 1920 шинал большевиктал бувкІун, жу бусса къатрах бронепоездру бацІан бувну, чани хъяхъа тІуннин битлайгу бивкІун, Азирбижаннал штабрайн, чаннахъ ххяхххун лавгуна.

КІюрххил поездирттай, пургоннай, пІайтІуннай, дучрай, бахъгта, ххулу къабуллай, бавчуна хІисав дан къабюхъайсса большевиктурал аьраллу. Мусаватистурая ливтІуминнал къаркъаллу дуччин нанисса зузалтрашал нагу лавгссияв штабрайн Яламалийн.

Хъунмасса зарал хъуну бакъая, вокзалданул мурцІу лекъан бувну бия. Штабрал ялувмур зиву ттупал ппив дурну дия. Мусаватистураятусса ацІния кІия солдат, ливхъун най бунува, ттиликІрахун щуну, ливтІуну бия. Штабрал хъулухсса ттупру суккувагу бувну бакъая. Коридорданувусса пулеметирттал лахъисса патрондашру бухха-буккайнал ккуччу дуллай дия. Ттупангру къянцрайва бия. Складирттая къункьулли дурккун дакъая. Солдат уттубишайсса нарандайра ялтту яннарду къариртун дия, «къан аханда къаган дагюлт» никъурал хъхъару буцаннин ливхъун лавгун бия.

Большевиктурал аьрал ссахкІуй буруглай бакъая, анаварну хъхъичІунмай най бия, хъхъичІун щяв уругайсса акъая, бакІру гъаз дурну най бия. Вагончикрайн мусаватистурал къаркъаллу дирчуну нанисса зузалтрашал нагу лавгссияв.



Тарихрал ххуттардива

КЪАЯЕВ И. А.

1741-1743 ШИННАРДИЙ ДАГЪУСТТАННАЙ ХЪУССА ИШРУ ЦІУНИЛГУ ДАКІНИН БИЧЛАЙ

1741-1743 шиннардий Дагъусттаннайн дъявилий увкІсса Надир-шагънал ца яла гужмур хІадуршиннарал ахиргу, Ираннал аьралуннал ахиргу, цала Надир-шагънал цІанил бюхттулшиврул ахиргу хъуссар. Му мукун хъушиву мыйжан буллай бур га чІумал яхъанай бивкІсса, гай ишру ххуйну кІулса инсантуралгу.

Гай бур Надир-шагънал цала аьралуннал ахиргу, цала цІанил сийгу Дагъусттаннашалсса дъявилулу бас дуршиврий, Ираннал агьлу аьзурда бувшиврий, хІукумат лиян дуршиврий мукІру хъанай.

Хъунмасса барчаллагъ XVIII ттуршукулул дайдахъулий хъуну бивкІсса Дагъусттаннал халкъуннал Ираннашалсса дъяви миллатрал цІанийсса бивкІшиву мыйжан буллай бивкІсса аьлимтуран. Гайннал хъунмасса захІмат бувну бур га чІумал хъанай бивкІмур мюршну бурувгуну, мыйжанну аьлтту бан. Амма, тІайламур бусан, оьруснал ва парснал аьлимтурал тІутІимунийн хъар дурну чивчумур, мыйжаннугу, Дагъусттаннай хъанай бивкІмуния арх бувцуну бур.

Архивравусса летописирттал, фольклордал ва цайми-цаймигу хъирив лавну дурсса та чІумалсса тарихраясса чичрурдал тасттикъ буллай бур Ираннашалсса дъявилулу Дагъусттаннал халкъуннал ларсѐсса ххувшаву мыйжансса диркІшиву. Цала ясир бувсса Афганнал, Туркнал, Индуснал, Курднал, Узбагнал ва Гуржиял билаятирттал гужругу цачІун бувну, Къизилбашнал ва Ираннал тайпардал ополченцыгу хІаласса хІат дакъа хъунмасса аьралуннашал авчуну ур 1741 шинал Туркнал Афшар тІисса тухумрава увкІсса, Кырхлу тІисса тайпалул вакил Надир-шагъ цала шамилчинмур походрай Дагъусттаннайн.

1734 ва 1735 шиннардий бувсса цала кІива дъявилулу дарсругу хІисавравун ларсуну, Надир-шагънан пикри хъуну бур мютІий къахъанакъисса Дагъусттаннал агьлу къатІ бан, ливчІмигу, ясир бувну, Ираннавун гъан бан.

Кавказнал тарихраву мукунсса ишру чансса къавхъуну бур. XVIII ттуршукулул дайдахъулий Гуржиял халкъ Ираннал чапхунчитурал мукун бири-бат бувну бия.

Дагъусттаннайн дяъвилий ачайний Надир-шагънал укун куну бур: «На ттуйнма мютгий бав Хиндусттан, Тураннал ва Ираннал аьрши. Утти на хIат дакъасса аьралуннашал най ура Гъумучиял хIукуматрай къяцIа бизан. Укунсса къяцIа бизаву дантIиссар на шала дунияллий».

Надир-шагъ Дагъусттаннайн ххяхссар, дяъвилува савсусса, дяъвилул цIараву цIакъ хьусса полководецтал бакIчисса ттуршазарунния ливчусса аьралуннашал. Ва укунсса гужрал хьхьичI бацIан багълай бивкIессар чIярусса шиннардий цала тархъаншиврул цIаний талай, хIаллания лавгсса зунттал агьуланун.

Ираннал аьрал Дарбантуллал дазуйн биявайсса чIумал Сурхай-хан ва уцми АхIмад-хан бакъасса цаймигу зунттал халкъуннал бакIчитурал хьарду бувну бивкIессар, ца хьуну, душманнашал талан. Му иширал хIакъираву Къызлардал комендантначIа лазутчикну къуллугърай ивкIесса Чубар Абакаров буслай ур: «Циняв тавлиннал, яруссаннал ва цIахъарнал агьуланул махъ буллауна Сурхай-ханнахъхьун цачIу талан. Утти Сурхайлул тавлинцы цачIанма буцлай ур. Миккува гайннал хьуниминнал Усмайл ва Сурхайл хьарду бувна цачIу талан, шагъначIан къагъан». Дагъусттаннал халкъуннал бакIчитурал бувсса хъа (буллусса махъ) мййжансса бивкIшиву тасттикъ буллай бур дагъусттаннайсса, аьраб мазрай чивчусса документралгу. Вана Гуржих тIисса обществалул Сурхай-ханнучIан ва ганал арсурваврачIан – МахIаммад-ханнучIан ва Муртаза-АьличIан гъан бувсса чагъарданул копия:

«Хьунмасса барчаллагъ дунияллул залуннан – бюхттулсса Аллагънан. Бюхттулсса Аллагънал нур дакъиннав цала жучIан гъан увсса МахIаммадлуьхгу, ганал кулпатрайхгу, циняв ганал хьирив наниминнайхгу! Бюхттулсса Зал вил чIарав авцIун лякъиннав тIий, хьунмасса ссаламрашал жу – гуржихиял миллат, шиккусса аьлимтал, оьрмулул хьуними, миллатрал хIурмат лайкъ хьуми буру миллатрал тархъаншиврул цIаний ва шариаьтрал цIаний жан харж дан хьуну авцIусса, цIа машгъурсса, тур ва къалам байлсса хьунасса ханнайн, хIурмат лайкъ бувсса султаннуйн ва вил паргалсса арсурваврайн – хьунасса аьлимнайн, МахIаммадайн ва тIайлашиврул чIарав авцIусса Муртаза-Аьлийн бивтунма личIаннав агьуланул хIурматрал баргъ! Амин!»

Хьиривгу бур чивчуну: «Вай махъру вичIан гъан баврин сававгу, мурадгу хъанахьиссар жу жувагу вичIан цачIун шаву, жушчал архIал цинявипа Дагъусттаннал агьуланул махъ ца бавугу. Уттинингу жу буссияв жула аьралуннашал укунсса мурадрай занай, амма ина жух къулагъас къадурна га Дагъусттаннан дуллугъ чивчусса чIумал. Жул хьунмасса умуд бур шала Дагъусттаннан чивчусса дуллугъ ина жунгу лайкъ банссар тIисса. Жу вин ччинийн, ччимур чIумал вищал бучIанну ва цайминнал даймур жугу данну. Жу мудан тIайлашиврул цIаний бавцIуну буссару. Жу мудангу вил буюрду биттур бан хIадурссару ва тачIав къаршинугу къабукканну. Гужгу, къудратгу щичIачIав дакъассар АллагъначIа дакъа».

Ва хьхьичIа-хьхьичI элмулул зумакарччулун багъсса документрал тасттикъ буллай бур Сурхай-ханнул цала дяъвилул ва политикалул иширттаву хIала буллай ивкIшиву личIи-личIисса Дагъусттаннал ополченцигу, буллай ивкIшиву гайннан багъайсса хIакъгу.

Зунттал халкъуннал гужирдал хьуниминнал – Сурхай-ханнул ва уц-

мий АхІмад-ханнул Надир-шагънашалсса дяъвилува агъаммур тактика цІакъсса оборона дачин дансса диркІун дур. КутІасса мутгалий бувну бур цІакъсса обороналул рубежру. Лазутчик Б. Чиматовлул Къизлардайн баян бувну бур: «Сурхай-ханнал зунттал дарардаву, тавлинцинашал архІал ацІва чарттал шагъурдугу бувну, гиккун кІункІу бунни цала гужру. Мукунмасса арулва чарттал шагъурдугу бувну, биялсса ттупругу бивхъуну, Сурхай-хан хІадур хъуну ур Къубачиянашал талан».

Ва укунсса хІадуршиннарал хъунмасса кІану бувгъуну бур га дяъвилува. Гикку гъаргъуну дур, марч хъуну, Гъумукун нанисса Ираннал аьралуннал аргъ.

Гъази-ГъумучияначІан нанисса кІани-кІанттайгу анаварну бувну бур душман гъан къаитансса цІакъсса барурду. Гай барурдая лирчІсса эяллу ккарккуну дур XX ттуршукулул 30-ку шиннардий Аьли Къаяевлун.

Шикку цІуххин багълай бур, цанни Надир-шагънашалсса цала агъаммур талатаву Гъази-Гъумучиял аьрщарай дан хІукму бувсса Сурхай-ханнал, куну. Гъази-Гъумучи бур лагма дарарду дусса, бачин захІматсса ххуллурду бусса кІанай. Лавг заманнай гикку зунттал агъуллаулул бувну бивкІун бур Серир хІукумат душмантурая дуруччинсса къаларду. Сурхай-ханнан кІулну бивкІун бур ттупру ишла буллалисса душманнал аьралуннашал талан захІмат хъуншиву, амма ганал цамур банмур къабивкІун бур.

Дагъусттаннал аьралуннал къинттуллухун буккансса къасттирай Надир-шагънал ХІайдарбаг бакІчисса, ацІазарунния ливчусса цала аьрал гъан бувну бур. Ми гужругу буххан аьркинну бивкІун бур Мехтулиннал ханлугърал аьрщарайн. Шагънал буюр баннин Аьймаккиял даралува бавцІуну бивкІун бур гай, амма Надир-шагънал цала агъамми гужру Шагъ-ДаграйхчІин Гъази-Гъумукун бачин бувну бур. Гъумукунгу авчуну ур Надир-шагъ цала ххуллий цимурца ххит дуллай. Оьруснал курьертурал буслай бур: «Арулазарунния ливчсса, Наджеф Султан бакІчийсса Ираннал аьралуннал Кураллал аьрщарайсса ацІра-ацІния ххюра шяравалу гъарца къини ччучлай бур, шархъурдугу къариртуну, агълу ливхъуну най бур. Шяравусса гайннал хъус-къама, дукия, ризкъи парснал аскартурал цалалуш дуллай бур, цала дучран ишла дуллай бур».

Сурхай-хан хІарачат буллай ивкІун ур шагънал аьрал Самур-неххачІа, лазгиял аьрщарай бацІан бан, амма къабювхъуну бур.

1741 шинал август зурул дайдахъулий Надир-шагънал гужирдал ШавкІуллал шяраваллил чІаравсса Сурхай-ханнул гужру гъагъан бувну, Гъази-Гъумучиял лагма дургъуну дур, яла, агъамми кІанттурдайгу цІакъ хъуну, неххайрдийхсса ххуллурду ласунсса хІадуршинна дурну дур. Ираннал аьралуннайн данди буккан Сурхай-ханнул бивкІун бур так арулазара аскар ва ххюазара турдал балгусса бурттигъалт. Гайннал бакІчийнугу ивкІун ур Сурхай-ханнул арс Муртаза-Аьли. Цала махъра-махъсса Ираннал аьралуннашалсса талатаву Сурхай-ханнул дурну дур Гъумучиял къакъурув. Ца ссятрал мутгалий Гъази-Гъумукун бувцуну бувкІун бур оьттул майданния 700 ливтІусса ва бивщусса аскар.

Хъун-неххал та чулий парснал ттупру хІадур буллайсса хІисав хъуну, Сурхай-ханнул тайннайн гъужум бувну бур, амма тай ласун къавхъуну бур. Ца хъхъу ва къини хъуну дур Гъази-Гъумучи Ираннал артиллериялул цІараву. Иш бан-битан бакъасса тагъарданийн багъну бур. БавтІуну бур

Военный Совет. Гикку бивкІун бур цува Сурхай-хан акъассагу кІия ганал арс – МахІаммад-хан ва Муртаза-Аълигу, военачальник Къарат ва Иранна-щалсса дѣввилул идеолог ГъидатІуллал Ибрагъин-хІажигу. Жул пикрилий, га Советрал хІукму бувхъунссия Сурхай-хан ясирну гъансса, Муртаза-Аъли бурттигъалтрал барулува уккансса тагъар шаллу дан ва цала гужру хъ-иривмур талатаврийн хІадур бансса къасттирай. Ганияр махъ хъусса талатавурттал ва цайми иширттал буслай бур га хІукму тІайласса бивкІшиву.

Цалчин. ЧІун лахъи дуккан дансса умудрай, шагънал ца полководцайнахчІин, Гъани-ханнухчІин Сурхай-ханнул байбивхъуну бур переговорду. Шагъ ивкІун ур Сурхай-ханнул махъ бакъа мютІи шаву ва дакъаврил чагъарданий къулбас даву тІалав дуллай. Сурхай-хан капитуляциялий къарязи хъуну ур. Дакъаврил къутІи чичаву тІалав дурну дур. Му чІумал, Надир-шагънал вакилтал гъан бувну махъ, капитулировать шаву тІалав дурну дур. Рязи къахъурча, дакъаврил къутІилийн цал къулбас дантІиссар Гъази-Гъумучиял ханнал шарссанил хъазамрай куну бур.

Мунин ссибивзсса Сурхай-ханнал, вакилталгу турданух къукъари бувну, талатаву дайдирахъуну дур.

Ва укун захІатесса чІумал Сурхай-ханнал цала махъва-махъсса амру бувну бур арснайн, цал пикри мабарача, аьрал буручча (хаснува бурттигъалт), гай, цІан шайхту, къюлтІну зунттавун буца тІисса. Цала махъва-махъсса амру мѣйжаннугу шаллу хъушиву кІулхъукун, Гъани-ханнал кумаграйну, авгъуст зурул 9-нний 1741 шинал Сурхай-хан Надир-шагънал лагерьданийн увкІуну ур.

КІилчин. Муртаза-Аъли Гъумучату лавгун ца нюжмар хъуну дур. Гъази-Гъумукунсса ххуллурду тІивтІуну бивкІун бур, амма дѣввилул иширттаву савсусса, Наполеоннущал архІал ацІан уллалисса дѣввилул усттарнал, гъарца къини цайнма къаршисса гужру гъарза хъанахъишиву чІалай бунува, най бунува цала аьрал Дагъусттаннал куртІинийн къуж къабувну бур.

Жаваб. Надир-шагънан хъунав хъусса Сурхай-ханнул оьрму аьркинну къабивкІун бур. Ганан аьркинну бивкІун бур ханнал аьрал ва аьралуннал бакІчитал мютІи бан. Ганан пикри бивкІун бур, бюхттулсса цала цІа бавну, зунттал агъуланул ярагъ шѣв бишинссар тІисса. Сурхай-ханнул тІурча, зунттал халкъуннал цала гужру цацІун баннин, чІун лахъи дуккан дансса политика дачин дурну диркІун дур.

Дайдихъулий Надир-шагънал Сурхай-хан хІурматрай хъунаавкъуну ур, ганан хІатта багълул ххирасса хълатгу пиш-каш дурну дур. Та чІумал му хъунмасса хІурматран ккалли байсса бивкІессар. Амма махъ, Сурхай-ханнал цува хъяврин увшиву бувчІукун, Муртаза-Аъли ва МахІаммад-хан зунттаву аьрал цацІун буллау бусса кІулхъукун, ганал Сурхай-хан дуснакъ увну ур.

Шамилчин. Цивппа дуснакъ бувну бунува Гъази-Гъумучиял Сурхай-ханнал ва Къайтагънал АхІмад-ханнал шагънащалсса цала талатаврил пикриду буслай бивкІун бур га талатаврил бакІчишиву дуллалисса Сурхай-ханнал арсурвавахъ ва Михтулиннал АхІмад-ханнухъ.

Гай талансса хІадуршинна дуллау бушиву кІулхъукун, 1741-ку шинал, сентябрь зурул 12-нний шагънал амру бувну бур къызгъинсса талатаву дайдишин. 12-мур сентябрьдануяр махъ дѣввилийн хІадур хъанахъисса Дагъу-

станныл агьлу бюхъаймур буллай бивкӀун бур обь экъи къабутӀинсса тагъар щаллу дуллай.

Абли Къаяевлул архивраву ттун льякӀунни ГьидатӀуллал ИбрагӀин-хӀа-жинал чивчусса кӀива хӀинну агьамсса чагъар.

Цалчинмур чагъар бур 1735-ку шинал Надир-шагънал Дагъусттаннайн кӀилчинмур поход дайдишиннин чивчусса. КӀилчинмур чагъаргу бур поход дайдишаврил кӀинирдай ганалва гъан бувсса.

ЦАЛЧИНМУР ЧАГЪАР

«Дакъаврийн ва паракъатшиврийн кӀункӀу бувну льякӀиннав зу хьунасса Аллагънал!

Зух мякъсса Урадиннал хӀажиная ва ГьидатӀуллал циняв жагъилтурая дакӀнихтунусса ссалам жул уссурваврайн-жагъилтурайн, Килаллал, Багуллал, Ахаллал ва Асаллал вирттаврайн. Хьунасса Аллагънал буруччиннав зу душмантурая! Амин!

Ялавайгу бур. Бюхттулсса ва виричувсса жула хьамаличувная, Къаплан Герей-ханнуя жунма баюкун, жун нач хьуна жула халкӀунная ва хьунасса Аллагъная. Цанчирча, жу жула хьанничӀа уттубивхьуну буний, жула обрчӀащал тӀуркӀу тӀий буний, жу душманная буручлай, га жул чӀарав авцӀун ивкӀун тӀий. Утти жуца бюхъайсарив паракъатну щябикӀан тай жухъ кумаг бара тӀий буний?! Утти жу къянкъасса хӀукму барду талавливух гьуртту хьун.

Мунихлуну жул хьунмасса умуд бур ва чара бакъа цинявннан агьамсса талатавливу зу, цавай уссурвал кунма, жушчал архӀал бикӀанссару тӀисса. Ва ражаб зурул мьяинний, хамис кӀини жу гьужум байбишин тӀий буру.

Ванил хӀакъираву на – ал-хӀажинал арс лавгра Сурхай-ханнучӀан. Ганал махъ буллунни аьралуннан ва дучран дукиягу, хӀачӀиягу щаллу дан».

КӀИЛЧИНМУР ЧАГЪАР

«ГьидатӀуллал жяматрая зуйн ссалам! ТӀайламунил цӀаний наниминнайн, бувкӀуну Дагъусттаннал аьрщарай мина дирхьуминнайн. Гуж буминнайн. Душманнащал данди бувкӀуну бух бан къашайминнайн. Дагъусттаннал щархьурду эяллийн дуккан дан къасттирай бувкӀминнайн, хаснува Хасбулат-щамхаллуйн.

Аллагънал буруччиннав зугу, жугу ва дуняллий ва та дуняллий жура дуллалисса, махъ пашман хьунсса иширттая.

Уттинингу, уттигу жува буссияв жухьва кумаг чӀатӀиминнал чӀарав. «Душманнал винма цуксса зарал бурув, муксса зарал инагу ба ганан. Ххисшаласса мабара», – тӀий бур Къуранналий. Зугу га Къуранналул суралий тӀутӀимунил ххуллийх бачи!

Бусурманнал дянив дяви хьун къабитансса къаст дуссия жун. Амма жуйн кумаг бара тӀий обьтӀий бур дявилул цӀарахьхьун биривми. Мунияту жугу, жула къатрава къатӀун бувкӀуру. Жу зухъ тӀий буру Тахмазаллал жямат: «Зу Сурхай-ханнун танмихӀ бунни – зула аьрщарая ганал ларсумур ганаца зу зерххунни, ганал ххазна бачӀва бунни, ганал халкъ ливтӀунни – ахир пуч дунни. Утти зун Дагъусттаннал щархъая аьркинсса цири? Щам-

хал Аьймаккиял зунттуйн къалавхъуссаниягу гъая ганан ганиннин дурмур.

Къуранналул суралух вичИи дишара. Гиву бур укун тИий: «Аллагънал аьрщарайва байссар зулмукартурацIухсса. Цал гайннан таммихI байссар цайминнал, яла ганал бунагъирттан хIакъмур байссар хъунасса Заннал. Вай идавсил кумунихгу къулагъас дурну, занахъу вила шавай! Жун ччай бакъар вищал талан, хаснува жун ччай бакъар Щамхаллушал талан. Буттал буттахъая шихунмай жула дянив так дусшивуя дусса. Нажагъ бусурмантурал дянив дяъви хъанарча, хIарачат бара гай дакъил бан. Нажагъ къабюхълай бухурча, тIайла бакъа дяъви буллалиминнащал талатияра, гай зуйнма мютIий хъуннин!» – укунсса сура къабивкIссания, жу паракъатну шаппа щябивкIуну бикIанссия. Зу зула хатирданийн бувну бусурманнал оь экъибутIлатIаву бацIан бара. Ина жул хъунама акъара. Жу вийн мютIийми бакъару. Жу тачIав, щинчIав налогру дуллай къабивкIссару, мунил зувал талан. Жу чапурталгу бакъару зул динналуин бучIан. Нажагъ жу тIутIимуних зу вичИи къадиширча, жу циняв жула къатрава букканну талан.

Аллагънал чивчумуний рязийссару!»

Ираннал аьрал ча най бивкIссарив ва чун най бивкIссарив бусласисса чичру дур Ххутрал АхIмад-къадинал луттиравугу. «Ца зурул мутталий бавцIуну бия къизилбаштал Хъурхъиял ва Щардал дянив, яла гай гъаз хъуна ТтурчIиял зунттуин. Мияннал шяравалличIа бия гайннал чятирду.

Аьралуннал хъунаманал, Таймазлул Гъани-хан бакIчийсса афгъаннал аьрал гъан бувна Мукъардал округраин. Гикку, Уриннал шяраваллил ялувсса арив гайннал чятирду бивщуна. Гайннал аьралуннал ца къяртта дия дацIан дурну Мияв ва КIихIарчи тIисса шяраваллал дянив. Гамур къярттагу дия Хъанардал зунттуй. Гичча гай къизилбаштал бавчуна Ссугъращавн. Ххутрал ва Мияннал дянив га къюкъя ххит дурна. Гикку къатI хъуна шаназарда душманнал аскар. Ялагу ца къизилбаштурал къюкъя ххит дурна. Ца къюкъя ялагу ххит дурна ТIантIиял ва Уллучара шяраваллал ялувсса кIанттай. Ца цамургу къизилбаштурал къюкъя ххит дурна Аьймакки тIисса шяравалличIа. Къизилбаштурал аьралуннал агъаммур бутIа къатI бувна Жухут тIисса даралуву.

Къизилбаштурал лекъа-пIякъу дурна СсюрхIиял шяраваллу. АхIмад-ханнул аьрщигу душмантурал ппирххит дурна. ЦIахъардал шяравалу ччурччуна. Мукун къизгъинсса талатаврил чIумал так ца Бартху тIисса округрал агълу ва гайннал аьлимтал бия къизилбаштуращал бавкъуну. Мунихлуну гайннан зарал биян къабувна къизилбаштурал. «Жу Щамхаллул халкъругу» учайва гайннал, дукаврил ва хIачIаврил кумагру байва гайннан.

1741-ку шинал хъанай бивкIсса ишру мйяжанну ашкара буллалисса, агъамсса чичру дурну дур Аьли Къаяевлул Ккуллал аьлимчу Чупаннул «Ал-хисну-л-хасин» тIисса луттирава. Гиву бур укун тИий: «Мйяжаннугу, Тахмаз-шах цала аьралуннащал кIилчингу увкIун ур 1194-ку (1741 ш. – И.Къ.) шинал Дагъусттаннал билаятраин. Лекъа-пIякъа бувну бур шагърурду, шяраваллу, хъямала дурну дур хъус, ясир бувну бур хъами, оьрчIру, ятту ва гъатгара. ЦIакъ хъуну бур гай Дуруччи тIисса зунттуй. Гайннащал талай бивкIун бур яруссаннал арамтал, Сурхай-ханнал арсру, цаймигу, цала гужирдащал АхIмад-хангу.

Тахмазлул аьрал, бусурманнал гужру цачIун бувну, ххит бувну бур. ЛивчIмигу, хьацIру кунма, ливхьуну бур, цала хьямала дурсса хьусгу кьариртун. ЧIярусса гайннал хьус яруссаннал ва цайми агьулланун лирчIуну дур».

Аьли Къаяевлул архивраву дур Мияннал шяраваллил кьужрая бавну дурсса укунсса чичругу: «Тгухь бувсуна Мияннаясса кьужрал Надир-шагьнащалсса талатавриву ххув хьусса цаппара гьидатIуллал ливтIусса парснал аскарнал бакIру, ккаччал кунна, ккарччах парчари дурну, сситтуй кIутIу дуллай бивкIшиву, цаппарагу гайннал лякьяра кьацIа тIий бивкIшиву. Мунияту парснал халкъ Дагъусттаннал агьулланул инсантал букайсса бур тIий бивкIун бур, Надир-шагьнахьгу Дагъусттаннащалсса талатавриву мугъаятну икIу тIий бивкIун бур. Му бакъассагу гайннал бувсуну бур Дагъусттаннал аскартал, ираннал-рафидитътурал ливхьуну наниний кьариртесса хьуслихьгу кьабурувгун, Кураллал дазуйн бияннин хьирив багьну лавгшиву. Ялагу бувсуну бур, талатавуртту хьусса га аьрщарай арулла шинай ххяххия кьархьуну диркIшиву.

Га талатаву дайди хьунугу диркIун дур Куядиннал адаминал.

Ираннал аьралуннал махьунмай бищавриясса «Надир-шагь ххит авриясса материал» тIисса цала чичрулуву Аьли Къаяев буслай ур талатавриву бух хьусса шагьнал аьрал ливхьуну нанисса маршрутирттая.

«Ираннал аьралуннал ца кьартта ВицIхьилийхчин лирхьун дарчуну дур, гамур – Цахъарайхчин, цавайгу, Хьунзунттуйн бувккуну, Уллучарах ва Ахьушах лирхьун дарчуну дур; ливчIмигу – Вихьлийх, СсурхIайх ва Уркарах. Шагьнал АхIмад-хан уцмин тапшур бувну бивкIун бур ца цамургу цала аьралуннал кьартта Дарбантуллал чулиннай дучин. Цува Надир-шагь, цацала Сурхай-хангу увцуну, Кураллайхчин Чурлив лавгун ур».

Угти хIарачат банну га тарихийсса талатаврил бакIчий цу ивкIсарив бусан.

1. Бурганну оьруснал хIукуматирттащалсса политикалул «Оьруснал ва Парсналмур» фондравун. Шиву цачIун дурну дур шагьнал лагерьданий бивкIсса оьруснал дипломатътурал, жунна аьркинсса чIумун хасьсса масаларттаясса яеустурал разведаркинмур. ХIатта ва фондрал гьарца документраву Сурхай-ханнуя ва ганал арсурваврая, МахIаммадлуя ва Муртаза-Аьлия бувсуну бур. Мукунма бувсуну бур Ираннащалсса талатаву щаллу дурминная.

Аьндалаллал кьади Пир-МахIаммадая цичIав куну, ягу чивчуну бакъар чIявусса оьруснал дипломатътурал кумуниву. Цимилгу зунттаву лавгнугу, цалагу тикрал бувну бакъар дазуйсса оьруснал администрациялул лазутчиктуралгу.

Шиккува учин, «Мироукрошающая Надирова книга» тIисса, гай иширттаву гьурттушиву дурсса Ираннал МахIанмад-Казиннун кIулнувагу акъар кьади Пир-МахIаммада цури.

2. Та заманнай дурсса, гай иширттан хасьсса чичрурдаву дур Дагъусттаннал миллатирттайн га дяьвилул идеологнал аьлимчувнал ГьидатIлиясса Ибрагьим-хIажинал дурсса оьвчаву. Дур цайми-цаймигу чIярусса чичрур-

ду, амма гивугу бакъар цичIав куну Аьндалаллал къадий Пир-МахIамма-
дая.

3. Утти бурганну жула тарихчитуралми чичрурдах. Му темалуя чичай-
миннаву ца яла хъхъичIа-хъхъичIма исследователь хъанай ур А.И. Тимай.
1958 шинал итабавкъусса цала «Дагъусттаннай пана хъусса Надир-шагъ-
нал (1741-1748 ш.ш.) кампания» тIисса луттиравугу цичIав куну бакъар
Пир-МахIаммада къадиная.

Н.А. Сотавовлул 1991 шинал итадаркъусса «Ухссавнил Къапкъаз Оьрус-
нал ва Ираннал, Оьруснал ва Туркнал XVIII ттуршукулийсса иширт-
тая» тIисса монографиялувугу цичIав куну бакъар Аьндалаллал къади
Пир-МахIаммадая.

Мува Н.А. Сотавовлул 2000 шинал итабавкъуна «Дунияллул душман-
нал ахир» тIисса лу. Цала чичрулуву ганал ишла бувну бур туркнал хро-
нистурал Самил, Шакирдул, Субхил ва Изил 1783 шинал Стамбуллай
итабавкъусса «Тарих». Ганиву бур чичлай: «...гай автортурал тIутIимургу,
гивахсса цайминнал бусласавурттагху бургарча, аьлтту хъанай бур Аьн-
далаллал ополчения щаллу бавривугу, гайннал Надир-шагъ ххит авривугу
хъуннасса гьурттушиву дуршиву динийсса хъунмасса хIурмат лайкъ був-
са къадий Пир-МахIаммадалгу, талатавурттаву къянкъалавчIусса, гьунар
бусса ополчениялул командир Ссугърациял Чупалавлулгу», – тIий.

На хъирив лавну ххал дав туркнал хронистурал чивчумур. МахIаттал
хъура. Гикку цичIав куну бакъар я Пир-МахIаммада къадиная, я Ссугъра-
циял Чупалавная. Га хIурмат бусса исследовательнал луттиравун укунсса
щялмахъ багъсса циваннив кIул бан аьркини.

4. Ссугърациял цалагу бур тарихраву хъумуниясса бусала. Гай бусалар-
дах мюрш ивкIуну урувгукун, укунсса пикри аьлтту хъанай бур: а) Гиву
тIайламурнир махъсса чIуннардий ляхъи-хъун бавуртту гьарзану дур; б)
бусалардаву бур шама Аьндалаллал къадий: Пир-МахIанмада, Дибир-Му-
са ва МахIаммад-Къади. Ссугърахъ шама къади ца чIумал икIаву щялмахъ
бур. Му бакъассагу, цаннин-ца дандисса халкъуннал бусаларду тарихрал
тIайлашаврийн кIункIу буллан къабучIир.

5. КIай авторнал кумуниву дур Ссугърациял къадитурал тухумирттал
сияхI. Цалчинмур сияхI дур къади АхIмадлул арснал къади МахIаммадая,
«Ма'ан» тIисса луттираву дурсса. Ва сияхIраву къади Пир-МахIанмадал
цIа дакъар. КIилчинмур сияхI дур «Хашийа Мухиддин фи илм ал-мантик»
тIисса луттирал ахирданий. Ва лу цуппагу Ссугърациял къадитурал тай-
палул лу бур. Ва луттиравусса сияхIравугу къади Пир-МахIаммада акъар.

Ссугърациял Оьмардул луттираву къадитурал тайпалул шамилчинмур
сияхIраву Пир-МахIаммада къади ур, амма га яхъанай ивкIун ур XVIII
ттуршукулул ахирданий ва XIX ттуршукулул дайдихъулий.

6. Тарихравун дагъсса талатаву дурсса Мехтулиннал АхIмадханнуя
укун чивчуну бур, мьяйжаннугу, га дакIнийн увтуну ур так 1741 шинал
Аьймаккиял даралуву Ираннал аьралуннащал хъусса талатавурттагъа бусла-
сисса чичрулуву, амма документраву га тарихравун дагъсса талатаврил хъ-
унаману ивкIессар тIий бакъар.

Утти Сурхай-ханнул арс Муртаза-Аълия хІакъмур. Ганая куну бур, га чІумалсса Оьруснал, Ираннал, Туркнал, Дагъусттаннал ва Къапкъазналми тарихрал документирттаву. Гиву бур Муртаза-Аъли ивкІссар тІий, XVIII ттуршукулул 20-ку шиннардий душмантуращалсса гужирттал хъунаману. Гай документирттал тасттикъ буллай бур Муртаза-Аъли ацІунния лирчусса шиннардий каялувшиву дуллай ивкІшиву душмантуращалсса къызгъинсса талатавурттаву, га аьралуннал машгъурсса бакІчи ивкІшиву. Муртаза-Аъли гъунар бусса аьралуннал хъунама ушиву тасттикъ хъуна 1734-1735 шиннардийсса талатавурттаву. Масалларан, 1735 шинал Муртаза-Аъли цала дружиналушал Ттуплислив увкІуну ивкІун ур туркнал аьралуннан кумагран. 1739-ку шинал зунттал агъулланун ххуйну кІулсса, военачальник Гелегойщал Щекъив цІакъ хъусса къизилбаштурал лагма дургъуну дур. 1737-ку шинал Муртаза-Аълил къызгъинсса талатаврил Шабран лавсуну бур. 1940-ку шинал Муртаза-Аълил Щамаххуллал лагма дургъуну дур. Надир-шагъ хІарачат буллай ивкІун ур Муртаза-Аъли ва ганал уссу МахІаммад цайна мютІи ан. Вахмистр Захар Григорьевлул тІутІаврийн бувну, авгъуст зурул 20-нний Надир-шагънал Сурхай-ханнухъ куну бур: «Вила арсругу бувцуну, гайнная ца ттул аьралуннаву ивтун, Щамаххав яхъанан насу гаманащал. Га шагъру на вин буллай ура, ччарча Гянжалий яхъанан насу». БувчІин бюхълай бур шикку шагънан цума арс цачІана уцин ччай ивкІссарив. Туркнал тарихчи Ш. Эзелул тІутІаврийн бувну Надир-шагъ Гуржи ва Дагъусттан пишкеш бан хІадурну ивкІун ур Муртаза-Аълихлу: «На Гуржи ва Дагъусттан вин булувияв ца вил гукунсса арснахлу», – куну бур ганал.

Га талатаврил сияхІ дуллай, машгъурсса кавказовед Л.И. Лавров Ираннащалсса талатавурттаву циняв зунттал къюкърал бакІчину, гайннал каялувшиву дуллай Муртаза-Аъли ивкІшиву тасттикъ буллай ур: «Балайрдаву ва бусалардаву циняв Дагъусттаннал халкъуннал Ираннащалсса талатавурттал каялувшиву дуллай Муртаза-Аъли ивкІшиву буслай бур», – тІий ур га. Та чІумалсса Ираннал аьралуннащалсса зунттал халкъуннал талатаврил бакІчину Муртаза-Аъли ивкІшиву, аьрабнал чивчумунийн хъар дуллай чичлай ур Дагъусттаннал аьлимчу Аъли Къаяевгу. А.И. Тамайгу тІий ур циняв Дагъусттаннал аьралуннал бакІчишиву дуллай Сурхай-ханнал арсру Муртаза-Аъли ва МахІаммад-хан бивкІшиву.

Машгъурсса Дагъусттаннал аьлимчу, тарихрал доктор Р.М. МахІаммадовгу ур талатаву хъуннин хъхъичІ Ссугъращав хъусса зунттал военачальниктурал совещаниялий «циняв гьуртту хъанахъиминнал Муртаза-Аълихъ миннат бувшиву талатаврил каялувшиву дува», – тІий.

Халкъуннал эпосравугу Надир-шагъ ххит авриясса яруссаннал балайрдавугу бур: «Сурхай-ханнал нигъ дакъасса арс – зунттал халкъуннал вихшала» тІисса ххару.

Муртаза-Аълил Надир-шагънащалсса талатаврия буслай бур ганал гъаттайсса буркІунттуйсса эпитафиялулгу: «Га увкІуна ва гай кІанайсса циняв ганайн мютІий хъуна», – тІий бур гикку.

Муртаза-Аъли ивкІуну махъ Гъази-Гъумучиял хъунаману авцІуна ганал

уссу МахІаммад-хан. Га Ираннал аьрал буттал аьрщарая лихъан баннин гайннашал талан ивкІуна.

Аьли Къаяевлул тІутІаврийн бувну, «МахІаммад-хан ивкІун ур, цала ппу куна, аькьлу бусса, гьунар бусса ханлугърал хъунама. Га ивкІун ур цала миллатгу, билаятгу Иранная буручлай. Хасбулат-щамхаллул биялса захІмат бувну бур цув Надир-шагънашал дакьил ан, амма га цукунчІав рязи къавхъуну ур. Вана Хасбулат-щамхаллул МахІаммад-ханначІансса чагъар: «Хъунмасса ссалам Хасбулат-щамхаллул хъунасса ханнайн, МахІаммад-ханнуйн, Аллагънал уруччиннав ина ва жула чІумул балардая. Ина жул динийссагу, иширайнугуссагу уссура. Жу вин зарал бан ччай бакъару. Ина вих хъу Аллагънайнгу, жуйнгу. Шагъ вин зарал бан ччай акъашиву кІулша. Жу ина иянгу увну, махъунайгу уцинну шагъначІату. Му мьайжаншиву вин бувчІиншиврул жу вичІа вина ччима жула арамтал аманатран къабитанну. КІа бюхтгулсса Аллагънайн хъарашав шагънал вин оббала къабантІиссар. ГаначІан учІарча, ганал вин хъунмасса хІурмат бантІиссар. Ина ухъхъу я Ахъушав, ягу ХІапшимав. Жува вищал мунил хІакъираву ихтилат банну. Нажагъ ина жух вичІидиширча, жу тІимур барча, вингу, циняв бусурманнангу так хъинбалар хъунтІисса. Акъахъурча, халкъгу ккашил литІлантІиссар, щархъугу эяллайн кІурадаентІиссар. Утти, инава пикри ба, ци бан бузив, бусурманнан хъинмур бува. Жу тІимур барча, Аллагънал хъинмур бантІиссар. Нажагъ ина дахІаву дан рязи хъурча, вил кумаграйну циняв бусурмангу балалуца ххассал хъунтІиссар, вил цагу мудан сийлий инсантурачІа яхъунтІиссар. Барчаллагъ».

Мьайжансса зат бур ва чагъар Ираннал шагъ рязину чивчушиву. Амма МахІаммад-хан цукунчІав рязи хъуну акъар га зулмукарнашал дакъаву дан. «Гъази-Гъумучиял МахІаммад-хан лахІан ан гайннаща къавхъуну бур».

Гъази-Гъумучиял хъунама, цала чІумал цала чІивима уссу Муртаза-Аьли-баг куна Ираннал чапхунчитурашал къянкъану авцІуну ивкІун ур.

КІай ялувсса масаларду хІисавравун лавсун, автор укунсса пикрилийн укІлай ур:

а) Дагъусттаннал Надир-шагънашалсса талатаву Аьндархъиялли тІутІаву къатІайлассар. Цан бакъарча ва хъуннасса талатаву цІанасса Лакрал, Гъуниннал, Щиндархъиял ва Лавациял районнай цара ца ппурттуву най диркІун тІий. Му талатаврийнгу ТтурчІиннал учаву яла мьайжанмур ва тІайламурди. Цанчирча Ираннал аьралуннашалсса яла къизгъинмур, захІматмур талатаву кІикку хъуну диркІун тІий. Куннайн-кув дандисса гужирдал хъуниминнал (главнокомандующий) ставкарду кІикку бивкІун тІий.

б) Талатаврил каялувшиву дуллалимагу Сурхай-ханнул арс Муртаза-Аьли ивкІун ур. Ганал кумагчиталнугу бивкІун бур Мехтулулал АхІмад-хангу, Анцухъиял Гелеггу, УнцІукІуллал Маллачу;

в) Надир-шагънашалсса дяъвилува Дагъусттаннал агълу динийну цачІун буллалаврил хъунаману ия ГьидатІуллал Ибрагъим-ХІажи. 1734-ку шиннардий дурсса кІанттул чичрулува укун куну бур.

Махъ мукъун кІанай укун чин ччай бур: тарихрал талатаву дан цачІун хъуну бивкІун бур феодалтурал къюкьри ва личІи-личІисса кІанттава

бывкІсса халкъуннал дружинарду, амма махъунмай зана хъуну бур вирттаврал цІарду лайкъ дурсса Дагъусттаннал гужруну, гъарца шярваллин пахру бивкІун бур цивпагу талатаврил, ххувшаврил ца бутІану бушаврия. Га циняв Дагъусттаннал агъуланун аьмсса хъуннасса ххувшаврил пахрулул бири-бат бувну бур феодал чІумалсса цанная-ца ятсса заманалул пикрирду ва пахрурду. Жула дяъвилул тарих – му бур Дагъусттаннал цинявннан аьмсса, къатІаллил душмантуращал талай хІасул хъусса тарихрал ца бутІа.

Га талатаврил хъуними бивкІун бур феодалтал. Га чІумух бургарча, цайми бикІан къабюхъайва. Амма гай талай бивкІун бур халкъуннал лайкъсса мурадрал зувал, Дагъусттаннал цала оьрмулул къалиправун кІункІу хъуну нанисса тарихрал ххуллу буручлай. Га бивкІун бур цила багъайсса кущуйсса игитътурал замана. Га чІумалсса талатавурттал, ххувшавурттал феодалтал мачча бувну бур халкъуннащал.

Тайлашиврул цІаний хъанай бивкІсса га чІумалсса дяъвирдаву, ххувшавурттаву чІалай бур халкъуннал кумаг, гайннал хъуннасса виричувшиву. Амма мунил цукунчІав мискин буллай бакъар, гайннай каялувшиву дуллай бивкІсса полководецтурахсса халкъуннал хІурмат. Му бакъассагу, машгъур хъунни халкъуннал багъу-бизулучІа бавцІуну бивкІминнал бивкІу бакъасса цІарду, гъаз хъунни буттал кІану буручлай, талай бивкІсса Дагъусттаннал халкъуннал къимат. Муния бур жунмагу цІана хъуннасса пахру.

*Лакку мазрайн бувцуссар
Ссугъури УВАЙСОВЛУЛ*



Буккултрал назмурдава

Аьбдулкьадир
НЯКІУЧИЕВ



ЛАКРАЛ ХАЛКЪУННАХА

*Лявхъуссару зунттаву
Сурулух бувххун лавгсса,
ДакІругу чаннаннилли
СсалчІав хъхъичІ къалахІайсса.*

*Жун захІмат бан ххирассар,
ЯхІ-намусгу бусравссар,
Лаккучунал каниву
Усттаршиву магъирссар.*

*Лакрал миллат чаннугу,
Миннал дустан чІявуссар,
Чил билаятрайн агъма
Луглай ур лаккучунах.*

*Хъурдай Лакку билаят
Алжаннул майдан буван,*

*Зунтурду уртту-тІутІал,
Щап куну, буцІин буван.*

*Хъурдай мюриши щархъурду,
Мюрици оьрчІал дурцІуну,
Вай магъмунсса кІичІиртту,
Чурдал гъузузи буван.*

*Хъурдай багърал къаралчи,
Чаттираву чул бувну,
Га шанавун лагайхту,
Хъюртул мурхъирайн лахъан.*

*Хъурдай жагъил замана,
Хъурдай лак Лакку кІанай,
Жанналий жан дусаксса
Лакку кІану бюхттул бан.*



Насруттин ХІАСАНОВ

БУТТАЕВ МАХІАММАДЛУН



Буттаев МахІаммад Жамалуттинович

Чивину унува,
чІявусса ккавккун,
БачІва ччаннах занай,
обрчІшиву ларгун,

Чава жагЫил хьувкун,
дяввильин лавгун,
Занагу ивкІуна,
ххувшаву ларсун.

Дяввильуца лахІан
уван къавхьуна
Буттаев МахІаммад
цІакьну авцІуна.

Аькьилшиву дусса
хьярчру Ккурккуллал,
Гьар кІанай инсантал
буссар буллайнма.



ККУРККУЛЛАЛ САЙПУЛЛАГЬЛУН



Сайпуллагь Мамматиллаевич Абдуразаков дустурачал
(кияха шамилчинма)


**Буллусса махь ина
БацІан бувара,
Кьини дуркнал чІарав
Мудан ацІара.**

**НасихІатрал хьирив
Халкь вичІан бачай,
Хьинбалагу ина
Гьарманан бувай.**

**ТІайламунил ххуллийх
Найну тІий, валлагь,
Бусравнугу ура
ЦІасса Сайпуллагь!**



Индекс годовой 63334
Индекс полугодовой 73894



Ххутрал шяравалу

НОВОЛУНИЕ
На лакском языке